

Exodu

Nabaybadyaran ka mgo otow to Israil dio to Ehiptu

1¹ Soini ka mgo ngaran to mgo anak ni Israil no nighondio to Ehiptu duma to amoy ran (no songo pighingaranan ki Jacob) woy duma to mgo lunggunan dan: ² Si Riubin, si Simion, si Livi, woy si Juda; ³ Si Isakar, si Sibulun woy si Binyamin; ⁴ Si Dan woy si Naptali; si Gad woy si Asir. ⁵ Kapituan ka tibon mgo pinanganak ni Jacob; duon on si Jose to Ehiptu to sikan.

⁶ No kunto-on namatoy si Jose woy ka tibon mgo suod din, woy noubus nammatoy ka tibon mgo otow to sikan no kapunganan, ⁷ di nanganak ka mgo pinanganak ni Israil^a, woy nigmoon-ing lagboy sikandan taman to nakatangkap sikandan to tibon tano.

⁸ No nigdatong no duon iam no igbudyag to Ehiptu no waro mataga to mgo nabadyaan ni Jose. ⁹ Nigkagi sikandin duon to mgo otow rin to “Pitow kow, darasigi on lagboy soini no mgo otow to Israil no mabogbog pad kanta. ¹⁰ Nokoy naan no ogbantoy ki to litos no oghimuon ta kandan. Hoo su ko kono ki ogbantoy, ogmoon-ing pad sikandan woy ko duon allow no minangadyawoy ogbulig sikandan to mgo usig ta, woy og-atu sikandan kanta woy og-awo to ugpaan ta.”

¹¹ No nigtinuru sikandan to mgo otow to pogpogos to mgo otow to Israil to pogtarabau odyow no ogkabogatan sikandan. Woy pighimu to mgo otow to Israil ka mgo lunsud to Pitom woy Ramisis no mgo sabukanan to mgo kaaglagan ni Parao.^b ¹² Di agad to pigloig-loig ka mgo otow to Israil, nigmoon-ing pad atag sikandan woy nigparagas sikandan to pogtangkap to tano, taman to nahallok on ka mgo matig Ehiptu to mgo otow to Israil, ¹³ woy pigpatarabau sikandan to waro koid-u. ¹⁴ Nigpatarabau ka mgo matig Ehiptu to mgo otow to Israil to mgo mabogat no tarabau to poghimu to mgo baoy woy dio to kamot taman to nigmasakit ka goinawa to mgo otow to Israil su waro koid-u to mgo nigpatarabau kandan.

^a1:7 Israil: Soini ka dangob no ngaran ni Jacob (Pitow ka to Genesis 32:27-28). Songo piggamit ka soini no ngaran to koot-otawan no kapunganan ni Jacob.

^b1:11 Parao: Soini ian ka ingngaran dan to igbudyag to Ehiptu, iing to Presidente ian ka ingngaran to igbudyag to Pilipinas.

¹⁵ Pignangonan to igbudyag to Ehiptu ka mgo taag-udyamu to mgo Hibriu^cno si Sipra woy si Pua, ¹⁶ no kagi “Ko og-udyamuon now ka mgo Hibriu no mgo boi ko og-anak sikandan, ko lukos ka bato, himatadyi now sikandin; di ko boi ka bato, baagara now sikandin.” ¹⁷ Di nahallok ka mgo taag-udyamu to Magboboot woy waro sikandan mogbabali to innangon to hari to Ehiptu; inbaagad dan ka mgo lukos no bato. ¹⁸ No inpo-umow to igbudyag to Ehiptu ka mgo taag-udyamu woy nig-inso sikandin to “Manio to soini ka pighimu now? Manio to inbaagad now ka mgo lukos?”

¹⁹ Nigtabak ka mgo taag-udyamu ki Parao to “Kono og-unawa ka mgo boi no Hibriu to mgo boi no matig Ehiptu; manokal lagboy sikandan, woy og-anak sikandan to kono pad oglopow ka mgo taag-udyamu.” ²⁰ Sikan ian pigbuligan to Magboboot ka mgo taag-udyamu woy nigparagas nigmoon-ing ka mgo Hibriu no otow. ²¹ Woy tongod su nahallok ka mgo taag-udyamu to Magboboot, pigbogadyan din sikandan to kandan do no mgo anak. ²² No, pigsugu ni Parao ka mgo otow rin no kagi: “Itugdo now to Nilu no woig ka kara lukos no ogko-otow, di baagara now ka mgo boi.”

Pogko-otow ni Mosis

2 ¹ Kunto-on duon lukos no kapunungan ni Livi no nig-asawa to boi no songo kapunungan ni Livi, ² woy naboros ka boi woy nig-anak sikandin to lukos. To pogkakita to inoy no marodyow lagboy ka bato, inhoos din sood to tatou no buwan. ³ Di to konad igkohoos ka bato, nigpurut ka inoy to banban no pighimu no liang woy pigbulitan din to alkitran^d. Intagu din ka bato dio to liang, woy pigsabuk din ka liang dio to mgo tibogow to ilis to Nilu no woig. ⁴ Nigsasindog ka atoboi to bato to madmariu odyow to pogpitow ko nokoy ka ogkabadyaan to bato.

⁵ No, nighondio ka anak no boi ni Parao dio to Nilu odyow to pogparigus, woy songo nigduma ka mgo suguanon din dio to tikoba. Pigkita to anak to igbudyag ka liang dio to mgo tibogow, woy pigsugu din ka suguanon din odyow to pog-angoy to sikan. ⁶ Pigpuwasan din ka liang woy nakita rin ka bato. Nigsinogow ka bato woy noid-uan sikandin to boi. Kagi rin “Sagboka to mgo anak to Hibriu soini.”

^c1:15 Hibriu: Soini ka sagboka no ngaran to mgo otow to Israil su mgo kapunungan sikandan ni Ibir (Gen 10:24) Songo ngaran soini to kinagian dan.

^d2:3 Alkitran; moitom woy mamiak no igbulilit.

⁷No nig-inso ka atoboi to bato dio to anak ni Parao no kagi “Og-angoy a buwa koikow to sagboka no Hibriu no boi odyow to pogpasusu to bato?”

⁸Nigtabak ka boi to “No. Hondio ka.” Nighondio ka atoboi to bato, woy pig-angoy rin ka inoy to bato. ⁹Nignangon ka anak ni Parao dio to inoy to “Puruta nu soini no bato, woy pasusui a nu, woy ogbadyaran ku sikoikow.” No pigpurut to boi ka bato woy pigpasusu rin.

¹⁰To nalutas on ka bato pig-aap sikandin to inoy dio to anak no boi ni Parao, woy pigdromdom din no kandin on no anak ka bato. Pighingaranan to anak ni Parao ka bato ki Mosis, no kagi “Pigpurut ku sikandin ligkat to woig.”^e

Nigpanlaguy si Mosis pohondio to Midian

¹¹Songo allow to nigdakol on si Mosis, nighondio sikandin odyow to pogpitow to koot-otawan din duon to mabogat no tarabau ran. Nakakita sikandin to sagboka no otow to Ehiptu no nigbaras to sagboka no Hibriu, sagboka no otow ian no unawa ki Mosis. ¹²Agpas nigpamitow-pitow sikandin, woy waro otow no nakita rin. No, pighimatadyan ni Mosis ka otow to Ehiptu, woy inlobong din ka lawa dio to badyokbok.

¹³To pogkapawo, nighondio man do si Mosis woy nakita rin ka daruwa no Hibriu no nigpasun-suntutokoy. Pig-inso din ka nakasao no kagi “Manio to pigsuntut nu ka unawa koikow no Hibriu?”

¹⁴Nigtabak ka otow ki Mosis to “Hontow ka nigtinuru koikow to poghusoy woy to pogbo-ot kanami? Nigbabantak ka buwa to poghiimatoy kanak iing to poghiimatoy nu to matig Ehiptu?” No nahallok on si Mosis su nigdromdom sikandin to “Nataga naan sikandan to pighimu ku.”

¹⁵To nakarinog on si Parao to pighimu ni Mosis, nigbabantak sikandin to poghiimatoy kandin, di nigpanlaguy si Mosis, woy nighondio sikandin to tano to Midian. Nigpinnuu sikandin to longod to sagboka no sakuganan dio.

¹⁶No, duon taagpanubad to Midian no duon papitu no anak no boi. Nighondio ka mgo boi to sakuganan odyow to pogsakug to woig no og-inomon to mgo adyam to amoy ran. ¹⁷Duon mgo taagbantoy to karniru no niglopow no nigdogil to mgo boi porom, di nighasindog si Mosis woy pigpangabangan din ka mgo boi, woy pigpoinom din

^e2:10 Mosis inat ‘pigpurut’ to Hibriu no kinagian.

ka mgo karniru ran. ¹⁸To nig-uli ka mgo boi dio to amoy ran no si Riuil^fnig-inso ka amoy kandan no kagi “Manio to magaan kow naka-uli kuntoon?” ¹⁹Nigtabak sikandan to “Duon matig Ehiptu no nigpangabang kanami to mgo taagbantoy to karniru. Songo nigsakug sikandin woy pigpoinom din ka mgo karniru noy.” ²⁰Nig-inso ka amoy to mgo anak din no kagi “Hondoi naan sikandin? Manio to pig-ongkoran now? Hinggata now sikandin to pogkoon kai.”

²¹Nigbabali si Mosis to pog-ugpo duma ki Riuil, woy pigpaasawa ni Riuil ka anak din no si Sipora ki Mosis. ²²Nig-anak si Sipora to lukos, woy pighingaranan ni Mosis ka bato ki Girsom no kagi “Nohimu a no dagpu to loin no ugpaan.”^g

²³To naugoylugoy on no mgo tuid, namatoy ka igbudyag to Ehiptu. Nigsinogow woy nigdorokul ka mgo otow to Israil tongod to pogko-uripon dan, woy niglopow ka poid-u-hoid-u ran dio to Magboboot. ²⁴Nakarinog ka Magboboot to pogdorokul dan, woy pigdoromdom din ka kasabutan din ki Abraham, ki Isaak woy ki Jacob. ²⁵No nigpitow ka Magboboot to mgo otow to Israil woy nohimonow sikandin kandan.

Si Mosis woy ka Niglogdog no Kadyu

3¹No kuntoon, nigbantoy si Mosis to mgo karniru ni Jitro no anugang din no taagpanubad to Midian. Pig-aap ni Mosis ka mgo adyam pohondio to limang to han-hanawan dio to bubungan to Magboboot dio to Horib.^h ²To dio si Mosis, nakita rin ka diwata to Magboboot dio to hapuy to maapung no kadyu. Nakita ni Mosis no niglogdog ka kadyu, di waro matutung. ³No nigsumansuman si Mosis to “Oghondutun a odyow to pogpitow to soini no ogko-in-inuan no manio no kono ogkatutung ka kadyu.”

⁴To nakita to Magboboot no nigmarani on si Mosis to maapung no kadyu, nig-umow sikandin ligkat to taliwaro to kadyu no kagi “Mosis! Mosis!”

Nigtabak si Mosis to “Soini a.”

⁵Kagi pa to Magboboot to “Doka’g paragag to pogdani. Luunga nu ka hanig to paa nu. Hoo su ingkannugun ku no tano ka pigsasindogan nu.”

^f2:18 Riuil; songo pighingaranan sikandin ki Jitro.

^g2:22 Girsom; ogpasabut to ‘dagpu dio’.

^h3:1 Horib; songo pighingaranan no Sinai ka sikan no bubungan

⁶ Nigparagas ka Magboboot to “Sikanak ka Magboboot no Igbudyag to amoy nu. Koddi ka Magboboot ni Abraham, ni Isaak woy ni Jacob.” No pig-atangan ni Mosis ka langlanguan din su nahallok sikandin to pogpitow to Magboboot. ⁷ Nigkagi ka Magboboot to “Nakita ku ian ka koirapan to koot-otawan ku dio to Ehiptu. Nakarinog a to pogdorokul dan tongod to mgo otow no nigpogos kandan to pogtarabau. Woy nigmasakit ka goinawa ku tongod to kasakit dan. ⁸ Nokoy naan no nigpamanoug a odyow no ogpangabangan ku sikandan puun to mgo matig Ehiptu, no og-aapon ku sikandan ligkat dio pohondio to marodyow woy mau-ag no tano no tu-augan to gatas woy tonob no dakol. Ian ka tano no pig-ugpaan to mgo kapunganan ni Canaan, ni Hit, ni Amor, ni Piris, ni Hib woy ni Yibus. ⁹ Woy kuntoon noko-uma kanak ka pog-umow to mgo otow to Israil, woy nakita ku ka maroot no mgo pighimu to mgo matig Ehiptu kandan. ¹⁰ No Mosis, hondio ka. Ogpohipanawon ku sikoikow dio ki Parao odyow to pog-angoy to koot-otawan ku no Israil ligkat to Ehiptu.”

¹¹ Di nigtabak si Mosis to Magboboot no kagi “Hontow a, no sikanak ka oghondio ki Parao odyow to pog-angoy to mgo otow to Israil ligkat to Ehiptu?”

¹² Nigtabak ka Magboboot to “Ogdumaan ku sikoikow. Woy soini ka indanan ku koikow no sikanak ka nigpohipanow koikow: ko ogka-angoy nud on ka mgo otow ligkat to Ehiptu, ogsadyoon now ka Magboboot kai to soini no bubungan.”

¹³ Nig-inso pad si Mosis to “Monua ko oghondio a to mgo otow to Israil woy ognangonan ku sikandan no “Ka Magboboot no Igbudyag to mgo kabuybudyagan now ian ka nigpa-aap koddi kai to kaniu,” woy og-insoon a ran to “Hontow ka ngaran din?” Nokoy naan ka igkatabak ku kandan?”

¹⁴ Nignangon ka Magboboot ki Mosis to “Sikoddi ian Ka Duon. Nangoni nu ka mgo otow to Israil no ‘Ka Duon’ ian ka nigpa-aap kanak to kaniu.”

¹⁵ Songo nignangon ka Magboboot ki Mosis to “Nangoni nu ka mgo otow to Israil no ‘Ka Magboboot no Igbudyag to mgo kabuybudyagan now, ka Igbudyag ni Abraham, ni Isaak woy ni Jacob ian ka nigpa-aap koddi kai to kaniu.’ Sikan ian ka ngaran ku taman to katamanan, woy sikan ka ig-umow now kanak woy ka ig-umow to tibon mgo kapunganan now. ¹⁶ Hondio ka woy limura nu ka tibon mgo igbudyag to Israil woy nangoni nu sikandan no “Ka

Magboboot no Igbudyag to mgo kabuybudyagan now, ka Igbudyag ni Abraham, ni Isaak woy ni Jacob, ian ka nigpakita kanak no kagi: Nigbabantoy a kaniu woy nakita ku ka to pighimu kaniu dutun to Ehiptu. ¹⁷ Nangulibot a no og-aapon ku sikaniu ligkat to masakit no goinawa now dio to Ehiptu pohondio to tano no pig-ugpaan to mgo kapunganan ni Canaan, ni Hit, ni Amor, ni Piris, ni Hib woy ni Yibus, ian ka tano no tu-augan to gatas woy tonob no dakol.’ ¹⁸ Ogpamminogon ka to mgo igbudyag to Israil. No oghondio ka duma to mgo igbudyag to Israil dio to igbudyag to Ehiptu, woy ognangonan now sikandin to ‘Nigkagi kanami ka Magboboot no Igbudyag to mgo Hibriu no mgo otow. Pauguti koy ko oghipanow koy to tatou no allow no kariu-an dio to han-hanawan odyow no opkapanubad koy to mgo adyam dio to Magboboot no Igbudyag noy.’” ¹⁹ Nigkagi pad ka Magboboot ki Mosis to “Di nataga a no kono ogbabali ka igbudyag to Ehiptu ko kono ogpogoson sikandin pinabadyo to mabogbog no boad. ²⁰ No ogkawadyon ku ka boad ku odyow to poglampos to mgo matig Ehiptu pinabadyo to mgo ogko-in-inuan. Takas to sikan ogbabali ka igbudyag no oghipanow kow. ²¹ Woy ogpa-marodyowon ku ka goinawa to mgo matig Ehiptu kaniu odyow no ko oghipanow kow on, duon ogka-aap now. ²² Ogpamudyu ka kara boi kaniu to mgo songo baoy rin woy to mgo boi to lunggunan din odyow no ogkabogadyan sikandin to mgo kaaglagan no plata woy bulawan woy mgo kinabo no igkasau-ub to mgo anak now. No sikan ian no ogpaka-agow kow to mgo kaaglagan to mgo matig Ehiptu.”

Mgo Ogko-in-inuan no tuus

4 ¹ Nigtabak si Mosis to Magboboot no kagi “Monuon ku naan ko kono ogtuu sikandan kanak, woy kono ogpamminog kanak woy ogkagi sikandan to ‘Waro ka nakakita to Magboboot?’”

² No nig-inso ka Magboboot ki Mosis to “Nokoy ka sikan to boad nu?”

Nigtabak si Mosis to “Tukod.”

³ Kagi to Magboboot to “Itugdo nu to tano.” Intugdo ni Mosis ka tukod din dutun to tano, woy no uod ka tukod din, woy nigpallaguy si Mosis no nigpamariu to uod. ⁴ No nignangon ka Magboboot ki Mosis to “Puruta nu ka uod duon to ikug din.” No pigpurut ni Mosis ka uod woy man on no tukod din duon to boad din.

⁵Kagi to Magboboot to “Sikan ka oghimuon nu odyow no ogtuu sikandan no ka Magboboot, ka Igbudyag to mgo kabuybudyagan dan; ka Magboboot ni Abraham, ni Isaak woy ni Jacob ian ka nigpakita koikow.”

⁶No nignangon ka Magboboot to “Isuksuk nu ka boad nu to kinabo nu.” Insuksuk ni Mosis ka boad din to kinabo din, woy to pogpalibuwas din to boad din, nigmaputi on lagboy to ibung.

⁷Nigkagi pad ka Magboboot to “Ilibong nu isuksuk to kinabo nu.” No inlibong insuksuk ni Mosis ka boad din to kinabo din, woy to pogpalibuwas din man do to boad din, noulian on no unawa to duma no laplap din.

⁸Nigkagi ka Magboboot to “Ko kono ogtuu sikandan koikow to an-anadyan no ogko-in-inuan no tuus, naugpa ogtuu sikandan to igkarangob no tuus. ⁹Di, ko kono ogtuu sikandan to soini daruwa no tuus, woy ko kono ogpanalinga sikandan koikow, purut ka to woig ligkat to Nilu no woig, woy ibus-ug nu duon to tano. Oghohimu no langosa dio to tano ka woig no ogpuruton nu to Nilu.”

¹⁰Nignangon si Mosis to Magboboot no “Igbudyag ku, kono a ogkatou to pogkagi to marodyow. Amag nokani pad woy kuntoon no nig-a-aukuy ka kanak, sikan dod. Mananoy a to poglituk.”

¹¹Nigtabak ka Magboboot kandin no kagi “Hontow ka nighimu to bobo to otow? Hontow ka ogpakapo-omaw to otow woy ka ogpakapabongol to otow? Hontow ka nigbogoy no ogpakakita sikandin woy no ogpakabutud kandin? Kono buwa no sikoddi no Magboboot? ¹²No, hondio ka, woy ogbuligan ku sikoikow to pogkagi, woy og-anaron ku sikoikow ko nokoy ka ogkagion nu.”

¹³Di nigtabak si Mosis to “Igbudyag ku, marodyow pad poron ko loin no otow ka igpa-aap nu.”

¹⁴No nigmoinit ka goinawa to Magboboot ki Mosis, woy nignangon sikandin to “Monua ko si Aaron no kakoy nu no kapunganan ni Livi? Nataga a no marodyow sikandin to pogkagi. Nighipanow on sikandin odyow to pogtomu koikow, woy ogkarago sikandin to pogkakita rin koikow. ¹⁵Ogkagian nu sikandin, woy ogbogadyan nu sikandin to mgo kinagian; ogbuligan ku sikaniu daruwa to pogkagi, woy og-anaron ku sikaniu to oghimuon now. ¹⁶Si Aaron ka ogkagi to mgo otow liwan koikow, woy ogkounawa no sikandin ka bobo nu, woy ogkounawa no sikoikow ka Magboboot to kandin. ¹⁷Di og-aapon nu ka sikan no tukod no duon to boad nu, odyow no ogpakahimu ka to mgo ogko-in-inuan to sikan.”

Niglibong si Mosis to Ehiptu

¹⁸ No nig-uli si Mosis woy nigpamudyu sikandin to anugang din no si Jitro no kagi “Pauguti a nu to pog-uli to koot-otawan ku dio to Ehiptu odyow no ogkataga a ko manokal dod sikandan.”

Nigtabak si Jitro to “No. Marodyow no poghipanow.”

¹⁹ Sikan ian ka pighimu ni Mosis su nigkagi ka Magboboot kandin dio to Midian to “Libong ka to Ehiptu, su namatoy on ka tibon mgo otow no nigbabantak to poghimatoy koikow nokani.”

²⁰ No sikan ian no inpountud ni Mosis ka asawa rin woy ka mgo anak din to asnuⁱ, woy nighipanow sikandin pohondio to Ehiptu. Pig-aap din ka tukod to Magboboot dio to boad din.

²¹ Nigkagi ka Magboboot ki Mosis to “Kuntoon no pigbogadyan ku sikoikow to kabogbogan, ko oglopow ka to Ehiptu, ligdongi nu no igpakita nu ki Parao ka mgo ogko-in-inuan no in-anad ku koikow. Di igpamakogal ku ka goinawa rin odyow no kono ogbabali sikandin to pogpohipanow to mgo otow. ²² No nangoni nu pa si Parao to “Soini ka innangon to Magboboot; Panganoy no anak ku si Israil, ²³ woy pignangonan ku sikoikow no ogpohipanawon nu ka anak ku, odyow no ogsadyo sikandin kanak. Di waro ka mogbabali. No kuntoon oghimatadyan ku ka panganoy no anak nu.””

²⁴ To sagboka no lopowanan ni Mosis poghondio din to Ehiptu, pigtomu sikandin to Magboboot, woy oghimatadyan sikandin poron to Magboboot.^j ²⁵ Di nigpurut si Sipora no asawa ni Mosis to magang no batu no sumaom, woy pigtuli din ka anak din. Pigpoiran din ka paa ni Mosis to laplap no napurut din. Nignangon sikandin to “Sikoikow ka iglukos ku to langosa.”

²⁶ No waro himatadyi si Mosis to Magboboot. (Ka pogtuli ian ka inpasabut ni Sipora to pognangon din to “Iglukos to langosa.”)

²⁷ Nignangon ka Magboboot ki Aaron to “Hondio ka to han-hanawan odyow to pogtomu ki Mosis.” No pigtomu ni Aaron si Mosis dio to longod to bubungan to Magboboot, woy pigharokan ni Aaron si Mosis. ²⁸ No nignangon-nangon si Mosis ki Aaron to tibo no innangon to Magboboot kandin, woy to mgo tuus no ogko-in-inuan no insugu to Magboboot no oghimuon din.

²⁹ Pigpalimud ni Mosis woy ni Aaron ka tibon mgo igbudyag to Israil, ³⁰ woy nignangon-nangon si Aaron to tibo no innangon to

ⁱ4:20 Asnu; Un-unawa to kuddo ka asnu, di malmaintok, woy maadyat ka bulbul.

^j4:24 Naugpa su waro matuli ka anak din.

Magboboot ki Mosis. Songo pighimu rin ka mgo tuus to tangkaan to mgo otow, ³¹woy nigtuu sikandan. To pogkarinog dan no nohimonow ka Magboboot kandan, woy no nakita rin ka masakit no goinawa ran, nig-unduk sikandan no pigsadyo dan ka Magboboot.

Pigtimuan ka Ingkabaybadyari to mgo Otow to Israil

5¹Takas to sikan nanhondio si Mosis woy si Aaron ki Parao, woy nignangon sikandan to “Soini ka kinagian to Magboboot no Igbudyag to Israil kagi ‘Pohipanawa nu ka koot-otawan ku, odyow no ogsadyoon a ran dio to han-hanawan.’”

²Nigtabak si Parao to “Hontow ka Magboboot? Manio no ogbabali a to mgo sugu din no ogpohipanawon din ka Israil? Waro a mokoila to Magboboot woy kono ku ogpohipanawon ka Israil.”

³No nigkagi si Mosis to “Nigpakita kanami ka Magboboot no Igbudyag to mgo Hibriu. No pauguti koy nu to poghipanow to han-hanawan to kariu-an to tatou no allow to poghipanow odyow no ogpakapanubad koy to mgo tubad tongod to Magboboot no Igbudyag noy. Hoo su ko kono koy oghondio, naugpa ko ogkalogparan koy pinabadyo to mgo darau woy to minangadyawoy.”

⁴Di nigtabak ka igbudyag to Ehiptu kandan to “Mosis woy Aaron, manio to inpahagtong now ka mgo otow to tarabau ran? Libong kow on to tarabau now!” ⁵Kagi pa ni Parao to “Pitow kow, moon-ing on soini no mgo otow, woy inpahagtong now sikandan to tarabau ran.”

⁶To sikan dod no allow, nigsugu si Parao to mgo taagpogos to mgo uripon din no kagi: ⁷“Kono kow on ogbogoy to lagami to mgo otow ko oghimu sikandan to mgo tisa,^kpapamuruta now on sikandan to lagami ran. ⁸Di sikan dod ka karasigan to mgo tisa no igpohimu now kandan. Dokow ogsalini ka koon-ingan to mgo tisa. Poguon sikandan no mgo otow; nokoy naan no nigbabansagon sikandan to ‘oghondio koy odyow to pogpanubad to Magboboot noy.’ ⁹Pogosa now ka mgo otow to pogtarabau to mabmabogat odyow no konad ogpamminog sikandan to mgo ubat.”

¹⁰No niglibuwas ka mgo otow no taag-aap to mgo uripon, woy pignangonan dan ka mgo otow to “Soini ka kinagian ni Parao: kono ad on ogbogoy kaniu to lagami. ¹¹Hondio kow, woy ogpamurut kow to lagami ko agad hondo kow ogpakakita, di kono ogkasalanan ka tarabau now to poghimu to tisa.”

^k5:7 Ka tisa ian ka inat hollow block no nohimu ligkat to mamiak no basak no nautu iing to tadyaw.

¹²No nigsusuwoysuwoy ka mgo otow to tibon tano to Ehiptu, odyow to pogpamurut to lagami no ogkagamit dan. ¹³Ungud pogosa sikandan to mgo taagpogos to uripon no kagi ran “Hipongaa now ka tarabau now kara allow, unawa to nokani no duon lagami now.”

¹⁴Pigbarasan to mgo taagpogos to mgo uripon ni Parao ka mgo igbudyag no og-aap to mgo otow to Israil no kagi “Manio to waro kow nakaponga to tibon mgo tisa kuntoon woy gabii unawa to nokani?”

¹⁵No nighondio ka mgo otow to Israil no mgo taag-aap to otow dio to ki Parao no nig-a-aras no kagi “Manio to soini ka pighimu nu to mgo suguanon nu? ¹⁶Waro koy bogadyi to lagami di ungod koy ognangonan to ‘Himua now ka mgo tisa!’ Pigbarasan koy no mgo suguanon nu, di ka mgo otow now ian ka nakasao.”

¹⁷Nigtabak si Parao to “Poguoan kow no mgo otow, poguoan ian! Sikan ian no ungod kow ognangon to ‘Pauguti koy nu to poghondio to pogpanubad to Magboboot.’ ¹⁸Libong kow to tarabau now. Kono kow ogkabogadyan to lagami, di awoson no ogparagas kow to poghimu to tibon mgo tisa unawa to nokani.”

¹⁹No nakasabut on ka mgo otow to Israil no taag-aap to otow no dakol ka koirapan dan naan su pignangonan sikandan to ‘Kono ogkasalinan ka mgo tisa no oghimuon now kara allow.’

²⁰To pog-awo dan to tangkaan ni Parao, nakita ran si Mosis woy si Aaron no nigtatagad kandan, ²¹woy nigkagi sikandan to “Sagmanon kow woy oglogparan kow poron to Magboboot! Inat nasongotan on si Parao woy ka mgo hibatoon din to pogpitow kanta tongod kaniu. Pigbogadyan now sikandan to kampilan odyow to poghimatoy kanta!”

Nangulibot ka Magboboot to Pogpangabang

²²No niglibong si Mosis to Magboboot woy nigkagi to “Magboboot, manio to pig-aapan nu to koirapan ka soini no koot-otawan? Soini buwa ka tuud nu to pogpa-aap koddi? ²³Ligkat to poghondio ku ki Parao odyow to pogkagi pinabadyo to ngaran nu, pigtinuud din ka soini no koot-otawan to koirapan, woy waro nu pangabangi atag ka mgo otow nu.”

6¹No nigkagi ka Magboboot ki Mosis to “Kuntoon ogkitoon nu ko nokoy ka oghimuon ku ki Parao: tongod to mabogbog no boad ku, ogloka-an din ka koot-otawan ku; tongod to mabogbog no boad ku ogdogilon din sikandan to tano din.” ²Songo nigkagi

ka Magboboort ki Mosis to “Sikoddi ka Magboboort. ³ Nigpakita a ki Abraham, ki Isaak, woy ki Jacob no Mabogbog no Magboboort, di waro a nigpasabut kandan to ngaran ku no ‘Ka Duon’. ⁴ Songo nangulibot a kandan no igbogoy ku kandan ka tano to Canaan no pig-ugpaan dan unawa to dagpu. ⁵ Woy nokoy pad no narinog ku ka pogdorokul to mgo otow to Israil no pig-uripon to mgo matig Ehiptu, woy naromdoman ku ka kasabutan ku kandan. ⁶ No sikan ian nangoni nu ka mgo otow to Israil to “Sikoddi ka Magboboort, woy og-aapon ku sikaniu no og-ongkoran now ka inpatiang to mgo matig Ehiptu kaniu. Oglipuwasan ku sikaniu ligkat to pogko-uripon now kandan, woy oglokaton ku sikaniu pinabadyo to boad ku woy pinabadyo to mgo ogko-in-inuan no poglogpad. ⁷ Ogkohimu kow no koot-otawan ku woy ogkohimu a no Magboboort now. No sikan ian ogkaroromdom now no sikanak ian ka Magboboort no ‘Duon’ no nig-aap kaniu ligkat to mabogat no inpatiang to mgo matig Ehiptu. ⁸ Woy og-aapon ku sikaniu to tano no inpangulibot ku ki Abraham, ki Isaak woy ki Jacob pinabadyo to boad ku. Sikaniu ka ogpakatagtuun to sikan su igbogoy ku kaniu. Sikoddi ian ka Magboboort.”

⁹ Nignangon si Mosis to soini tibo dio to mgo otow to Israil, di waro sikandan nigpamminog tongod su nigtawad on ka goinawa ran, woy tongod to ingkabaybadyari ran.

¹⁰ No nignangon ka Magboboort ki Mosis to ¹¹ “Hondio ka, woy nangoni nu si Parao no igbudyag to Ehiptu no ogpohipanawon din ka mgo otow to Israil ligkat to tano din.”

¹² Di nigtabak si Mosis to Magboboort no kagi “Ko kono ogpamminog ka mgo otow to Israil kanak, ian pad si Parao? Hoo su kono a ogkatou to pogkagi to marodyow.”

Ka mgo Minuna ni Mosis woy ni Aaron

¹³ No kuntoon soini ka nangnangonon moitongod ki Mosis woy ki Aaron no ian ka mgo otow no pignangonan to Magboboort moitongod to mgo otow to Israil woy moitongod ki Parao no igbudyag to Ehiptu. Sikandan ian ka pigsugu to Magboboort to pog-aap to mgo otow to Israil ligkat to Ehiptu.

¹⁴ Soini ka mgo igbudyag to mgo lunggunan to Israil. Ka mgo anak ni Riubin no panganoy ni Israil ian si Hanok, si Pallu, si Hisron woy si Karmi. Sikandan ian ka mgo lunggunan no puun ki Riubin.

¹⁵ Ka mgo anak ni Simion ian si Yimuil, si Yamin, si Ohad, si Yakin, si Soar woy si Saul (no anak to boi no matig Canaan). Sikan ian ka mgo lunggunan no puun ki Simion.

¹⁶ Soini ka mgo anak ni Livi sumao to mgo sulat; si Girson, si Kohat woy si Mirari. 137 no tuid ian ka pannuigon ni Livi to namatoy sikandin.

¹⁷ Ka mgo anak ni Girson no no mgo igbudyag to mgo lunggunan ian si Libni woy si Simii.

¹⁸ Ka mgo anak ni Kohat ian si Amram, si Is-har, si Hibron woy si Ussiil. 133 no tuid ian ka kaadyatan to ukul ni Kohat.

¹⁹ Ka mgo anak ni Mirari ian si Mali woy si Musi. Sikan ian ka mgo lunggunan no nigpuun ki Livi, sumao to mgo sulat.

²⁰ Nig-asawa si Amram ki Yokibid no atoboi to amoy rin. Ian mgo anak dan si Aaron woy si Mosis. 137 no tuid ian ka kaadyatan to ukul ni Amram.

²¹ Ka mgo anak no lukos ni Is-har ian si Kora, si Nipig woy si Sikri.

²² Ka mgo anak no lukos ni Ussiil ian si Misail, si Ilsapan woy si Sitri.

²³ Nig-asawa si Aaron ki Ilisiba, no atoboi ni Nason no anak ni Amminadab, woy ka mgo anak dan ian si Nadab, si Abihu, si Iliasar woy si Itamar.

²⁴ Ka mgo anak no lukos ni Kora ian si Assir, si Ilkana woy si Abiasap. Nohimu sikandan no mgo igbudyag to mgo kapunungan ni Kora. ²⁵ Nig-asawa si Iliasar no anak ni Aaron to sagboka no anak ni Putiil, woy naka-anak ka boi ki Pinihas. Sikandan ian ka mgo igbudyag to mgo kapunungan ni Livi pinabadyo to mgo lunggunan dan.

²⁶ No sikandan ian ka Aaron woy ka Mosis no pignangonan to Magboboot no kagi “Aapa now ka mgo otow to Israil ligkat to Ehiptu pinabadyo to mgo puntuk dan.” ²⁷ Sikandan ian ka nigkagi ki Parao no igbudyag to Ehiptu moitongod to pog-aap to mgo otow to Israil ligkat to Ehiptu. Waro loin no Mosis woy Aaron ka pighingaranan kai.

Si Aaron ka Ogkagi liwan ki Mosis

²⁸ No, to pogkagi to Magboboot ki Mosis dio to Ehiptu,

²⁹ nignangon sikandin to “Sikoddi ian ka Magboboot. Nangoni nu si Parao no igbudyag to Ehiptu to agad nokoy no ignangon ku koikow.”

³⁰Di nigtabak si Mosis to Magboboot to “Kono a ogkatou to pogkagi. No manio no ogpamminog si Parao koddi?”

7¹No nigkagi ka Magboboot ki Mosis to “Pitow ka. To pogdoromdom ni Parao oghimuon ku sikoikow no unawa to Magboboot, woy ogkohimu no si Aaron ian ka taagnangon nu.²Ignangon nu ka agad nokoy no igsugu ku koikow, woy ognangon si Aaron ki Parao to pogpohipanow to mgo otow to Israil ligkat to pandatuan din.³Di igpamakogal ku ka goinawa ni Parao woy agad ko oghimu a to moon-ing no mgo ogko-in-inuan to Ehiptu,⁴kono ogpamminog sikandin koikow. No ogsampoongan ku ka Ehiptu to boad ku, woy pinabadyo to mgo mokohinhinaat no mgo himu to pogboboot, ogpalibuwason ku ka mgo puntuk ku, ka koot-otawan ku no ian ka mgo otow to Israil.⁵Woy ogkataga ka mgo otow to Ehiptu no sikoddi ian ka Magboboot ko ogkawadyon ku ka boad ku to pog-atu to Ehiptu woy ogpalibuwason ku ka mgo otow to Israil.”

⁶Pighimu ni Mosis woy ni Aaron ka tibo no insugu to Magboboot kandan. 780 on ka pannuigon ni Mosis, woy 83 ka pannuigon ni Aaron to nig-aaukuy sikandan ki Parao.

Nohimu no Uod ka Tukod ni Aaron

⁸Nignangon ka Magboboot ki Mosis woy ki Aaron to,⁹“Ko ognangon si Parao kaniu to ‘Himu kow to ogko-in-inuan,’ nangoni nu si Aaron to ‘Puruta nu ka tukod nu woy itugdo nu dio to tangkaan ni Parao,’ woy ogkohimu no uod ka tukod.”

¹⁰No nighondio si Mosis woy si Aaron ki Parao, woy pighimu ran ka innangon to Magboboot kandan. Intugdo ni Aaron ka tukod din dio to tangkaan ni Parao woy to mgo hibatoon din, woy no uod ka tukod.

¹¹No pigpo-umow ni Parao ka banggiitan no mgo otow woy mgo bailan, woy nanhimu sikandan to sikan dod no mgo himuon pinabadyo to kandan no hinoos no katagaanan:¹²Kara sagboka kandan nigtugdo to tukod din, woy no uod ka mgo tukod. Di, pig-aboong do to tukod ni Aaron ka mgo tukod dan.¹³Di nigmakogal ka goinawa ni Parao, woy waro sikandin nigpamminog kandan, unawa to taan no innangon to Magboboot.

Ka Iglogpad no Langosa

¹⁴No nigkagi ka Magboboot ki Mosis to, “Waro nighalin ka goinawa ni Parao; niglial sikandin to pogpohipanow to mgo otow.

¹⁵Hondio ka ki Parao to masoom to poghondio din to woig. Tagari nu sikandin to tikoba to Nilu, woy aapa nu ka tukod no no uod. ¹⁶No nangoni nu sikandin to ‘Inpa-aap a to Magboboot no Igbudyag to mgo Hibriu odyow to pognangon koikow to: Pohipanawa nu ka mgo otow ku odyow no ogpakasadyo sikandan koddi to han-hanawan. Di taman kuntoon waro ka mogpanalinga. ¹⁷No soini ka kinagian to Magboboot kagi: pinabadyo to soini ogkataga ka no sikoddi ian ka Magboboot. Oglamposan ku ka woig to Nilu to soini no tukod to boad ku, woy ogkohimu no langosa ka woig. ¹⁸Ogkamatoy ka mgo ngaap to Nilu, woy ogmasongot on ka woig; konad ogpoko-inom to woig ka mgo otow to Ehiptu.”

¹⁹Nigkagi ka Magboboot ki Mosis to ‘Nangoni nu si Aaron to ‘Aapa nu ka tukod nu woy ikawoy nu to ampow to mgo woig to Ehiptu, ampow to mgo bougan woy mgo tu-auganan, mgo lanow woy mgo linsobuk’ woy ogkohimu no langosa ka woig. Ogdalong no duon langosa to tibon Ehiptu agad dio to mgo sakoru no kadyu woy to mgo kuron.”

²⁰Pighimu ni Mosis woy ni Aaron ka tibo no innangon to Magboboot. Pigkawoy ni Aaron ka tukod dio to tangkaan ni Parao woy to mgo hibatoon din, woy piglamposan din ka woig to Nilu, woy nohimu no langosa ka tibon woig. ²¹Namatoy ka tibon mgo ngaap to woig no Nilu, woy nigmasongot ka woig taman to waro otow no ogpoko-inom to woig. Duon langosa to tibon Ehiptu. ²²Di songo sikan dod ka pighimu to mgo bailan to Ehiptu pinabadyo to kandan no hinoos no katagaanan, woy nigmakogal ka goinawa ni Parao; waro sikandin nigpanalinga ki Mosis woy ki Aaron, iing to innangon to Magboboot. ²³No, nig-uli sikandin dio to dakol no baoy rin, woy waro do duon mogsagman. ²⁴Nigkukutkut ka mgo otow to Ehiptu dio to ilis to woig to Nilu odyow to pogsakug to woig no og-inomon dan, hoo su kono dan ogko-inom ka woig no nigtu-aug. ²⁵Nigligad ka papitu no allow takas to piglamposan to Magboboot ka Nilu.

Ka Iglogpad no mgo Bakbak

8¹No nigkagi ka Magboboot ki Mosis to “Hondio kow ki Parao woy nangoni nu sikandin to ‘Soini ka kinagian to Magboboot: Pohipanawa nu ka koot-otawan ku odyow no ogpakasadyo sikandan koddi. ²Ko ogligal ka to pogpohipanow kandan, ogpa-aap a to igkabaybadyari now no mgo bakbak dio to tibon tano now.

³Ogmarasig lagboy ka mgo bakbak to Nilu no woig. Ogmanggakap sikandan pohondio to dakol no baoy nu, pohondio to sinabong nu woy to hibatanan nu. Ogmamanoik sikandan to mgo baoy to mgo hibatoon nu woy mgo otow nu, woy ogsood sikandan to mgo hilutuanan now woy dio to mgo komotanan now to pan.

⁴Ogmamanoik ka mgo bakbak koikow woy to tibon mgo otow nu woy mgo hibatoon nu.”

⁵No nigkagi ka Magboboot ki Mosis to “Nangoni nu si Aaron no kagi ‘Ikawoy nu ka tukod no duon to boad nu dio to ampow to tibon mgo bougan woy mgo tu-auganan to woig woy mgo linsobuk woy pamagakapa nu ka mgo bakbak to tibon tano to Ehiptu.”

⁶No pigkawoy ni Aaron ka boad din ampow to mgo woig to Ehiptu, woy nigmanggakap ka mgo bakbak no nigtangkap to tibon tano. ⁷Di songo sikan dod ka pighimu to mgo bailan to Ehiptu pinabadyo to kandan no hinoos no katagaan; songo inpagakap dan ka mgo bakbak to tano to Ehiptu.

⁸Pigpo-umow ni Parao si Mosis woy si Aaron woy nignangon sikandin to “Panubad kow duon to Magboboot odyow no og-awoon din ka soini no mgo bakbak ligkat koddi woy to mgo otow ku, woy ogbabali a no oghipanow ka koot-otawan nu odyow to pogtubad duon to Magboboot.”

⁹Nignangon si Mosis ki Parao to “Igbogoy ku koikow ka katongod to pognangon ko kon-u a ogpanubad tongod koikow woy to mgo hibatoon nu woy to koot-otawan nu odyow no og-awo ka soini no mgo bakbak kaniu woy to mgo baoy now. Ka mgo bakbak naan do no duon to Nilu no woig ka ogkagaat.”

¹⁰Nigtabak si Parao to “Asoom.” No nigkagi si Mosis to “No. Sikan ka ogdatong, odyow no ogkataga kow no waro Igbudyag no unawa to Magboboot. ¹¹Ogka-awo ka mgo bakbak dio’t koikow woy to mgo hibatoon nu woy mgo otow nu woy to mgo baoy now; ka mgo bakbak naan do to Nilu ka ogkagaat.”

¹²Takas to nig-ongkod si Mosis woy si Aaron ki Parao, nig-umow si Mosis to Magboboot tongod to mgo bakbak no inpagakap din ki Parao. ¹³No pighimu to Magboboot ka inbudyu ni Mosis. Nammatoy ka mgo bakbak dio to mgo baoy, dio to mgo lama woy dio to mgo kamot. ¹⁴Pigpanlimud dan ka mgo bakbak, woy nigmasongot lagboy ka tibon mgo ugpaan tongod to mgo bakbak no namou.

¹⁵Di to pogpitow ni Parao no madmarodyow on ka pog-ugpo dan,

nigmakogal ka goinawa rin, woy waro sikandin nigpamminog ki Mosis woy ki Aaron unawa to taan no innangon to Magboboot.

Ka Iglopad no mgo Kosu

¹⁶No nigkagi ka Magboboot ki Mosis to “Nangoni nu si Aaron to ‘Ikadyow nu ka tukod nu woy lamposi nu ka atigbun to tano’ woy ogdatong no ogkohimu no mgo kosu ka atigbun to tibon tano to Ehiptu.”

¹⁷Sikan ian ka pighimu ran, woy to pogkadyow ni Aaron to tukod din no duon to boad din woy poglampos din to atigbun to tano, nanlopow ka mgo kosu duon to mgo otow woy mgo adyam. Nohimu no kosu ka tibon atigbun to tano to Ehiptu. ¹⁸Di to pog-ol-oog to mgo bailan to poghimu to kosu pinabadyo to kandan no hinoos no katagaanan, waro sikandan nakahimu. Woy duon ka mgo kosu to mgo otow woy mgo adyam. ¹⁹Nigkagi ka mgo bailan ki Parao to “Soini ian ka tinuru to Magboboot.” Di makogal ka goinawa ni Parao woy waro sikandin nigpamminog unawa to taan no innangon to Magboboot.

Ka Iglopad no mgo Langow

²⁰No nigkagi ka Magboboot ki Mosis to “Soom soom ka onow to masoom, woy tangko ka ki Parao to poghondio din to woig woy nangoni nu sikandin to ‘Soini ka kinagian to Magboboot: Pohipanawa nu ka koot-otawan ku odyow no ogpakasadyo sikandan koddi. ²¹Ko kono nu ogpohipanawon ka koot-otawan ku ogpa-aap a to mgo langow no ogbukaas dio to koikow woy dio to mgo hibatoon nu woy dio to koot-otawan nu woy dio to mgo baoy now. Ogkaponu to mgo langow ka mgo baoy to mgo otow to Ehiptu, woy agad ka mgo lama ran. ²²Di to sikan no allow, ogloinon ku ka oghimuon ku to tano to Gosin no ian ka ugpaan to koot-otawan ku; kono ogbukaas ka mgo langow dio, odyow no ogkataga kow no sikoddi ian ka Magboboot no kai to soini no tano. ²³Ogloinon ku ka oghimuon ku to mgo otow ku woy to koikow no mgo otow. Ogdalong ka soini no ogko-in-inuan no tuus asoom no allow.”

²⁴Woy sikan ian ka pighimu to Magboboot. Nigdatong ka mgo langow no nigbukaas no makopal woy nansood sikandan to dakol no baoy ni Parao, woy dio to mgo baoy to mgo hibatoon din, woy nigmaroot ka tibon tano to Ehiptu tongod to mgo langow. ²⁵No pigpo-umow ni Parao si Mosis woy si Aaron woy nigkagi sikandin

to “Hondio kow woy ogpanubad kow to Magboboot kai to soini no tano.”

²⁶Di nigtabak si Mosis to “Kono ogkohimu sikan. Ogkarootan ka mgo matig Ehiptu to mgo tubad noy to Magboboot. Woy ko maroot ka pogpitow ran to mgo tubad noy, naugpa ko ogbatuon koy ran. ²⁷Awoson no oghipanow koy to tatou no allow pohondio to han-hanawan odyow to pogtubad duon to Magboboot noy, unawa to innangon din kanami.”

²⁸Nigkagi si Parao to “Ogbabali a no oghondio kow odyow to pogtubad duon to Magboboot, di dokow oghondio to mariu lagboy. No kuntoon panubari a nu.”

²⁹Nigtabak si Mosis to “Ko oglibuwas a to tangkaan nu, ogpanubad a to Magboboot, woy asoom no allow ogka-awo ka mgo langow ki Parao woy to mgo hibatoon din woy mgo otow rin. Di ligdongi nu no kono man do oggawoy si Parao pinabadyo to pogbaabag to mgo otow to poghipanow odyow to pogpanubad duon to Magboboot.”

³⁰No nig-ongkod si Mosis ki Parao, woy nigpanubad sikandin to Magboboot, ³¹woy pighimu to Magboboot ka inbudyu ni Mosis: nig-awo ka mgo langow dio to ki Parao woy to mgo hibatoon din woy mgo otow rin; waro sagboka no langow no nagaat. ³²Di to sikan dod no allow pigmakogal ni Parao ka goinawa rin, woy waro sikandin mogbabali to pogpohipanow to mgo otow.

Ka Logpad dio to mgo Adyam

9¹No nignangon ka Magboboot ki Mosis to “Hondio ka ki Parao woy nangoni nu sikandin to ‘Soini ka kinagian to Magboboot no Igbudyag to mgo Hibriu “Pohipanawa nu ka koot-otawan ku, odyow no ogpakasadyo sikandan koddi.” ²Ko ogligal ka to pogpohipanow kandan no ogparagas ka to poggon-gon kandan, ³ogpa-aap ka Magboboot to mokohinhinaat no darau dio to mgo adyam now to kamot; dio to mgo kuddo, mgo asnu, mgo kamil, mgo baka, mgo karniru woy mgo kambing now. ⁴Di ogloinon to Magboboot ka mgo adyam to mgo otow to Israil woy to mgo adyam to mgo otow to Ehiptu, odyow no waro adyam no ogkamatoy dio to mgo otow to Israil.”

⁵Nig-aam ka Magboboot to allow woy nignangon sikandin to “Asoom no allow, sikan ka oghimuon to Magboboot to tano now.”

⁶No sikan ian to pogkapawo pighimu to Magboboot ka innangon din; nammatoy ka tibon mgo adyam to mgo otow to Ehiptu, di

waro agad sagboka no adyam no namatoy dio to mgo otow to Israil. ⁷Pigpohipanow ni Parao ka mgo hibatoon din odyow to pogsobsob, woy nakita ran no waro agad sagboka no adyam to mgo otow to Israil no namatoy. Di agad to sikan, waro nigmoumol ka goinawa rin, woy waro din pohipanawa ka mgo otow.

Ka Iglogpad no mgo Buutut

⁸No niggagi ka Magboboot ki Mosis woy ki Aaron to “Purut kow to songo komu no abu ligkat to sinalsaan woy igsawod ni Mosis sikan pohondio to ampow dio to tangkaan ni Parao. ⁹Ogkohimu no abug sikan to ampow to tibon tano to Ehiptu woy ogkahalanan ka tibon mgo otow woy mgo adyam to mgo buutut dio to tibon tano.”

¹⁰No sikan ian nigpurut sikandan to abu ligkat to sinalsaan woy nigtangko sikandan ki Parao. Insawod ni Mosis ka abu pohondio to ampow, woy nahalanan ka mgo otow woy mgo adyam to mgo buutut. ¹¹Waro nakatangko ka mgo bailan ki Mosis tongod to mgo buutut no duon to kandan woy to tibon mgo otow to Ehiptu. ¹²Di pigmakogal to Magboboot ka goinawa ni Parao, woy waro sikandin nigpamminog ki Mosis woy ki Aaron, unawa to innangon to Magboboot ki Mosis.

Ka Iglogpad no Uran no Ice

¹³No nignangon ka Magboboot ki Mosis to “Onow ka to masoom-soom pad, woy tangko ka ki Parao woy nangoni nu sikandin to, ‘Soini ka kinagian to Magboboot no Igbudyag to mgo Hibriu; Pohipanawa nu ka koot-otawan ku odyow no ogpakasadyo sikandan koddi, ¹⁴su ko kono ka, ogpa-aap a kuntoon to tibon kabogbogan to mgo igbadyadbadyad ku dio to koikow woy dio to mgo hibatoon nu woy koot-otawan nu, odyow no ogkataga ka no waro agad hontow no unawa koddi to tibon kalibutan. ¹⁵Hoo su ko pigbobootan ku pa porom, pigkadyow kud on ka boad ku woy piglogparan kud sikaniu pinabadyo to darau no ogpaka-awo kaniu to ampow to tano. ¹⁶Di pigpasasindog ku sikoikow to soini ro no pugtian; odyow to pogpakita to kabogbogan ku, woy odyow no ogkohingaranan a to tibon kalibutan. ¹⁷Nig-atu ka pad to koot-otawan ku, woy waro nu pohipanawa sikandan. ¹⁸No sikan ian iing to soini no kasooman asoom ogpa-aap a to dorooti no uran no ice.¹Waro agad kon-u no

¹9:18 Ka ice ian ka woig no nigkotok tongod to kaagsil; unawaro to duon to 'ice buco'.

duon uran iing to sikan no no-uug to Ehiptu ligkat to binunsuran taman kuntoon. ¹⁹ Sugu ka kuntoon odyow no ogpokohoung ka tibon mgo adyam woy ka tibo no duon to kamot. Hoo su, agad nokoy no adyam woy agad hontow no otow no waro moghoung no duon dod to kamot ogkouranan to ice, woy ogkammato y sikandan.

²⁰ Duon mgo hibatoon ni Parao no nahallok to kinagian to Magboboot woy nig-aggas nigpohoung sikandan to mgo uripon woy mgo adyam dan. ²¹ Di duon duma pad no mgo hibatoon ni Parao no waro mogpanalinga to kinagian to Magboboot, woy pigbaagad dan do ka mgo uripon woy mgo adyam dan no nagaat to kamot.

²² No nigkagi ka Magboboot ki Mosis to “Ikawoy nu ka boad nu pohondio to langit odyow no og-uran to ice to tibon Ehiptu; dio to mgo otow, mgo adyam woy agad nokoy no nigtubu to mgo kamot to Ehiptu.” ²³ To pogkawoy ni Mosis to tukod din no nigtinuru to langit, nigpa-aap ka Magboboot to lugung woy uran no ice woy kilat no nigdoog to tano. No sikan ian pigpo-uranaan to Magboboot ka tano to Ehiptu to ice; ²⁴ no-uug ka ice, woy niglibong-libong nigkiblat-kiblat ka kilat. Sikan ian ka dorooti no daldaa-ot no nabadyaan to tano to Ehiptu ligkat to binunsuran to sikan no nasud. ²⁵ To tibon Ehiptu pigpambarasan ka tibo no duon to kamot; iglagkos ka mgo otow woy mgo adyam; pigpambarasan ka tibo no nigtubu to mgo kamot, woy na-awaan to mgo doun ka kara kadyu. ²⁶ Ka sagboka ro no longod no waro ma-urani to ice ian ka tano to Gosin no ian ka pig-ugpaan to mgo otow to Israil.

²⁷ No pigpo-umow ni Parao si Mosis woy si Aaron. Kagi rin to “Nakasao a kuntoon. Ka Magboboot naan ka matuarong woy sikoddi woy ka mgo otow ku ian ka nakasao. ²⁸ Panubad ka to Magboboot, su litos on kanami ka lugung woy uran no ice. Ogpohipanawon ku sikaniu; kono kow on ogpogoson to pog-ugpo kai.”

²⁹ Nigtabak si Mosis to “Ko ogpakalibuwas ad on to lunsud, ogkawadyon ku ka mgo boad ku no ogpanubad a to Magboboot. Oghagtong ka lugung woy warad on ice no ogko-uug, odyow no ogkataga ka no ka Magboboot ian ka tagtuun to tibon kalibutan. ³⁰ Di nataga a no agad kuntoon waro kahallok nu woy to mgo hibatoon nu dio to Magboboot.”

³¹ (Noubus na-awo ka ladyagon woy ka mgo pinamua no ligkatan to linu, su nigbogas on ka ladyagon woy nigpamulak ka pinamua no

ligkatan to linu.^{m 32} Di waro na-awo ka trigu woy ka sintino su moori sikan to pogbogas.)

³³No nig-ongkod si Mosis ki Parao, woy niglibuwas sikandin to lunsud. Pigkawoy rin ka mgo boad din pohondio to Magboboot woy nighagtong ka lugung woy ka uran no ice, woy warad on uran no no-uug to tano. ³⁴To pogkakita ni Parao no warad on ka uran woy ka ice woy ka lugung, nighutuk man do sikandin to pogsao. Pigmakogal din woy to mgo hibatoon din ka mgo goinawa ran. ³⁵No sikan ian no makogal ka goinawa ni Parao woy waro din pohipanawa ka mgo otow to Israil, unawa to innangon to Magboboot pinabadyo ki Mosis.

Ka Iglogpad no mgo Taangas

10¹No nigkagi ka Magboboot ki Mosis to “Hondio kow ki Parao, su pigpamakogal ku ka goinawa rin woy ka goinawa to mgo hibatoon din odyow no ogkohimu ku ka soini no mgo ogko-in-inuan no mgo indanan to taliwaro kandan ²woy odyow no ogkanangonan now ka mgo anak now woy mgo apu now ko monu kabuut ka pog-atu ku to mgo otow to Ehiptu, woy ko nokoy ka mgo ogko-in-inuan no pighimu taliwaro kandan, woy odyow no ogkataga kow no sikanak ian ka Magboboot.”

³No sikan ian nighondio si Mosis woy si Aaron ki Parao woy pignangonan dan sikandin to “Soini ka kinagian to Magboboot no Igbudyag to mgo Hibriu ‘Monu kaugoy no ogligalon nu ka pogpasaad-saad to tangkaan ku? Pohipanawa nu ka koot-otawan ku odyow no ogpakasadyo sikandan koddii. ⁴Ko ogligal ka to pogpohipanow kandan, ogpa-aap a to mgo taangas to pandatuan nu asoom no allow. ⁵Ogtangkap sikandan taman to konad ogkakitaan ka tano. Og-ubuson dan to pogkoon ka maintok no nagaat koikow takas to uran no ice, iglagkos ka tibon mgo kadyu no nigtulin to mgo kamot now. ⁶Ogpakaponu sikandan to mgo baoy nu woy to mgo baoy to mgo hibatoon nu woy to tibon mgo otow to Ehiptu. Waro iing duon no nakita to mgo amoy now woy mgo kabuybudyagan now ligkat to binunsuran to pog-ugpo dan to soini no tano taman kuntoon.” No, nig-iniug si Mosis woy pig-ongkoran din si Parao.

⁷Nignangon ka mgo hibatoon ni Parao kandin to “Monu kaugoy pad no ogkalit-agan ki to sikan no otow? Pohipanawa nud on ka mgo otow odyow no ogpakasadyo sikandan to Magboboot no Igbudyag dan. Waro nu pad buwa gorama no naguak on ka tibon Ehiptu?”

^m9:31 Ka linu ian ka songo pinu no manggad

⁸No inpa-angoy hutuk si Mosis woy si Aaron dio to tangkaan ni Parao. Kagi ni Parao to “Hondio kow. Sadyo kow to Magboboot no Igbudyag now. Di hontow ian ka ogduma?”

⁹Nigtabak si Mosis to “Oghondio koy дума to mgo budyag woy mgo bato pad, to mgo anak noy no mgo lukos woy boi, woy дума to mgo adyam noy, su oghimu koy to pogkoonan tongod to Magboboot.”

¹⁰Nigkagi si Parao to “Ogkabaligan kow to Magboboot ko ogparumaon ku kaniu ka mgo boi woy mgo bato! Kono igkohoos no maroot naan ka nabantaan now. ¹¹Aw kow duon! Ka mgo lukos do ka ogpakahipanow woy sikandan ka ogpakasadyo to Magboboot su sikan ka pigpamudyu now koddi.” No pigdogil dan si Mosis woy si Aaron to tangkaan ni Parao.

¹²No nigkagi ka Magboboot ki Mosis to “Ikawoy nu ka boad nu ampow to Ehiptu odyow no ogkalibuung ka mgo taangas duon to tano woy og-ubuson dan to pogkoon ka tibo no nigtubu to mgo kamot no nasamo pad to uran no ice.”

¹³No sikan ian pigkawoy ni Mosis ka tukod din ampow to Ehiptu, woy nigpakaamag ka Magboboot to kaamag puun to ogsilaan dio to tano to tibon allow woy tibon maukilom. To pogkapawo, na-aap to kaamag ka mgo taangas; ¹⁴nigmantangkap sikandan to tibon Ehiptu, woy nig-ugpo to tibon tano no marasig sikandan. Waro allow nokani no duon iing to sikan no karasigan to taangas, woy waro allow no ogdatong no ogkohutuk sikan. ¹⁵Nigtangkap sikandan to tibon tano taman to moitom pitawon ka tibo. Noubus dan to pogkoon ka tibo no nagaat takas to uran no ice - ian ka tibo no nigtubu to mgo kamot woy ka tibon mgo bogas to kadyu. Waro moilow no nagaat to kadyu woy pinamua to tibon pandatuan to Ehiptu.

¹⁶Nig-agpas inpo-umow ni Parao si Mosis woy si Aaron, woy kagi rin to “Nakasao a to Magboboot no Igbudyag now, woy to kaniu.

¹⁷No pasaylua a now hutuk, woy panubari now ka Magboboot no Igbudyag now odyow no og-awoon din ka soini no koirapan no ogpakahimatoy.”

¹⁸Nigligkat si Mosis ki Parao, woy pigpanubaran din ka Magboboot. ¹⁹Inpalibong to Magboboot ka kaamag no no maagbot no kaamag no nigpuun to ogsaopan, no nanladyap ka mgo taangas woy na-aap sikandan pohondio to Dagat no Malaab. Waro sagboka no taangas no nagaat to tano to Ehiptu. ²⁰Di inpamakogal man do to

Magboboot ka goinawa ni Parao, woy waro din pohipanawa ka mgo otow to Israil.

Ka Iglogpad no Dooman

²¹No nigkagi ka Magboboot ki Mosis to “Ikawoy nu ka boad nu pohondio to langit odyow no ogdooman ka tibon Ehiptu; dooman no ogkagoram.”

²²No pigkawoy ni Mosis ka boad din pohondio to langit, woy niglopow ka dooman to tibon Ehiptu sood to tatou no allow. ²³Waro nigmakitkito-oy ka mgo otow, woy waro mokohip-hipanow sood to tatou no allow. Di duon kaadyag to mgo otow to Israil to mgo pig-ugpaan dan.

²⁴No inpo-umow ni Parao si Mosis no kagi rin, “Hondio kow, woy ogsadyoon now ka Magboboot. Agad ka mgo boi woy mgo anak now ogpakaruma kaniu; di igaat now ro ka mgo adyam now.”

²⁵Di nigtabak si Mosis to “Awos no duon igpanubad noy no tutungonon dio to Magboboot no Igbudyag noy. ²⁶Awos no ogparumaon noy ka mgo adyam noy. Waro sagboka no ogkoongkoran noy su oggamiton noy ka duma to pogsadyo noy to Magboboot. Woy koy on ogkataga ko nokoy ka oggamiton noy to pogsadyo to Magboboot ko dio koy on.”

²⁷Di waro mogbabali si Parao to pogpohipanow kandan su pigpamakogal to Magboboot ka goinawa rin. ²⁸Nignangon si Parao ki Mosis to “Awo ka kai to tangkaan ku! Ligdongi nu no kono ka oghutuk ogtangko koddi! Ka allow no ogpakakita ka to langlanguan ku ian ka allow to kamatadyon nu.”

²⁹Nigtabak si Mosis “No, iing to innangon nu, kono a oghutuk ogtangko koikow.”

Ka Logpad dio to mgo Panganoy

11 ¹No kuntoon nigkagi ka Magboboot ki Mosis to “Ogpa-aap a to sagboka pad no logpad dio to ki Parao woy dio to Ehiptu. Takas to sikan, ogbabali si Parao to poghipanow now ligkat kai, woy to sikan no allow, ogdogilon din sikaniu tibo ian. ²Nangoni nu ka mgo otow to Israil no tibo sikandan no mgo lukos woy mgo boi ogpamudyu poron duon to mgo songo baoy ran odyow no ogkabogadyan sikandan to mgo hinimu no plata woy bulawan.”

³(Pigpamarodyow to Magboboot ka goinawa to mgo otow to Ehiptu dio to mgo otow to Israil. Agad pad ko si Mosis, songo

marodyow ka goinawa to mgo hibatoon ni Parao woy to mgo otow to Ehiptu kandin.)

⁴No sikan ian nigkagi si Mosis ki Parao to “Soini ka kinagian to Magboboot: ‘To liwaro to kaukiloman, ogpanloudyon ku ka tibon Ehiptu. ⁵Ogpanghimatadyan ku ka kara panganoy no lukos to tibon Ehiptu, ligkat to panganoy no anak no lukos ni Parao no nigpinnuu to pinnuan to igbudyag, pohondio to panganoy no anak no lukos to uripon no boi no niggagaling to harina. Songo iglagkos ka tibon mgo panganoy to mgo adyam. ⁶Maagbot ka pandaawit no ogkarinog to tibon Ehiptu - maagbot pad to narinog agad kon-u, woy no ogkarinog agad kon-u no allow no ogdatong. ⁷Di dio to mgo otow to Israil, waro agad asu no ogtoy-ow dio to otow woy ko adyam.’ No sikan ian no ogkataga ka no kono'n unawa ka pogpitow to Magboboot to Israil woy to Ehiptu. ⁸Ogdani koddi ka soini tibon mgo hibatoon nu no ogpang-unduk sikandan no ognangon ‘Hipanow ka duma to tibon mgo otow no nigsundul koikow!’ No takas to sikan oghipanow a.” No to moinit pad so goinawa rin nig-ongkod si Mosis ki Parao.

⁹Nignangon on ka Magboboot ki Mosis to “Kono ogpamminog si Parao koikow, odyow no ogmarasigon ku ka mgo oghimuon ku no ogko-in-inuan to Ehiptu.” ¹⁰Pighimu ni Mosis woy ni Aaron ka tibo to soi no mgo ogko-in-inuan to tangkaan ni Parao, di pigpamakogal to Magboboot ka goinawa ni Parao, woy waro pad sikandin nigpohipanow to koot-otawan to Israil ligkat to pandatuan din.

Ka Pogliad to Magboboot

12 ¹Nigkagi ka Magboboot ki Mosis woy ki Aaron dio to Ehiptu to ²“Soini no buwan ogkohimu no an-anadyan no buwan to kaniu, ian ka ogdoromdomon now no an-anadyan no buwan to tuid now. ³Nangoni now ka tibon koot-otawan to Israil no to igkasampuu no allow to soini no buwan, ogpurut ka kara lukos to sagboka no nati no karniru tongod to lunggunan din. Sagboka no karniru to kara lunggunan ian. ⁴Ko mointok ka lunggunan no kono ogpoko-ubus sikandan to tibo to nati no karniru, og-agpot sikandan dio to songo baoy, takas to nigdoromdom ko pila ka mgo otow. Ogdoromdomon now ko monu karakol no karniru ka ogkoubus now sumao ko pila ka ogkagoon to kara otow to lunggunan. ⁵Ka og-aamon now no mgo adyam ian ka mgo lukosan no songo tuid pad ka kabudyagi ran. Waro maroot to sikan no mgo adyam woy ogpakapurut kow to agad karniru woy ko kambing. ⁶Udyamua now ka sikan no mgo

adyam taman to igkasampuu woy hop-at no allow to buwan, no ogdorongan ka mgo koot-otawan to Israil to poghimatoy to mgo adyam to poglinob on to allow. ⁷No, ogpurut sikandan to langosa woy ogpoiran dan ka mgo sungkaug to gomawan woy dio to baabag to gomawan to mgo baoy no pigkoonan dan to mgo karniru. ⁸Sikan dod no maukilom ogkoonon dan ka sapu no ogtuugon dan dio to hapuy, duma to mgo mapoit no mgo aanag woy igsoro dan to pan no waro igpatulin. ⁹Dokow ogkoon to sapu no moilow pad, woy ko pigsabawan, di ogtuugon now to hapuy; iglagkos ka uu, ka mgo paa woy ka mgo tagu to lawa. ¹⁰Dokow pohipawoi ka samo; ko duon ogkasamo, tutunga now ro. ¹¹Ko ogkoon kow, lokisa now ka kinabo now woy hoona now, akobiⁿnow ka mgo paa now, woy songo tutukod kow.^oAgpas kow to pogkoon. Oghohingaranan soini no Pogligad to Magboboot.

¹²“To sikan dod no maukilom, ogpanloudyon ku ka mgo ugpaan to tibon Ehiptu, woy ogpanghimatadyan ku ka kara panganoy iglagkos ka mgo otow woy mgo adyam woy ogbobootan ku ka tibon mgo tinuuhan no mgo inotowotow to Ehiptu. Sikoddi ian ka Magboboot.

¹³Ka langosa ian ka indanan now to mgo baoy now; woy ko ogkitoon ku ka langosa ogligaran ku sikaniu. Waro ogdatong no igkaguak no logpad kaniu ko oglogparan ku ka Ehiptu.

¹⁴“Ogdoromdomon now ka soini no allow; to ogdatong no mgo kapunganan taman to katamanan, oghutukon now ka soini no igparoromdom no pogkoonan to Magboboot. ¹⁵To papitu no allow ogkoon kow to pan no waro igpatulin. To an-anadyan no allow, og-awoon now ka igpatulin no duon to mgo baoy now. Hoo su ko agad hontow ka ogkoon to pan no duon igpatulin sood to papitu no allow to pogkoonan now, dokow on ogdoromdoma sikandin no kapunganan ni Israil. ¹⁶To an-anadyan no allow, ogmanlimud-limud kow odyow to pogsadyo koddi, woy to igkapitu no allow oghutuk kow. To sikan no mgo allow, dokow ogtarabau ko konon ka poghilutu to ogkoonon now ro. Sikan do taman ka tarabau now.

¹⁷“Himua now ka pogkoonan to Pan no Waro Igpatulin kara tuid su sikan ian ka allow no pig-aap ku ka tibon mgo puntuk kaniu ligkat to Ehiptu. Himua now to soini no allow taman to katamanan.

¹⁸Ian to an-anadyan no buwan to tuid ogkoon kow to pan no waro

ⁿ12:11 Aakob: ka akob ian ka mgo sandalyas ko bakya.

^o12:11 Ka soini no mgo pamaagi to pogkoon ogpasabut no nohimpod panoy sikandan to poghipanow.

igpatulin ligkat to pogkatangkob to igko-14 no allow taman to pogkatangkob to igko-21 no allow. ¹⁹ Sood to sikan no papitu no allow, waro poron igpatulin no ogkakita dio to mgo baoy now. Woy agad hontow no ogkoon to agad nokoy no duon igpatulin dogila now sikandin to koot-otawan to Israil, agad ko dagpu no otow sikandin woy ko lumad. ²⁰ Dokow ogkoon to koononon no duon igpatulin. Agad hondo kow og-ugpo, ogkoon kow ro to pan no waro igpatulin.”

²¹ No inpo-umow ni Mosis ka tibon mgo igbudyag to Israil, woy pignangonan din sikandan to “Agpas kow to poghondio woy aama now ka mgo adyam now to mgo lunggunan now, woy himatadyi now ka nati no karniru to Pogligad. ²² Purut kow to mgo sugpang to hisupu^wwoy ihalit now to langosa no duon to lipung woy poiri now ka baabag woy ka daruwa no sungkaug to gomawan to langosa. Waro sagboka kaniu no oglibuwas to gomawan to baoy rin taman to ogkapawo. ²³ Ko ogpanloudyon to Magboboot ka tano odyow to poghimatoy to mgo otow to Ehiptu, ogkitoon din ka langosa duon to baabag woy to mgo sungkaug to gomawan, woy ogligaran din ka sikan no gomawan, woy kono ogbabali sikandin no ogsood to mgo baoy now ka taaglogpad no diwata odyow to poghimatoy kaniu.

²⁴ “Babalia now ka soini no mgo tugun-tugun ku iing to udlin no ogpalingaat taman to katamanan dio to kaniu woy dio to mgo kapunganan now. ²⁵ Ko ogsood kow to tano no igbogoy to Magboboot kaniu sumao to inpangulibot din, babalia now ka soini no himuonon. ²⁶ Woy ko og-inso ka mgo anak now to ‘Nokoy ka kaogsaran to soini no himuon ta?’ ²⁷ no nangoni now sikandan to ‘Soini ka Pogligad no igpanubad to Magboboot, su pigligaran din ka mgo baoy to mgo otow to Israil dio to Ehiptu woy noid-uan din ka mgo lunggunan noy to pigpanghimatadyan din ka mgo matig Ehiptu.”

No to pogkarinog to mgo otow to soini no kinagian nigmang-unduk sikandan no nigsadyo to Magboboot. ²⁸ Nigbabali ka mgo otow to Israil to tibo no insugu to Magboboot ki Mosis woy ki Aaron.

²⁹ To liwaro to kaukiloman, pigpanghimatadyan to Magboboot ka kara panganoy dio to Ehiptu, ligkat to panganoy ni Parao no ian ka igbudyag to Ehiptu pohondio to panganoy to nabilanggu no otow dio to kalabusuan, inlagkos ka tibon mgo panganoy no mgo adyam. ³⁰ Nang-onow si Parao woy ka mgo hibatoon din woy ka tibon mgo matig Ehiptu liwaro to kaukiloman, woy maagbot lagboy

P12:22 Hisupu; songo maupot no pinamua no maapung to doun.

ka pogsinogow to pandaawit dio to Ehiptu su waro lunggunan no waro namatadyi.

Ka Poglibuwas to Ehiptu

³¹ Taliwaro to kaukiloman pigpo-umow ni Parao si Mosis woy si Aaron, woy pignangonan din sikandan to “Onow kow! Ongkori now ka mgo koot-otawan ku, sikaniu woy ka mgo otow to Israil! Hondio kow woy sadyo kow to Magboboot unawa to inpamudyu now. ³² Aapa now ka mgo adyam now iing to innangon now, woy awo kow. Songo boligi a now.”

³³ Pigbaghotan to mgo otow to Ehiptu ka mgo otow to Israil to pogpaagpas to pog-ongkod to tano dan. Kagi ran to “Ko kono kow og-agpas naugpa ko ogkoubus koy ogkammatoy!”

³⁴ No nig-aap ka mgo otow to in-oug no harina ran no waro pad ma-amuti to patulin, woy pigtiang dan dio to mgo komotanan no pigtongos to mgo kinabo dan.

³⁵ Nigbabali ka mgo otow to Israil to mgo insugu ni Mosis no nigpamudyu sikandan to mgo otow to Ehiptu to mgo hinimu no bulawan woy plata woy mgo kinabo. ³⁶ Pigpamarodyow to Magboboot ka goinawa to mgo matig Ehiptu dio to mgo otow to Israil, woy pigbogadyan dan to inpamudyu dan. No sikan ian no inat pig-agawan ka mgo matig Ehiptu to mgo kaaglagan dan.

³⁷ Nighipanow ka mgo otow to Israil ligkat to Ramisis pohondio to Sukot. Mgo 600,000 ka mgo lukos no nighipanow no waro insool ka mgo boi woy ka mgo bato. ³⁸ Moon-ing ka mgo duma ran no konon mgo otow to Israil, woy dagdakol lagboy ka mgo puntuk to mgo adyam dan iglagkos ka mgo baka woy mgo karniru woy mgo kambing. ³⁹ Nihilutu sikandan to pan no waro igpatulin pinabadyo to in-oug no harina no pig-aap dan ligkat to Ehiptu. Waro igpatulin to in-oug dan su pigdogil sikandan to Ehiptu, woy waro sikandan makaliwak to poghimu to mgo ogkoonon dan.

⁴⁰ No kuntoon naka-ugpo ka mgo otow to Israil dio to Ehiptu sood to 430 no tuid. ⁴¹ Pogkapinga to 430 no tuid no waro matimui woy waro masalini to agad sagboka no allow, nanlibuwas ka tibon mgo puntuk to koot-otawan to Magboboot dio to Ehiptu. ⁴² No taman to katamanan, ogtanud-tanud ka mgo otow to Israil to sikan no maukilom kara tuid no og-iloon dan ka Magboboot su nigtanud-tanud ka Magboboot to sikan no maukilom odyow to pog-aap kandan libuwas to Ehiptu.

Mgo Udlin to Pogkoonan to Pogligad

⁴³ Nigkagi ka Magboboot ki Mosis woy ki Aaron to “Soini ka mgo udlin to Pogkoonan to Pogligad: Waro otow to loin no koot-otawan ka ogpakakoon to sikan. ⁴⁴ Ko duon uripon no pigboli now, ogpakakoon sikandin ko natuli now on sikandin, ⁴⁵ di ka otow no tigbal do nig-agpot kaniu woy ka otow no nig-inallow ro kaniu kono ogpakakoon sikandan to pogkoonan.

⁴⁶ “Ogkoonon now ka pogkoonan to sood to sagboka ro no baoy; dokow og-aapa ka sapu dio to libuwasan to baoy. Dokow oggopua ka agad sagboka no bokog. ⁴⁷ Ogkoonon to tibon koot-otawan to Israil ka soini no pogkoonan.

⁴⁸ “Ko duon otow no konon otow to Israil no nig-ugpo to taliwaro kaniu no ogkoiniat to pog-agpot to Pogkoonan to Pogligad to Magboboot, woy on ko igpatuli din ka tibon mgo lukos to lunggunan din, no ogpakakoon sikandin unawa’t lumad sikandin. Di waro lukos no waro matuli ka ogpakakoon to sikan. ⁴⁹ Unawarod ka udlin agad ko dio to lumad woy ko dio to otow to loin no koot-otawan no nig-ugpo to taliwaro now.”

⁵⁰ Pigbabali to mgo otow to Israil ka tibo no insugu to Magboboot ki Mosis woy ki Aaron. ⁵¹ Woy to sikan ian no allow pig-aap to Magboboot ka mgo otow to Israil ligkat to Ehiptu pinabadyo to mgo puntuk dan.

Pogsapinpin to mgo Panganoy

13 ¹ No nigkagi ka Magboboot ki Mosis to ² “Loin-a now koddi ka kara panganoy no lukos kaniu. Sikoddi ka tagtuun to an-anadyan no oglibuwas to kara aanakan taliwaro to mgo otow to Israil, agad ko otow woy ko adyam.

³ No nigkagi si Mosis to koot-otawan to “Doromdoma now ka soini no allow, no ian ka allow no nakalibuwas kow ligkat to pogko-uripon now dio to Ehiptu, su pig-aap kow to Magboboot ligkat to sikan pinabadyo to mabogbog no boad din. Dokow ogkoon to agad nokoy no duon igpatulin. ⁴ Indani now no buwan to Abib^qkuntoon to poghipanow now. ⁵ Ko og-aapon kow on to Magboboot dio to tano to mgo otow to Canaan, to Hit, to Amor, to Hib woy to Yibus - ian ka tano no inpangulibot din to mgo kabuybudyagan now no puunan to

^q13:4 Abib; loin ka mgo ngaran to mgo otow dongan to mgo buwan. Ka Abib duon to Marso pohondio to Abril kuntoon.

gatas woy tonob no dakol - ko oglopow ka soini no buwan no Abib, ogdoromdomon now ka soini no himuon; ⁶ sood to papitu no allow ogkoon kow ro to pan no pighimu to waro igpatulin, woy to igkapitu no allow, oglimudlimud kow odyow to pogsadyo to Magboboot.

⁷ Koon kow ro to pan no waro igpatulin sood to sikan no papitu no allow; kono ogkakitaan poron ka igpatulin taliwaro to kaniu woy dokow ogbabali no duon igpatulin to mgo ugpaanan now.

⁸ To sikan no allow, nangoni nu ka anak nu no lukos to 'Soini ka pighimu ku su nigdoromdom a to pighimu to Magboboot koddi to nigligkat a to Ehiptu.' ⁹ Sikan no himuon now ogkohimu no unawa to tuus no duon to boad now, woy unawa to pogpadoromdom no duon to bukod now no ungod kow ogmanang-nangonoy to kinagian to Magboboot poron. Hoo su pig-aap kow to Magboboot ligkat to Ehiptu pinabadyo to mabogbog no boad din. ¹⁰ Ogbabalion now ka soini no himuon to litos no allow kara tuid.

¹¹ "Takas to pog-aap to Magboboot kaniu dio to tano to mgo otow to Canaan, woy ko ogkabogadyan kow on to sikan unawa to inpangulibot din kaniu woy to mgo kabuybudyagan now, ¹² ibogoy now to Magboboot ka kara an-anadyan no anak to kara aanakan. Ka panganoy no lukos to tibon mgo adyam now ian tagtuun ka Magboboot. ¹³ Ulii now ka kara panganoy no asnu pinabadyo to pogtubad to sagboka no nati no karniru, di ko kono now i-uli sikan, bunggu-a now ka liog to asnu. Ulii now ka kara panganoy no anak now no lukos.

¹⁴ "To ogdatong no mgo allow ko og-inso ka anak nu to 'Nokoy ka kaogsaran to soini?' tabaka nu sikandin to 'Pig-aap koy to Magboboot ligkat to pogko-uripon dio to Ehiptu pinabadyo to mabogbog no boad din. ¹⁵ To waro mogbabali si Parao to pogpohipanow kanami su makogal ka goinawa rin, pighimatadyan to Magboboot ka kara panganoy no lukos to Ehiptu, iglagkos ka mgo otow woy mgo adyam. No sikan ian ka pugtian no igbogoy ku to Magboboot ka kara panganoy no lukos to kara aanakan, woy og-ulian ku ka kara panganoy no anak no lukos ku.' ¹⁶ Woy og-unawa to duon tuus to boad nu woy no duon indanan to bukod nu no igpadoromdom koikow no pig-aap kow to Magboboot ligkat to Ehiptu pinabadyo to boad din no mabogbog."

Pogtalipag to Dagat

¹⁷To nigbabali on si Parao to pogpohipanow to mgo otow, waro sikandan aapa to Magboboot to daan no nigbadyo to tano to Filistihanon no mgo otow, agad no madmarani sikan. Hoo su nigdoromdom ka Magboboot to “Naugpa ko og-atuan sikandan dio to daan, ogkohutuk ka goinawa ran no oglibong sikandan to Ehiptu.”

¹⁸No sikan ian pigtuon sikandan to Magboboot to daan to han-hanawan pohondio to Malaab no Dagat. Pig-aap to mgo otow to Israil ka mgo panganiban dan to nigligkat sikandan to Ehiptu.

¹⁹Pig-aap ni Mosis ka mgo bokog ni Jose, su pigpapangulibotan ni Jose ka mgo suod din no mgo anak ni Israil no nignangon sikandin to “Ian ian ogkapangabangan kow to Magboboot, woy ko oglopow ka sikan no allow, aapa now ka mgo bokog ku puun to soini no ugpaan.”

²⁰To no-ongkoran dan on ka Sukot, inpamos-ok dan ka mgo tukbung dan duon to Itam to ilis to han-hanawan. ²¹Kara allow, nighun-a ka Magboboot kandan pinabadyo to suwoy no gapun odyow to pogtuon kandan to daan, woy kara maukilom nig-unawa sikandin to suwoy no hapuy no ogbat-ow kandan, odyow no ogpokohipanow sikandan agad ko allow woy ko maukilom. ²²Waro nig-awo ka suwoy no gapun to allow woy waro nig-awo ka suwoy no hapuy to maukilom, di nigpalinggaat dio to tangkaan to mgo otow.

14 ¹No nigkagi ka Magboboot ki Mosis to, ²“Nangoni nu ka mgo otow to Israil to pogliku no oglibong sikandan to Pi-hahiroto^rtaliwaro to Migdol woy to dagat, woy igpamos-ok dan ka mgo tukbung dan dio marani to dagat no ogtangko to Baal-sipon.

³Ogdoromdomon ni Parao no ‘Naagak ka mgo otow to Israil no niglouglog dio no nalibutan sikandan to han-hanawan.’ ⁴Woy igpamakogal ku ka goinawa ni Parao odyow no oggaponon din sikandan. Di ogkasadyo a now tongod to oghimuon ku ki Parao woy to mgo sundau rin, woy ogkataga ka mgo otow to Ehiptu no sikoddi ian ka Magboboot.” No sikan ian ka pighimu to mgo otow to Israil.

⁵To nakarinog on si Parao no igbudyag to Ehiptu no nan-awo on ka mgo otow, nohutuk ka goinawa rin duma to mgo hibatoon din no kagi ran to “Nokoy soini no pighimu ta? Piglokaan ta ka mgo otow to Israil woy kuntoon konad ogtarabau sikandan kanta!”

^r14:2 Pi-hahiroto; ngaran to sagboka no longod no ogpasabut to ‘tugdaan to mgo tingkob.’

⁶No inpohipod din ka unturanan din, woy pigparuma rin ka mgo sundau rin. ⁷Pigparuma rin ka hon-om no gatus no maddodyow no mgo unturanan, woy ka duma pad no mgo unturanan, woy ka tibon mgo igbudyag no nig-aap to sikan. ⁸Pigpamakogal to Magboboot ka goinawa ni Parao no igbudyag to Ehiptu odyow no oggaponon din ka mgo otow to Israil. Di nighipanow ka mgo otow to Israil to waro pogkahallok. ⁹Nigsundul ka mgo matig Ehiptu (ian ka tibon mgo kuddo ni Parao, woy mgo unturanan woy mgo sundau no nig-untud to mgo kuddo woy ka duma pad no mgo sundau) woy nasaponan dan ka mgo otow to Israil dio to pigpangpos-okan dan to mgo tukbung dan marani to dagat to Pi-hahiroto no nigtangko to Baal-sipon. ¹⁰To nigmarani on si Parao, nigtonggak ka mgo otow to Israil, woy nakita ran ka mgo matig Ehiptu no niggapon kandan. Nohinhinaan sikandan woy nigdorokul sikandan duon to Magboboot.

¹¹Nigkagi sikandan ki Mosis to “Naan nu buwa no waro mgo lobonganan duon to Ehiptu no sikan ian no pig-aap koy nu kai to han-hanawan odyow to pogkamatoy? Nokoy soini no pighimu nu kanami to pog-aap kanami ligkat to Ehiptu? ¹²Waro ka mogdoromdom no pignangonan noy sikoikow dio to Ehiptu to ‘Dokag ulingol kanami; baagara koy nu to pogtarabau to mgo matig Ehiptu?’ Marodyow pad nasi ko nigparagas koy to pogtarabau dio to Ehiptu odyow kono koy poron ogkamatoy kai to han-hanawan.”

¹³Nigtabak si Mosis to mgo otow no kagi “Dokow ogkahallok. Po-onong-onong kow ro woy pipitow kow to kalipuwasan no ogligkat to Magboboot kuntoon no allow. Kono now ogkitoon oghutuk ka mgo matig Ehiptu no ogkitoon now kuntoon no allow. ¹⁴Ka Magboboot ian ka ogpangabang kaniu; sikaniu ogpo-onong-onong kow ro atag.”

¹⁵No nigkagi ka Magboboot ki Mosis to “Manio to pig-umow a nu ro? Nangoni nu ka mgo otow to Israil to pogparagas. ¹⁶Puruta nu ka tukod nu woy ikawoy nu ka boad nu ampow to dagat odyow to pogbaad to woig to daruwa odyow no ogpakabadyo ka mgo otow to Israil taliwaro to dagat no ogdiok sikandan to mammara no tano. ¹⁷Ogpamakogaon ku ka goinawa to mgo matig Ehiptu odyow no oggaponon kow ran, woy ogkasadyo a tongod ki Parao woy to mgo sundau rin woy mgo unturanan din woy mgo sundau no nig-untud to mgo kuddo. ¹⁸Ogkataga on ka mgo matig Ehiptu no sikoddi ian ka Magboboot to allow no ogkasadyo a tongod ki Parao woy to kandin no mgo unturanan woy to mgo sundau no nig-untud to mgo kuddo.”

¹⁹Nighalin ka diwata to Magboboot ligkat to poghipanow rin to tangkaan to mgo otow to Israil, no nighondio sikandin to koiniugan dan. Songo nighalin ka suwoy no gapun ligkat to tangkaan dan pohondio to poka ran, ²⁰no nigpataliwaro to mgo kasundauhan to mgo matig Ehiptu woy to mgo otow to Israil. To tibon kaukiloman nigbogoy ka gapun to dooman dio to limang woy kaadyag dio to limang, odyow kono ogpokogdani ka daruwa no koot-otawan to tibon kaukiloman. ²¹No pigkawoy ni Mosis ka boad din to ampow to dagat, woy to sikan no tibon maukilom pigpo-awo to Magboboot ka dagat pinabadyo to maagbot no kaamag ligkat to ogsilaan woy no duon mammara no tano. Nabaad ka mgo woig, ²²woy nigtalipag ka mgo otow to Israil to dagat pinabadyo to mammara no tano no duon aad to woig dio to kawatan dan woy dio to gibang dan. ²³Niggapon ka mgo matig Ehiptu, lagkos to tibon mgo kuddo ni Parao, mgo unturanan woy mgo otow no nig-untud to kuddo dio to dagat no nigsundul to mgo otow to Israil. ²⁴To magaan ogsilo ka allow, nigpantow ka Magboboot ligkat to suwoy to hapuy woy gapun duon to kasundauhan to Ehiptu, woy pigsasow rin sikandan. ²⁵Pigpapanloko din ka mgo ligid to mgo unturanan dan odyow no maugon ka pogparagas dan. Nigmonang-nangonoy ka mgo otow to Ehiptu to “Ogpanlaguy ki ligkat to mgo otow to Israil! Pig-atuan to Magboboot ka Ehiptu woy pigbuligan din sikandan.”

²⁶No nigkagi ka Magboboot ki Mosis to “Ikawoy nu ka boad nu ampow to dagat odyow no oglibong ka mgo woig no ogkaop-lopan ka mgo otow to Ehiptu lagkos to mgo unturanan dan woy to mgo nig-untud to kuddo.”

²⁷Nigkawoy si Mosis to boad din ampow to dagat, woy to pogsilo to allow niglibong ka dagat to nalongoran din. Nigpanlaguy porom ka mgo matig Ehiptu di pigpanlonod sikandan to Magboboot duon to dagat. ²⁸Nigtu-aug ka woig no niglibong no naop-lop ka mgo unturanan woy ka mgo nig-untud to kuddo. Nanundul ka tibon mgo sundau ni Parao to mgo otow to Israil pohondio to dagat. Waro agad sagboka kandan no nalipuwas. ²⁹Di nigtalipag ka mgo otow to Israil to dagat pinabadyo to mammara no tano no duon aad no woig dio to kawatan dan woy dio to gibang dan. ³⁰To sikan no allow, pigpangabangan to Magboboot ka mgo otow to Israil ligkat to mgo boad to mgo otow to Ehiptu, woy nakita to mgo otow to Israil ka mgo lawa to nammatoy no mgo otow to Ehiptu no nanakaoy-ang dio to ilis to dagat. ³¹Woy to pogkakita to mgo otow to Israil to sikan no

dakol no kabogbogan to Magboboot no inpakita rin to pog-atu rin to mgo matig Ehiptu, nanahalok ka mgo otow to Magboboot, woy nigtuu sikandan kandin woy to suguanon din no si Mosis.

Ka Uranda ni Mosis woy ni Miriam

15¹ No nigmang-uranda si Mosis woy ka mgo otow to Israil to soini no uranda duon to Magboboot:

“Og-uranda a duon to Magboboot su litos no ogsadyoon sikandin. Inpandogsang din ka kuddo woy ka nig-untud to sikan dio to dagat.

² Ka Magboboot ian ka dadyagang ku woy ka og-urandahon ku. Nohimu sikandin no kalipuwasan ku.

Sikandin ka Igbudyag ku woy ogsadyoon ku sikandin.

Sikandin ka Igbudyag to amoy ku woy ogparakoon ku sikandin.

³ Bagani ka Magboboot; pighingaranan sikandin no Magboboot.

⁴ Inpandogsang din ka mgo unturanan ni Parao woy ka kasundauhan din dio to dagat.

Naonod on ka in-aam no mgo igbudyag to mgo sundau ni Parao dio to Dagat no Malaab.

⁵ Nabunbunan sikandan to maraom no mgo woig; nig-anlod sikandan iing to batu no nighondio to diraom.

⁶ Ogkasadyo ka kabogbogan to kawanan no boad nu Magboboot. Ka kawanan no boad nu, Magboboot, ian ka niglupot to usig.

⁷ Pinabadyo to dakol no kabogbogan nu, intugdo nud ka mgo nig-atu koikow.

Pino-uang nu ka kabou nu no niglogdog woy nasilaban sikandan iing to dagami.

⁸ Pinabadyo to hiup to irong nu, nalimud ka mgo woig.

Nigsasindog ka woig no mabolbol no nig-unawa to aad.

Nigkotok ka mgo maraom no woig dio to taliwaro to dagat.

⁹ Nigbabantak ka usig to pogkagi rin to “Oggaponon ku sikandan woy ogsaponon ku sikandan. Ogbaadbaaron ku ka mgo og-agawon ku; woy ogkaantoy a to mgo ogkapurut ku. Oghuabut a to kumpulan ku woy ogpanghimatadyan kud sikandan.”

¹⁰ Di pighiup nu ka goinawa nu, woy pigbunbunan sikandan to dagat.

Nighondio sikandan to diraom unawa’t palibatu duon to mabogbog no mgo woig.

¹¹ Hontow duon to mgo pigtuuhan to mgo otow no unawa koikow Magboboot?

Hontow ka unawa koikow mabogat-bogat no in-oog, no ogkohinhinaatan to kabogbogan no ogpokohimu to mgo ogkabol-boongan?

¹² Pigkawoy nu ka kawanan no boad nu, woy pig-aboong sikandan to tano.

¹³ Pinabadyo to dakol no goinawa nu no kono ogkatampod, ogtuonon nu ka pig-ulian no koot-otawan nu.

Pinabadyo to kabogbogan nu, og-aapon nu sikandan pohondio to in-oog nu no ugpaan.

¹⁴ Ogdinog ka duma no mgo koot-otawan, woy ogpangol-koon sikandan, ogkahallok lagboy ka mgo otow to Filistia.

¹⁵ Ogpangombu-kombuan ka mgo datu to Idom, woy ogpangol-koon ka mgo igbudyag to Moab, woy ogmamanlaguy ka mgo otow to Canaan, ¹⁶su ogkakahallok woy ogko-ook-ook sikandan.

Pinabadyo to kabogbogan to bakaawan nu, Magboboot, og-onong-onong sikandan unawa to batu taman to ogkaligaran on sikandan to koot-otawan nu, Magboboot, ian ka koot-otawan no pigboli nu.

¹⁷ Og-aapon nu sikandan woy igpos-ok nu sikandan duon to bubungan to tugun-tugun nu, ian Magboboot ka longod no pighimu nu woy no ingkannugun odyow no og-ugpaan nu.

¹⁸ Koikow ka ogboot, Magboboot, taman to katamanan.”

¹⁹ To nighondio ka mgo kuddo woy mgo unturanaan woy mgo otow ni Parao dio to dagat, inpalibong to Magboboot ka mgo woig odyow no ogkabunbunan sikandan, di nanghipanow ka mgo otow to Israil taliwaro to dagat duon to mammara no tano.

²⁰ Si Miriam ian ka atoboi ni Aaron woy taagtagna sikandin. No nigpurut si Miriam to paragingonon din no tamburin, woy nigmansundul ka tibon mgo boi kandin no songo nigsadyow no nig-aap to mgo tamburin.

²¹ Nig-uranda si Miriam kandan to: “Uranda kow duon to Magboboot su litos no ogsadyoon sikandin. Inpandogsang din ka kuddo woy ka nig-untud to sikan dio to dagat.”^s

^s15:21 Inat pasabut soini no nig-uranda si Miriam to tibon uranda ni Mosis no duon to birsikulu 1 taman to 18, su unawaro ka binunsuran.

Ka mgo Woig to Mara woy Elim

²²No takas to sikan, pig-aap ni Mosis ka koot-otawan to Israil ligkat to Malaab no Dagat pohondio to han-hanawan to Sur. Sood to tatou no allow nighip-hipanow sikandan duon to han-hanawan no waro woig no nakita ran.

²³To poglopow ran to Mara, waro sikandan nokoinom to woig no duon su mapoit. (Sikan ian ka kaogsaran to Mara; mapoit.) ²⁴No nig-aaras ka mgo otow duon ki Mosis no kagi “Nokoy naan ka og-inomon ta?”

²⁵No nig-umow si Mosis to Magboboot, woy nigpakita ka Magboboot kandin to sagboka no kadyu. Intugdo ni Mosis ka kadyu duon to woig, woy nigmoomis ka woig. No nigbogoy ka Magboboot kandan to udlin, woy pig-ol-oogan din sikandan dio. ²⁶Kagi rin to “Ko ogdorodyow kow to pogpamminog to lagong to Magboboot no Igbudyag now, woy ko oghimu kow ko nokoy ka litos to kandin no pogpitow, ko ogpanalinga kow to tibon mgo sugu din woy ogbabali kow to tibon mgo udlin din, kono ku ogpa-aapan sikaniu to mgo dau no inpa-aap ku to mgo otow to Ehiptu, su sikoddi ian ka Magboboot no ogdorodyow kaniu to mgo dau now.”

²⁷No nigparagas sikandan pohondio to Ilim, woy duon sampuu woy daruwa no mgo sobsob dio, woy songo duon kapituan no mgo palmira,^twoy namos-ok sikandan to mgo tukbung dan dio to ilis to woig.

Manna woy mgo Pugu

16 ¹Ligkat to Ilim, to igkasampuu woy lalima no allow to igkarangob on no buwan takas to nigligkat sikandan to Ehiptu, nighipanow ka tibon koot-otawan to Israil pohondio to han-hanawan to Sin duon to taliwaro to Ilim woy to Sinai. ²Dio to han-hanawan nig-aaras ka tibon koot-otawan duon ki Mosis woy ki Aaron. ³Kagi to mgo otow to Israil to “Madmarodyow poron ko nammatoy koy to logpad to Magboboot dio to Ehiptu! Hoo su to dio koy, niglinglingutan noy ka mgo kuron no naponu to sapu, woy nabuung koy to pogkoon, di pig-aap koy now kai to han-hanawan odyow no ogkoubus koy no songo koot-otawan no ogkamatoy to gutas.”

^t15:27 Ka palmira ian ka sagboka no pinamua no un-unawa to iug ka lawa rin.

⁴No niggagi ka Magboboot ki Mosis to “Ogpouranan ku sikaniu to pan ligkat to langit. Ogmanlibuwas ka mgo otow allow-allow woy oglimuron dan ka litos to sikan no allow. Soini ka oghimuon ku to pog-ol-oog kandan odyow to pogpitow ko ogbabali sikandan to mgo udlin ku. ⁵To igkohon-om no allow, oglimuron dan ka koonon dan no daruwa no akob to ogpamuruton dan to duma no mgo allow.”

⁶No niggagi si Mosis woy si Aaron duon to mgo otow to Israil to “Kuntoon no pogkatangkob ogkataga kow no ka Magboboot ian ka nig-aap kaniu ligkat to Ehiptu, ⁷woy to masoom ogpakakita kow to kabogbogan to Magboboot, su nakarinog sikandin kaniu no nig-aaras kandin. Konon sikanami ka pig-aarasan now su mgo suguanon koy rin do.”

⁸Kagi pa ni Mosis to “Ogkataga kow no ka Magboboot ian ka nigbulig kaniu ko ogkabogadyan kow rin to sapu to pogkatangkob woy ko ogkabuung kow to pan to masoom, hoo su nigdinog sikandin to pog-aaras now kandin. Hontow koy man? Konon sikanami ka pig-aarasan now ko konon ka Magboboot.”

⁹No niggagi si Mosis ki Aaron to “Nangoni nu ka tibon koot-otawan to Israil to ‘Dani kow to Magboboot su nigdinog sikandin to pog-aaras now.’”

¹⁰To pogkagi ni Aaron duon to tibon koot-otawan to Israil, nigpitow sikandan pohondio to han-hanawan, woy nakita ran ka kabantug to Magboboot duon to gapun. ¹¹Niggagi ka Magboboot ki Mosis to, ¹²“Narinog ku ka pog-aaras to mgo otow to Israil. Nangoni nu sikandan no ‘to pogsaop to allow, ogpakakoon kow to sapu, woy to masoom ogkabuung kow to pogkoon to pan. No sikan ian ogkataga kow no sikoddi ian ka Magboboot no Igbudyag now.’”

¹³To sikan no allow to pogkatangkob niglopow ka mgo pugu no nigtangkap to pig-ugpaan to mgo otow, woy to pogkapawo duon domhug no nakalingut to pig-ugpaan dan. ¹⁴To pogboklas on to domhug, duon nagaat dio to tano to han-hanawan no inat mgo nankotok no natok. ¹⁵To pogkakita to mgo otow to Israil to sikan, nigmanangnangonoy sikandan to “Nokoy sikan?” hoo su waro sikandan mataga ko nokoy buwa sikan. Niggagi si Mosis kandan to “sikan ian ka pan no inbogoy to Magboboot no ogkoonon now. ¹⁶Soini ka insugu to Magboboot: ‘Kara otow ogpamurut ko pila

ka litos kandin. Pamurut kow to songo gantang^uto kara otow no nig-ugpo to tukbung now.”

¹⁷Nigbabali ka mgo otow to Israil to insugu kandan; duon nigpamurut to dakol woy duon nigpamurut to maintok. ¹⁸To pogsokod dan pinabadyo to gantang, waro sopra to sikan no nigpamurut to dakol, woy waro kulang to sikan no nigpamurut to maintok; hoo su kara sagboka nigpamurut ko pila ka og-awoson to lunggunan din. ¹⁹No nigkagi si Mosis kandan to “Dokow ogpohipawoi ka samo.”

²⁰Di waro mogpanalinga ka duma kandan ki Mosis; pighipawoan dan ka samo, di pig-uod-uran on woy nigmasongot on. No nabou si Mosis kandan. ²¹Kara masoom nigpamurut sikandan ko pila ka litos dan, woy to pogmoinit to allow nigtunow ka nagaat to tano. ²²To igkohon-om no allow, pigpamurut dan ka daruwa no akob to duma no mgo allow. Ian pigpamurut dan ka daruwa no gantang to kara otow. No niglibuung ka mgo igbudyag to koot-otawan woy pignangonan dan si Mosis to ran. ²³Nigkagi si Mosis kandan to “Soini ka sugu to Magboboot: ‘Asoom ogkohimu no allow to poghimooy, igkapitu^vno allow no in-oog to Magboboot. No sikan ian tuuga now ko nokoy ka ogkoiniatan now, woy ogsugba kow ko nokoy ka ogkoiniatan now. Samaa now ka samo odyow no ogkoonon now to pogkapawo.”

²⁴No pigsamo dan taman to pogkapawo unawa to innangon ni Mosis woy waro mogmasongot woy waro pig-uod-uran. ²⁵Kagi ni Mosis to “Koono now kuntoon no allow ka samo, su allow no in-oog to Magboboot ka kuntoon. Kono kow ogpakakita to ogkakoon now dio to tano kuntoon no allow. ²⁶Ogpamurut kow sood to hon-om no allow, di to igkapitu no allow, ka Sabat, kono kow ogpakakita to sikan.”

²⁷Agad no pignangonan sikandan, duon mgo otow no niglibuwas to igkapitu no allow odyow to pogpamurut to koonon, di waro nakitaan dan. ²⁸No nigkagi ka Magboboot ki Mosis to “Monu kaugoy no ogligal kow to pogbabali to mgo sugu ku woy mgo ingkagi ku? ²⁹Doromdoma now no pigbogadyan kow to Magboboot to allow to poghimooy; sikan ian ka pugtian no ogbogoy sikandin kaniu to pan

^u16:16 Gantang; omir dio to Hibriu, di un-unawa to gantang ka sikan no sosokoroy ran.

^v16:23 Igkapitu; Sabat to Hibriu no kinagian. Soini ka pigligkatan to ngaran no Sabado su nigsimba ka mgo otow to Israil to Sabado nokani.

no litos to daruwa no allow kara igkohon-om no allow. To igkapitu no allow og-uugpo kow ro; waro otow no oghip-hipanow ian.”

³⁰No sikan ian no nighimooy ka mgo otow to igkapitu no allow.

³¹Pighingaranan to mgo otow to Israil ka pan no ‘manna’^w. Maputi ka manna woy ka nanam din unawa to kabkab no balanghoy no pig-amutan to tonob. ³²Nigkagi si Mosis to “Soini ka insugu to Magboboot, kagi: ‘Purut kow to songo gantang to manna, woy ikannugun now odyow no ogkitoon to mgo tipouri now, odyow no ogkitoon dan ka pan no inbogoy ku kaniu duon to han-hanawan to pog-aap ku kaniu ligkat to Ehiptu.’”

³³No nigkagi si Mosis ki Aaron to “Purut ka to kuron woy tagui nu to songo gantang no manna. Isabuk nu dio to tangkaan to Magboboot odyow no ikannugun now to tipouri now.”

³⁴Sumao to insugu to Magboboot ki Mosis, nigpurut si Aaron to manna woy insabuk din to tangkaan to Magboboot odyow no igkannugun pad. ³⁵Nigkoon ka mgo otow to Israil to manna sood to kohop-atan no tuid taman to niglopow sikandan to ugpaanan dan; ian nigkoon sikandan to manna taman to noko-uma sikandan to oatanan to Canaan.

³⁶(Ogkohimu no sagboka no ipa^xka sampuu no omir.)

Woig ligkat to Batu

17¹Nighipanow ka tibon koot-otawan to Israil ligkat to han-hanawan to Sin, woy nighip-hipanow sikandan sumao to mgo sugu to Magboboot. Namos-ok sikandan to mgo tukbung dan to Ripidim, di waro woig no ogko-inom to mgo otow. ²No nig-atu sikandan ki Mosis no kagi ran to “Bogadyi koy to ogko-inom noy no woig.” Nigtabak si Mosis to “Manio to pig-atuan a now? Manio to pig-ol-oogan now ka Magboboot?”

³Di tongod su nammaraan ka mgo otow dio, nig-aaras sikandan ki Mosis. Nigkagi sikandan to “Manio to pig-aap koy nu ligkat to Ehiptu odyow no ogkamatoy koy to waro woig duma to mgo anak noy woy mgo adyam noy?” ⁴No nigpangiak si Mosis duon to Magboboot no kagi rin to “Ogmonuon ku ka soini no koot-otawan? Magaan a ran ogdorogpaka to batu.”

^w16:31 Manna; to Hibriu no kinagian ogpasabut soini to ‘nokoy sikan?’ su sikan ka inkagi ran to an-anadyan no allow.

^x16:36 Omir woy Ipa: Soini ka mgo ngaran to mgo sosokoroy ran.

⁵ Nigtabak ka Magboboot ki Mosis to “Hipanow ka hun-a to mgo otow. Iparuma nu ka mgo igbudyag to Israil woy komkoma nu ka tukod nu no inlampos nu to Nilu no woig. ⁶ Oghasindog a dio to tangkaan nu dio to batu to Horib. Lamposi nu ka batu, woy oglibuwas ka woig no ogko-inom to mgo otow.” No sikan ian ka pighimu ni Mosis to tangkaan to mgo igbudyag to Israil. ⁷ Pighingaranan ni Mosis ka sikan no ugpaan to Masa woy Miriba su nig-atu ka mgo otow to Israil dio, woy su pig-ol-oogan dan ka Magboboot dio no nigkagi sikandan to “Nigduma buwa ka Magboboot kanta ko waro?”^y

Mangadyow duon to mgo kapunganan ni Amalik

⁸ Niglopow ka mgo kapunganan ni Amalik, woy piglusuran dan ka mgo otow to Israil no dio to Ripidim. ⁹ Nigkagi si Mosis ki Josue to “Aam ka to mgo otow ta, woy hondio kow no ogmangadyow kow dio to mgo kapunganan ni Amalik. Asoom no allow oghasindog a to igdus to bubungan no ogkomkomon ku ka tukod to Magboboot.”

¹⁰ No sikan ian nigmangadyow si Josue to mgo kapunganan ni Amalik sumao to sugu ni Mosis, tagood nighondio si Mosis duma ki Aaron woy ki Hur dio to igdus to bubungan. ¹¹ Ko ogkawadyon ni Mosis ka mgo boad din, og-ituos ka mgo kapunganan ni Amalik, di ko ogtuntunan din ka mgo boad din, og-ituos ka mgo otow to Israil. ¹² To nabooy on ka mgo boad ni Mosis, pigpurut dan ka sagboka no batu woy pigsabuk dan odyow no ogkapinnuan ni Mosis, woy piggon-gonan ni Aaron woy ni Hur ka mgo boad din, no sagboka kandan dio to gibang din woy ka dangob dio to kawatan, no sikan ian no waro nigwoil ka mgo boad ni Mosis taman to pogkatangkob. ¹³ No naroo ni Josue ka mgo sundau to mgo kapunganan ni Amalik pinabadyo to kampilan.

¹⁴ No nigkagi ka Magboboot ki Mosis to “Sulati nu soini to linuun no sulatanan odyow no ogkaroromdom, woy ligdongi nu no ogdinog si Josue to soini: og-awoon ku ka tibon koot-otawan ni Amalik to diraom to langit odyow no konad ogkaromdoman sikandan.”

¹⁵ Nighimu si Mosis to tubaranan, woy pighingaranan din no ‘Ka Magboboot ian ka bandila²ku.’ ¹⁶ Kagi ni Mosis to “Sikan ian ka ngaran su pigkawoy ka mgo boad ku pohondio to Magboboot.

^y17:7 Masa ogpasabut to Hibriu to ‘pog-ol-oog’ woy ka Miriba ogpasabut to ‘pog-atu.’

^z17:15Ka bandila ian ka inkawoy no tuus no manggad.

Ogmangadyow ka Magboboot dio to mgo kapunungan ni Amalik taman to katamanan.”

Piglouy ni Jitro si Mosis

18¹No kuntoon, nigdinog si Jitro no taagpanubad to Midian no anugang ni Mosis moitongod to tibo no pighimu to Magboboot ki Mosis woy to koot-otawan din, woy ko pigmonu to pog-aap to Magboboot ka koot-otawan to Israil ligkat to Ehiptu.² Inpohun-a ni Mosis ka asawa rin no si Sipora pohondio to ki Jitro no anugang ni Mosis, woy pig-otow-otow ni Jitro ka anak din.³ Songo nigduma ki Sipora ka daruwa no anak dan no lukos. Ka sagboka no anak ni Mosis pighingaranan ki Girsom^asu nignangon si Mosis to “Nohimu a no dagpu to loin no ugpaan”;⁴ ka dangob no anak din pighingaranan ki Eliisir^bsu nignangon si Mosis to “Ka Magboboot no Igbudyag to amoy ku ian ka nigbulig koddi no pigpangabangan a rin ligkat to kampilan ni Parao.”

⁵Nighipanow si Jitro no anugang ni Mosis duma to mgo anak woy asawa ni Mosis no nigtomu ki Mosis to han-hanawan dio to napos-okan din to tukbung din marani to bubungan to Magboboot.⁶ Hoo su nigtugun on si Jitro kandin to “Oghondio a’t koikow; sikoddi no si Jitro no anugang nu, duma to asawa nu woy mgo anak nu no daruwa.”⁷ No sikan ian niglibuwas si Mosis odyow to pogtomu to anugang din, woy nig-unduk si Mosis woy pigharokan din si Jitro. Nangumusta sikandan woy nigsood sikandan to tukbung ni Mosis.⁸ Pignangonan ni Mosis ka anugang din to tibo no pighimu to Magboboot ki Parao woy mgo otow to Ehiptu tongod to koid-u rin to koot-otawan to Israil, woy moitongod to mgo badyadbadyad no niglopow kandan dio to daan, woy ko pigmonu pogpangabang to Magboboot kandan.⁹ Narago lagboy si Jitro to pogpamminog din to tibon marodyow no hinimuan to Magboboot to pogpangabang din to koot-otawan to Israil ligkat to boad to mgo matig Ehiptu.¹⁰ Kagi rin to “Sadyoon ka Magboboot no nigpangabang kaniu ligkat to boad to mgo otow to Ehiptu woy ni Parao woy no nighawi to koot-otawan ligkat to boad to mgo matig Ehiptu.¹¹ Nataga ad kuntoon no ka Magboboot naan ian ka mabogbog pad to tibon duma no tinuuhan, su sikan ian ka pighimu rin to mgo otow no nigsamili to mgo otow to Israil.”

^a18:3 Girsom; ogpasabut to 'dagpu dio'.

^b18:4 Eliisir ogpasabut to 'Ka Magboboot ian ka nigbulig koddi'.

¹²No nigpurut si Jitro no anugang ni Mosis to mgo adyam woy pigtutung din no inpanubad duon to Magboboot. Niglopow si Aaron duma to tibon mgo igbudyag to Israil woy nigkoon sikandan to pan duma to anugang ni Mosis dio to tangkaan to Magboboot.

¹³To pogkapawo, nigpinnuu si Mosis odyow to poghusoy to mgo nasasowan to mgo otow, woy niglinglingutan sikandin to mgo otow ligkat to masoom pohondio to pogkatangkob to allow. ¹⁴To pogkakita to anugang ni Mosis to tibo no pighimu rin dio to mgo otow, nig-inso sikandin to “Nokoy soini no oghimuon nu dio to mgo otow? Manio no sikoikow ro sagboka ka nighusoy to mgo otow tagood no nigpo-onong-onong do soini no mgo otow no niglingut koikow ligkat to masoom pohondio to pogkatangkob to allow?”

¹⁵Nigtabak si Mosis to “Hoo su ogmanlopow ka mgo otow kai’t koddi odyow to pog-inso ko nokoy ka pogboot to Magboboot. ¹⁶Ko duon oghusadyon dan, og-aapon dan kai to koddi woy sikoddi ian ka oghusoy to daruwa no nigpoog-ogotoy, woy ognangonan ku sikandan to mgo udlin woy mgo balaod to Magboboot.”

¹⁷Nigtabak ka anugang ni Mosis kandin to “Konon marodyow soini no pighimu nu. ¹⁸Ogkabooy ka duma to soini no mgo otow no ungod oglopow koikow. Mabogat to koikow soini no tarabau; kono ogkagoon to sagboka nu ro no otow. ¹⁹Pamminogi a nu pa woy ognangonan ka to marodyow woy ogbuligan ka poron to Magboboot. Sikoikow ian ka ogtangko to Magboboot tongod to soini no mgo otow, woy koikow ka og-aap to mgo husadyonon dan kandin.

²⁰Anara nu sikandan to mgo udlin woy mgo sugu, woy tuona nu sikandan ko ogmomonu sikandan to pog-ugpo, woy ko nokoy ka mgo oghimuon dan no litos. ²¹Di, aam ka to mgo otow mougsob; mgo otow ian no ogkahallok to Magboboot, mgo otow no ogkasaligan no kono ian ogpanluku woy tinurua nu sikandan no ogkohimu sikandan no mgo igbudyag to linibu, ginatus, tagkalimmaan woy tagsampuu no mgo otow. ²²Sikandan ka oghimuon nu no mgo taaghusoy to mgo otow, woy ka mgo moirap naan do no mgo husadyonon ka og-aapon dan kai to koikow; sikandan ka oghusoy to ma-agkap no mgo ingkasasow. No sikan ian ogma-agkap ka ogtiangonon nu su duon mgo duma no ogbulig koikow. ²³Ko ogsugu ka Magboboot koikow woy oghimuon nu soini, ogkagoon nu ka tarabau nu, woy ogman-uli soini no mgo otow no ogkarago sikandan.”

²⁴Nigpanalinga si Mosis to innangon to anugang din, woy pighimu rin ka tibo no ingkakagi rin. ²⁵Nig-aam sikandin to mgo

otow no mougsob ligkat to koot-otawan to Israil, woy pigtinuru din sikandan no nohimu sikandan no mgo igbudyag to mgo otow. Duon nigboot to songo libu, duon taggatus, duon tagkalimmaan woy duon tagsampuu. ²⁶ Sikandan ka no mgo taaghusoy to mgo otow to tibon mgo allow. Nig-aap sikandan to mgo mabogat no husadyonon dio ki Mosis, di sikandan ka nighusoy to mgo ma-agkap.

²⁷ No pigpohipanow ni Mosis ka anugang din, woy nig-uli si Jitro to kandin no pig-ugpaan.

Poglopow to Bubungan to Sinai

19 ¹ To pogligad on to tatou no buwan ligkat to pog-ongkod dan to Ehiptu, niglopow ka mgo otow to Israil dio to han-hanawan to Sinai. ² Takas to nighipanow sikandan ligkat to Ripidim, noko-uma sikandan to han-hanawan to Sinai, woy namos-ok ka mgo otow to Israil to mgo tukbung dan dio to tangkaan to bubungan. ³ No nigtakorog si Mosis no nigdani to Magboboot, woy nig-umow ka Magboboot kandin dio to bubungan no kagi “Soini ka inangon nu to lunggunan ni Jacob ian ka igkagi nu dio to koot-otawan to Israil: ⁴ ‘Nakita now ian ko nokoy ka pighimu ku to Ehiptu, woy ko pigmonu ku to pog-aap kaniu kai to koddi no inat nig-untud kow to pakpak to kuligi. ⁵ No kuntoon ko ogpannalinga kow to tibon mgo kagi ku woy ko ogbabalion now ka kasabutan ku, ogkohimu no sikaniu ka ingkannugun ku no koot-otawan taliwaro to tibon mgo koot-otawan. Agad no koddi ka tibo to kalibutan, ⁶ ogkohimu kow no pandatuan to mgo taagpanubad, woy in-oog no koot-otawan.’ Sikan ian ka inangon nu to mgo otow to Israil.”

⁷ No niglibong si Mosis woy pig-umow rin ka tibon mgo igbudyag to koot-otawan, woy pignangonan din sikandan to tibon mgo kinagian to Magboboot no insugu kandin no ogkagion.

⁸ Nantabak ka tibon mgo otow to “Oghimuon noy ka tibo no innangon to Magboboot.” No niglibong si Mosis duon to Magboboot no nig-aap to tabak dan.

⁹ Nigkagi ka Magboboot ki Mosis to “Oglopow a koikow duon to sagboka no makopal no gapun odyow no ogdinog ka mgo otow koddi no nig-a-aukuy koikow odyow no ogsalig sikandan koikow ladyun.” No nignangon si Mosis to Magboboot ko nokoy ka innangon to mgo otow. ¹⁰ Woy nigkagi ka Magboboot ki Mosis to “Hondio ka to mgo otow woy papanaganaa nu sikandan kuntoon woy asoom no allow odyow to pogtangko koddi. Papami-pia nu sikandan to mgo

sabinit dan ¹¹ odyow no to igkatou no allow litos on ka pogpanagana ran, su to sikan no allow oglogsad ka Magboboot duon to bubungan to Sinai to tangkaan to mgo otow. ¹² Indani nu ka oatan to bubungan woy nangoni nu ka mgo otow to 'Ligdongi now no kono kow ogtakorog dio to bubungan woy agad to pogdiok dio to linogsaran to sikan. Ko hontow ka ogdiok to bubungan ogkohimatadyan ian.

¹³ Oghohimatadyan sikandin pinabadyo to pogdogpak to batu woy ko pinabadyo to tunud, odyow no waro otow no ogsamsam kandin. Agad ko otow woy ko adyam kono ogkagaat no manokal.' Woy on ogpakatakorog ka mgo otow to bubungan ko ogparagingon on ka budyung no sungay to kambing to maadyat no daging."

¹⁴ Takas to niglogsad si Mosis ligkat to bubungan pohondio to mgo otow, pigpapanagana rin sikandan to pogtangko to Magboboot, woy pigpami-pian dan ka mgo sabinit dan. ¹⁵ No nigkagi sikandin to mgo otow to "Panagana kow tongod to igkatou no allow. Dokow ogpohul-huliroy."

¹⁶ To masoom to igkatou no allow, duon kilat woy lugung, woy makopal ka gapun to ampow to bubungan woy duon maagbot no daging to budyung. Nangolkol ka tibon mgo otow to pig-ugpaan dan.

¹⁷ No pig-aap ni Mosis ka mgo otow ligkat to pig-ugpaan dan odyow to pogtangko to Magboboot, woy nigpo-onong-onong sikandan to linogsaran to bubungan. ¹⁸ Nabunbunan to obol ka bubungan to Sinai su niglogsad ka Magboboot dio pinabadyo to hapuy. Makopal lagboy ka obol unawa to obol to pogpu-puag, woy naungat ka tibon bubungan, ¹⁹ woy nig-ungud nigmaagbot ka daging to budyung. No nigkagi si Mosis woy pigtabak sikandin to lagong to Magboboot.

²⁰ Niglogsad ka Magboboot pohondio to igdus to bubungan to Sinai, woy pig-umow rin si Mosis to poghondio to ampow to bubungan. No nigtakorog si Mosis ²¹ woy pignangonan sikandin to Magboboot to "Logsad ka pa no nangoni nu ka mgo otow odyow no kono ogpogos sikandan to pogdani to Magboboot su moon-ing kandan ka ogkammatooy ian. ²² Agad ka mgo taagpanubad, ko ogdani sikandan to Magboboot, ogpanagana panoy sikandan odyow no kono oglogparan sikandan to Magboboot."

²³ Nigtabak si Mosis to Magboboot to "Kono ogpakatakorog ka mgo otow to bubungan su nignangon ka kanami to 'Indani nu ka oatan to bubungan woy i-oog nu ka bubungan.'"

²⁴ Nigtabak ka Magboboot to "Logsad ka woy angadya nu si Aaron. Di kono ian ogpogos ka mgo taagpanubad woy mgo otow to

pogtakorog pohondii to Magboboot odyow no kono oglogparan din sikandan. ²⁵No niglogsad si Mosis woy pignangonan din ka mgo otow.

Ka Sampuu no Sugu

20 ¹Woy nigkagi ka Magboboot to soini tibon mgo udlin:
²“Sikoddi ian ka Magboboot no Igbudyag now no nig-aap kaniu ligkat to Ehiptu, ligkat to pogko-uripon now dio.

-1-

³“Waro loin no tinuuhan no ogga-aton nu ko konon sikoddi do.

-2-

⁴“Kono ka oghimu to inotowotow no duon langlanguan to agad nokoy no duon to langit to ampow woy ko duon to tano woy ko duon to woig to diraom. ⁵Kono ka og-unduk to unawa to sikan no tinuuhan woy kono ka ogsadyo to sikan; hoo su sikoddi no Magboboot no Igbudyag nu ian sagboka no Igbudyag no talikuron, no oglogparan ku ka mgo anak tongod to mgo sao to mgo amoy pohondio to igkatou woy igkohop-at no kapunganan ko og-usigon a ran, ⁶di ipakita ku ka dakol no goinawa ku dio to songo libu no kapunganan to mgo otow no ogdakol to goinawa ran koddi woy no ogbabali to mgo sugu ku.

-3-

⁷“Kono nu ogkagia ka ngaran to Magboboot no Igbudyag nu to konon litos no pogkagi, hoo su kono ogdoromdomon to Magboboot no matuarong ka otow no ogdoot to ngaran din.

-4-

⁸“Doromdoma nu ka allow to Sabat^cno i-oog nu sikan to Magboboot. ⁹Ogtarabau ka sood to hon-om no allow, no oghipongaon nu ka tibon mgo himuon nu to sikan, ¹⁰di ka igkapitu no allow ian ka Sabat to Magboboot no Igbudyag nu. To sikan no allow kono ka ogtarabau, agad sikoikow woy ka anak nu no lukos woy ko boi, woy ka suguanon nu no lukos woy ko boi, woy ka mgo adyam nu, woy ka dagpu

^c20:8,10 Sabat: Hibriu no kinagian soini no ogpasabut ‘igkapitu’ woy ‘himooy’.

no otow no nig-ugpo sood to lama nu. ¹¹ Hoo su pighimu to Magboboot ka langit woy ka tano, ka dagat woy ka tibo no duon to sikan to hon-om no allow, di to igkapitu no allow nighimooy sikandin. No sikan ian pigboligan to Magboboot ka allow to Sabat woy in-oog din sikan.

-5-

¹² “Ilaaha nu ka amoy nu woy inoy nu odyow no maadyat ka pog-ugpo nu to tano no igbogoy to Magboboot no Igbudyag nu koikow.

-6-

¹³ “Kono ka oghimatoy to otow.

-7-

¹⁴ “Kono ka oghulid to konon asawa nu.

-8-

¹⁵ “Kono ka ogpanakow.

-9-

¹⁶ “Kono ka ogbadyung to songo otow to kono'n maogot.

-10-

¹⁷ “Kono ka ogko-ima to baoy to songo otow. Kono ka ogko-ima to asawa to songo otow woy ko suguanon din no lukos woy ko boi, woy ko baka rin woy ko asnu rin woy ko agad nokoy no kandin.”

¹⁸ To pogkita to mgo otow to kilat woy lugung woy to pogdinog dan to budyung woy pigkita ran no nig-oobol ka bubungan, nangolkol sikandan to kahallok. Nigsagdok sikandan to mariu ¹⁹ woy pignangonan dan si Mosis to “Sikoikow ro ka ogkagi kanami woy ogpamminog koy koikow. Di dokag pakagia ka Magboboot kanami su ogkamatoy koy.”

²⁰ Nigkagi si Mosis to mgo otow to “Dokow ogkahallok. Nighondii ka Magboboot odyow to pog-ol-oog kaniu, odyow no kono kow oghimu to sao tongod to kahallok now to Magboboot.”

²¹ Nigpo-onong-onong do ka mgo otow to madmariu tagood to nigdani si Mosis to makopal no dooman no duon ka Magboboot.

Mgo udlin to mgo Tubaranan

²²No nigkagi ka Magboboot ki Mosis to “Nangoni nu ka koot-otawan to Israil to soini: ‘Nakita now ian no pigkagian ku sikaniu ligkat to langit: ²³Dokow oghimu to mgo inotowotow no songo ogtuuhan now duma koddi; dokow oghimu to mgo inotowotow no bulawan woy ko plata.

²⁴“Himui a now to tubaranan pinabadyo to tano woy dio now tubari ka mgo panubad now no tutungon woy mgo panubad to pogkasagboka no mgo karniru, mgo kambing, woy mgo baka. Ko agad hondo no longod no igpaila ku to ngaran ku, ogdani a kaniu woy ogboligan ku sikaniu. ²⁵Ko oghimuan a now to tubaranan pinabadyo to batu, dokow oggamit to pigbasbasan no mgo batu, su ogkohimu no maligsom to pogpitow ku ko ogtarabauon now to putow. ²⁶Woy dokow ogpanoik pohondio to tubaranan ku pinabadyo to hagoran su naugpa ko ogkakitaan ka lawa nu duon to diraom.’

Mgo Udlin to mgo Suguanon

21 ¹“Soini ka mgo udlin no ig-anad nu kandan:

²“Ko ogboli ka to suguanon no Hibriu no otow, ogtarabau sikandin koikow to hon-om no tuid, di to igkapitu no tuid, ogloka-an nu sikandin no oghipanow sikandin to waro badyad koikow. ³Ko waro duma rin to poglopow rin koikow, songo waro duma rin to pogligkat din; di ko duon asawa rin poglopow rin, songo ogduma ka boi kandin pogligkat. ⁴Ko ogpaasawoon to igbudyag ka suguanon din, woy og-anak ka boi to lukos woy ko boi, ka igbudyag ian tagtuun to boi woy to mgo anak din, ka lukos no suguanon do ka ogpakaligkat.

⁵“Di ko naugpa ognangon ka suguanon to ‘Dakol so goinawa ku to igbudyag ku woy to asawa woy mgo anak ku, woy kono a ogkoiniat no ogloka-an a rin,’ ⁶no og-aapon sikandin to igbudyag din dio to tangkaan to Magboboot. Og-aap ka igbudyag kandin to longod to lokob woy ko sungkaug to gomawan, woy oglugian din ka talinga to suguanon to putow no iglugi. No ogkohimu no suguanon din sikandin taman to pogkamatoy rin.

⁷“Ko duon lukos no ogbaligyo to anak din no boi odyow no ogkohimu no suguanon ka boi, kono ogpakalibuwas ka boi unawa to lukos no suguanon. ⁸Ko kono ogkarago to boi ka igbudyag

no nig-aam kandin, igpalokat din ka boi. Waro katongod din to pogbaligyo to boi dio to loin no otow; hoo su waro natood to igbudyag ka kasabutan din. ⁹ Ko ogpa-asawaon to igbudyag ka boi dio to sagboka no anak din no lukos, ogkohimu ka boi no unawa to anak din. ¹⁰ Ko og-asawa ka otow to sagboka pad no boi, kono oghagtong sikandin to pogpakoon woy to pogpanginabo woy to pogtuman to mgo katongod to asawa dio to nokohun-a no boi. ¹¹ Ko oghagtong ka lukos to pogbogoy to soini tatou no mgo botang, ogpoko-ongkod ka boi to waro badyad no iglokot.

Mgo Udlin to mgo Po-il

¹² “Agad hontow no oglampos to songo otow no ogkamatoy ka otow, songo oghimatadyan now sikandin. ¹³ Di ko waro din tuura to poghimatoy, di tuud naan do to Magboboot, ogpanlaguy ka otow to sagboka no ugpaan no igtuon ku kaniu. ¹⁴ Di ko ogbabantak ka otow no ogtuud sikandin to poghimatoy to songo otow, agad ko ogpanlaguy sikandin to panubaranan ku, puruta now sikandin woy himatadyi now.

¹⁵ “Oghimatadyan now agad hontow no og-atu to amoy woy ko inoy rin.

¹⁶ “Oghimatadyan now ka agad hontow no ogdakop to songo otow agad ko ogduaron din ka otow woy ko ogkakitaan sikandin no duon dod ka otow.

¹⁷ “Oghimatadyan now ka agad hontow no ogtungadyow to amoy woy ko inoy rin.

¹⁸ “Ko naugpa ogpoog-ogotoy ka daruwa no otow, no ogdokdokon to sagboka ka dangob to batu woy ko ogsuntukon din no kono ogkamatoy ka otow di ogkapogos to poghibat to hibatanan, ¹⁹ kono oglogparan ka otow no nigsuntuk ko ogpakahip-hipanow ka otow duma to tukod din to kono ogmaugoy; di ogbadyad sikandin to otow tongod to pila no allow no waro sikandin nakatarabau, woy songo ogbulig sikandin no ogkoulian ian ka otow.

²⁰ “Ko oglampos ka otow to uripon din no lukos woy ko boi woy ogkamatoy ka uripon tongod to sikan, oglogparan ka otow, ²¹ di kono oglogparan sikandin ko og-onow ka uripon takas to sagboka woy ko daruwa no allow, hoo su sikandin ian ka tagtuun to uripon.

²² “Ko duon daruwa no lukos no ogpoog-ogotoy, no ogkabarasan ka boi no naboros woy ogka-awaan ka boi di kono ogkapo-il to dakol ka boi, ogbadyad ka otow no nakasao ko nokoy ka ogbudyuon to asawa

to sikan no boi no ogbobootan to taaghusoy. ²³Di ko duon dakol no po-il, ka koudyagan ian ka igbadyad to koudyagan, ²⁴ka mata to mata, ka ngipon to ngipon, ka boad to boad, ka paa to paa, ²⁵ka tutung to tutung, ka pali to pali woy ka toob ian ka igbadyad to toob.

²⁶“Ko oglampos ka otow to mata to suguanon din no lukos woy ko boi, no ogkabutud ka mata, ogbogoy sikandin to kalipuwasan to suguanon liwan to mata. ²⁷Woy ko ogkabungawan din ka suguanon din no lukos woy ko boi, ogbogadyan din ka suguanon to kalipuwasan liwan to ngipon.

²⁸“Ko ogsuagon ka lukos woy ko boi to lukosan no baka woy ogkamatoy ka otow, oghimatadyan now ka baka pinabadyo to pogdogpak to mgo batu, woy kono now ogkoona ka sapu din. Di kono oglogparan ka tagtuun to baka. ²⁹Di, ko taan no nigpanuag ka baka to mgo otow woy pignangonan ka tagtuun to baka di waro din aara ka baka, no oghimatoy ka baka to lukos woy ko boi, dorogpaka now ka baka to batu, woy songo oghimatadyan now ka tagtuun.

³⁰Di ko ogbudyuan ka tagtuun to saapi, ogpakalokat sikandin to koudyagan din pinabadyo to pogbadyad ko nokoy ka ogbudyuon.

³¹Sikan dod ka oghimuon now ko ogpakasuag ka baka to bato. ³²Di ko uripon do ka namatoy, ogbadyad ka tagtuun to baka to 30 no tampod to plata dio to tagtuun to uripon, woy oghimatadyan ka baka pinabadyo to pogdorogpak to batu.

³³“Ko duon otow no ogpuwas to lungag to tano, woy ko ogkalion din no kono din ogsooban, woy duon baka woy ko asnu no ogko-uug dio, ³⁴ogbadyad ka tagtuun to lungag tongod to adyam; ogbadyaran din ka tagtuun, woy kandin on ka namatoy no adyam.

³⁵“Ko duon daruwa no otow no ogsinuagay ka mgo lukosan no baka ran no ogkamatoy ka sagboka no baka, ogbaligyoon dan ka manokal no baka, woy ogbaaron dan ka saapi woy songo baaron dan ka sapu to namatoy no baka. ³⁶Di ko taan no ogpanuag ka sikan no baka di waro aara to tagtuun, ogbadyad ka tagtuun; adyam liwan to adyam, woy kandin on ka namatoy no baka.

Mgo Kaaglagan to Songo Otow

22 ¹Ko duon otow no ogtakow to baka woy ko karniru no oghimatadyan din woy ko ogbaligyoon din, ogliwanan din to lalima no baka ka baka, woy ko hop-at no karniru ka karniru.

²“Ko ogkoumaan ka takawon no niglusud to baoy, woy ogbarasan sikandin no ogkamatoy, ka otow no nighbantoy to baoy rin waro

nakasao; ³ di ko oglopow ka takawon to ma-allow on, nakasao ka nigbaras to pogpatuligis to langosa.

“Ogbadyad ian ka takawon to pigtakow rin, di ko waro igkabadyad din, ogkaruad sikandin unawa to uripon odyow to pogbadyad to intakow rin.

⁴ “Ko ogtakow sikandin to adyam no ogkakitaan ka adyam no manokal dod dio to kandin; agad ko baka woy ko asnu woy ko karniru; ogbadyad sikandin to daruwa no akob to pigtakow.

⁵ “Ko duon otow no ogpasabsab to mgo adyam din dio to kamot woy ko pinamua-an din to ubas, woy ogloug ka mgo adyam no ogkoon sikandan dio to kamot to songo otow, ogliwanan to tagtuun to adyam ka pigkoon ligkat to dorodyawi no abut to kandin no kamot woy ko pinamua-an to ubas.

⁶ “Ko duon otow no ogsisilab no ogparagas ka hapuy pohondio to malogdog no dugion no ogparagas pad pohondio to trigu woy ko nokoy pad no pinamua to kamot to songo otow, ogbadyad ka otow no nigparokot to hapuy ko pila ka karakoan to nasilaban.

⁷ “Ko duon otow no ogbogoy to saapi woy ko kaaglagan din dio to songo otow odyow no ogkabantadyan, no oglopow no ogkatakow sikan ligkat to baoy to otow, ko ogkakitaan ka takawon, ogbadyad ka takawon to daruwa no akob to pigtakow rin. ⁸ Di ko kono ogkakitaan ka takawon, ogtangko ka tagtuun to baoy to mgo taaghusoy odyow to pogpitow ko sikandin buwa ka nigtakow to mgo kaaglagan no pigbantadyan din.

⁹ “Kuntoon ko duon baka woy ko asnu, ko karniru ko kinabo woy ko agad nokoy no naagak woy angkuwan duon ogkitoon to tagtuun dio to loin no ognangon sikandin to ‘Koddi sikan.’ No oghondio ka daruwa dio to tangkaan to mgo taaghusoy. Ko hontow ka nakasao sumao to husoy ian ka ogbadyad to daruwa no akob dio to nasao-an.

¹⁰ “Ko duon otow no ogpabantoy to asnu rin woy ko baka, ko karniru woy ko agad nokoy no adyam din dio to songo otow, no ogkamatoy woy ko ogkapalian ka adyam, woy ko ogkapurut to waro nigbantoy, ¹¹ ogkahusoy ka nasasowan dan pinabadyo to pogpapangulibot dio to tangkaan to Magboboot no ogpamaogot ka niggon-gon to adyam no waro din hilaboti ka adyam. No ko sikan ian, konad ogpaka-aaras ka tagtuun, woy waro badyad no igbogoy to nigbantoy. ¹² Di ko pigtakow ka adyam, ogliwanan to nigbantoy dio to tagtuun. ¹³ Ko pighigbit-higbit ka adyam to mabuut no magintaunan, og-aapon to nigbantoy ka nagaat no samo

no igpakita to tagtuun, woy kono sikandin ogbadyad to adyam no pighigbit-higbit.

¹⁴“Ko ogsamboy ka sagboka no otow to adyam ligkat to songo otow, woy ogkamatoy woy ko ogka-palian ka adyam no waro ka tagtuun to adyam dio, ogliwanan to nigsamboy ka adyam. ¹⁵Di ko duon ka tagtuun to adyam, kono ogbadyad ka nigsamboy. Ko pigbadyaran ka pigsambadyan to adyam, ka ingkabadyad dio to tagtuun ian ka ogdoromdomon no igliwan to adyam.

Ka Marodyow no Batasan

¹⁶Ko duon lukos no og-a-aukuy to boi no waro pad magon-goni woy waro pad nakapamalay odyow no oghulid ka boi kandin, ogbadyad ka lukos to badyad to pogpangasawa, woy ogkohimu no asawa rin ka boi. ¹⁷Di ko kono ian ogbabali ka amoy to boi no og-asawoon to lukos ka anak din, ogbadyad dod ka lukos to litos no badyad to pogpangasawa to daaga. ¹⁸“Dokow ogbabali no ogpalinggaat no manokal ka boi no taa-gamuton.

¹⁹“Himatadyi now ka otow no oghilabot to adyam unawa't poghilabot to asawa rin.

²⁰“Oghimatadyan now ka otow no ogpanubad dio to tinuuhan no konon ka Magboboot.

²¹“Dokow og-ul-uangi ka dagpu no otow, woy dokow oglo-loiga sikandin, hoo su mgo dagpu kow nokani to Ehiptu.

²²“Dokow oglo-loiga ka bau woy ka ilu no bato. ²³Ko oglo-loigon now sikandan, woy og-umow sikandan koddi, ogdinogon ku ian ka pogpangiak dan. ²⁴Ogmoinit ka goinawa ku, woy oghimatadyan ku sikaniu pinabadyo to kampilan; ogkohimu no mgo bau ka mgo asawa now, woy ogkohimu no mgo ilu ka mgo anak now.

²⁵“Ko ogpasamboy ka to saapi dio to agad hontow to koot-otawan ku no noirapan, dokow og-unug to pighimu to mgo taagpasamboy to saapi; dokow ogpatimui ka saapi.

²⁶“Ko ogpuruton nu ka sabinit to songo otow no igpamaugot to pangulibot din, i-uli nu kandin to kono pad ogsaop ka allow, ²⁷su sikan do ka igkombong din to lawa rin to poghiat. Nokoy pad naan ka igkombong din? Ko og-umawon a rin, ogpamminogon ku sikandin su magaan a ogkohimonow.

²⁸“Dokow ogbadyung to Magboboot to maroot, woy dokow ogtungadyawi ka igbudyag to koot-otawan now.

²⁹“Dokow ikannugun ka igbogoy now poron koddii ligkat to ogga-anion now woy mgo inomon now.

“Bogadyi a now to kara panganoy no anak now no lukos. ³⁰ Songo bogadyi a now to panganoy to tibon mgo adyam now. Ipagaat now ka nati dio to inoy rin sood to papitu no allow, di to igkawau no allow ibogoy now on koddii.

³¹“In-oog ku no koot-otawan sikaniu. No sikan ian no kono kow ogkoon to sapu to adyam no pighigbit-higbit to mabuut no magintaunan; itugdo now ro ka sapu dio to mgo asu.

Mgo Udlin to Husoy woy Koid-u

23 ¹“Dokow ipatangkap ka konon maugot no kinagian. Woy dokow ogbulig to maroot no otow pinabadyo to pogsasindog to ubat.

²“Dokow og-ikul do to koon-ingan ko oghimu sikandan to maroot. Ko ogkagi kow dio to poghusoy, dokow ogbunbuni ka kamaugotan pinabadyo to pogkagi ko nokoy ka ingkoiniat to koon-ingan, ³ woy dokow amanahi to pogbulig to otow to husoy rin tongod do su nawaraan sikandin.

⁴“Ko ogkitoon nu ka baka woy ko asnu to usig nu no nakasabuk on, aapa nu woy i-uli dio to usig nu. ⁵ Ko ogkitoon nu ka asnu to otow no nig-usig koikow no napood ka asnu diraom to intiang din, dokag ligari. Buligi nu ian ka tagtuun.

⁶“Dokow ogligal to pogbogoy to litos no poghusoy dio to mgo otow now no nawaraan. ⁷ Dokow og-agpot to pogbadyung to ubat, woy dokow oghimatadyi to husoy ka otow no waro nakasao, su kono kud ogbaagaron ka otow no oghimu to soini no sao.

⁸“Dokow ogtinawo to igbogoy ligkat to otow no nigpahusoy, su ogpakabutud sikan to otow no ogpakakita poron, woy ogpakabouk to kinagian to matuarong no otow.

⁹“Dokow oglo-loiga ka dagpu no otow; hoo su nataga kow ko nokoy ka oggoramon to dagpu su mgo dagpu kow nokani dio to Ehiptu.

Ka Igkapitu no Tuid woy Allow

¹⁰“Sood to hon-om no tuid, og-oorok kow to mgo kamot now, woy ogga-ani kow, ¹¹ di to igkapitu no tuid baagara now ka tano no kono ogdaruon woy kono now ogkamota. Ogpakapakilau dio ka mgo otow now no nawaraan woy ogmangkokoon ka mgo magintaunan

ko nokoy ka ogkasamo. Sikan dod ka oghimuon now to pinamua-an now to ubas, woy to kaikadyuan now to olibu.

¹²“Ogtarabau kow sood to hon-om no allow, di kono kow ogtarabau to igkapitu no allow, odyow no ogpakahimooy ka igdadaru no baka nu, woy ka asnu nu, woy ka uripon no no-otow to lunggunan nu, woy agad ka dagpu, odyow no oglibong ka dadyagang dan.

¹³“Ligdongi now no oghimuon now ka tibo no innangon ku kaniu. Dokow og-umowa ka mgo ngaran to loin no tinuuhan, dokow ogkagia ka mgo ngaran dan.

Ka Tatou no Pogkoonan Kara Tuid

¹⁴“Katatou to songo tuid oglimudlimud kow to mgo pogkoonan odyow to pogsadyo koddi. ¹⁵An-anadyan oglimudlimud kow to pogkoonan to Pan no Waro Igpatalin. Sood to papitu no allow, ogkoon kow to pan no waro igpatulin, unawa to insugu ku kaniu. Toora now soini to innangon ku no allow to buwan to Abib^d, su sikan ian ka buwan no nigligkat kow to Ehiptu.

“Waro otow ogtangko koddi no waro og-aapon din no igpanubad koddi.

¹⁶“Igkarangob, oglimudlimud kow to pogkoonan to Pogga-ani, no og-aapon now ka an-anadyan no bogas to mgo kamot now.

“Igkatou, oglimudlimud kow to pogkoonan to Punpun to katapusan to tuid to popunpun now to tibo no piggaani now.

¹⁷“Katatou ian to kara tuid ogtangko ka tibon mgo lukos to Magboboot no Igbudyag to tibo.

¹⁸“Dokow ogdorongan to pogpanubad to langosa woy agad nokoy no duon igpatulin.

“Dokow oghipawo-i ka tabo to mgo panubad to pogsadyo.

¹⁹“Aapa now ka dorodyawi no an-anadyan no bogas puun to tano now duon to baoy to Magboboot no Igbudyag now.

“Dokow oghilutu ka nati no kambing duon to gatas no nigligkat to kandin no inoy.^e

^d23:15 Abib; loin ka mgo ngaran to mgo otow dongan to mgo buwan. Ka Abib duon to tongatonga to Marso pohondio to Abril kuntoon.

^e23:19 Doromotan soini to mgo otow no waro mogtuu to Magboboot odyow no dakol ka abut to tano dan iing to babagkos woy to tagonlomu.

Oghun-a ka Diwata To Magboboot

²⁰ “Pitowa now, igpa-aap ku ka diwata ku to tangkaan now odyow to pogbantoy kaniu to daan woy odyow to pog-aap kaniu to ugpaan no inpanagana ku kaniu. ²¹ Pannalinga kow kandin, woy pamminoga now ka ogkagion din. Dokow og-atu kandin; kono din ogbaagaron ka sao now to pog-atu, su pig-aap din ka Ngaran ku. ²² Ko ogpamminog kow to ogkagion din, woy ko ogbabalion now ka mgo igsugu ku kaniu, ogkohimu a no usig to mgo usig now, woy og-atuan ku ka mgo otow no og-atu kaniu. ²³ Oghun-a ka diwata ku kaniu, woy og-aapon kow rin pohondio to tano no pig-ugpaan to mgo kapunganan ni Amor, ni Hit, ni Piris, ni Canaan, ni Hib woy ni Yibus, woy og-awoon ku sikandan. ²⁴ Dokow ogluhud to tangkaan to mgo tinuuhan dan, woy kono kow ogsadyo to sikan woy kono kow og-unug to hinimuan to sikan no mgo otow. Gugusa now ka mgo inotowotow ran, woy lupota now ka mgo pigluhuran dan no mgo batu. ²⁵ Sadyo kow to Magboboot no Igbudyag now, woy ogboligan din ka ogkoonon now woy ka og-inomon now. Og-awoon ku ka mgo dau duon to kaniu, ²⁶ woy waro boi to kaniu no ogdagwas, woy waro boi no kono ogpaka-anak. Ogmaadyaton ku ka mgo ukul now.

²⁷ “Ogpohuno-on ku kaniu ka kahallok ku, odyow no ogliason ka mgo koot-otawan no ogtangko kaniu. Ogpapanlagudyon ku ka tibon mgo usig now. ²⁸ Ogpohuno-on ku kaniu ka tabu-uan odyow to pogdogil to mgo kapunganan ni Hib, ni Canaan woy ni Hit to tangkaan now. ²⁹ Di kono kud og-ubuson to pogdogil kandan to sagboka ro no tuid, su ogkohimu no han-hanawan ka duma no mgo tano, woy ogmoon-ing ka mgo mabuut no mgo magintaunan no kono now on ogkagoon to pog-atu. ³⁰ Og-in-inuton ku to pogdogil kandan to tangkaan now, taman to ogmoon-ing kow on no ogpakalitos to pog-ugpo to tibon tano.

³¹ “Ogpos-okan ku ka oatan to tano now ligkat to dagat no Malaab pohondio to dagat to mgo Filistihanon, woy ligkat to han-hanawan pohondio to woig to Eupratis. Ogparaogon ku sikaniu to mgo otow no tag-inugpo to sikan no tano, woy ogdogilon now sikandan to tangkaan now. ³² Dokow oghimu to kasabutan kandan woy ko dio to mgo tinuuhan dan. ³³ Dokow ogbabali no og-ugpo sikandan to tano now, su ogka-aap kow to pogpakasao koddi, su ogkalit-ag kow to pogsadyo to kandan no mgo tinuuhan.”

Pighogot ka Kasabutan

24¹ No nigkagi ka Magboboot ki Mosis to “Takorog ka pohondii to Magboboot, sikoikow woy si Aaron, si Nadab woy si Abihu woy kapituan to mgo igbudyag to Israil. Ogsadyo kow to madmariu,² di si Mosis do sagboka ka ogdani to Magboboot; kono ian ogdani ka duma. Woy kono ogpakatakorog ka mgo otow duma kandin.”

³ To poghondio ni Mosis woy to pognangon din to tibo no ingkakagi to Magboboot no mgo udlin, nasagboka sikandan to pogtabak to “Oghimuon noy ka tibo no ingkakagi to Magboboot.”

⁴ No pigsulat ni Mosis ka tibo no inkagi to Magboboot. Nigsoom-soom sikandin to pog-onow to pogkapawo, woy nighimu sikandin to tubaranan dio to linogsaran to bubungan woy nigpos-ok sikandin to sampuu woy daruwa no mgo suwoy no batu no igpadoromdom to sampuu woy daruwa no lunggunan to Israil.⁵ No nigpa-aap sikandin to mgo baubato no lukos odyow to pogtutung to igpanubad woy odyow to pog-iow to mgo nati no lukosan no baka no igpanubad to pogsagboka to Magboboot.⁶ Pigbaad ni Mosis to daruwa ka langosa, woy insabuk din ka sagboka no baad to mgo lipung, woy inpiskipisik din ka dangob no baad duon to panubaranan.⁷ No pigpurut din ka Libru to Kasabutan woy pig-ubus din basaha dio to mgo otow. Nigtabak ka mgo otow to “Oghimuon noy ka tibo no innangon to Magboboot; ogbabali koy ian.”

⁸ No pigpurut ni Mosis ka langosa no duon to mgo lipung, woy inpiskipisik din dio to mgo otow no kagi rin “Soini no langosa ian ka ogpamaugot to Kasabutan no pighimu to Magboboot kaniu pinabadyo to sikan tibo no mgo udlin.”

⁹ Nigtakorog si Mosis duon to bubungan duma ki Aaron, ki Nadab woy ki Abihu woy to kapituan no mgo igbudyag to Israil,¹⁰ woy nakita rin ka Magboboot no Igbudyag to Israil. Dio to longod to mgo paa rin, pigkita ran ka inat daan no to safiru^fno maadyag unawa to langit.¹¹ Di waro monua to Magboboot ka soini no mgo igbudyag to mgo otow to Israil; agad no nakita ran ka Magboboot, nangkokoon woy nang-inom pad sikandan.

¹² Nigkagi ka Magboboot ki Mosis to “Takorog ka pad kai to koddi to bubungan, woy ugpo ka kai, woy ogbogadyan ku sikoikow to daruwa no manipis no batu no pigsulatan ku to mgo udlin woy mgo sugu no ig-anad kandan.”

^f24:10 Safiru, mahal no batu no moilom.

¹³No sikan ian nigtakorog si Mosis duma to taagbulig din no si Josue dio to bubungan to Magboboot. ¹⁴Nignangon si Mosis to mgo igbudyag to “Tagari koy ro kai taman to poglibong noy kaniu. Duon si Aaron woy si Hur duma kaniu; sikandan ka oghusoy ko duon husadyonon now.”

¹⁵Natongos ka bubungan to gapun to pogtakorog ni Mosis to sikan, ¹⁶woy niglogsad ka kabantug to Magboboot dio to bubungan to Sinai. Sood to hon-om no allow, natongos ka bubungan to gapun, woy to igkapitu no allow, nig-umow ka Magboboot ki Mosis ligkat to taliwaro to gapun. ¹⁷To pogpitow to mgo otow to Israil, inat nig-unawa to niglogdog no hapuy ka kabantug to Magboboot duon to ampow to bubungan. ¹⁸No nigsood si Mosis to gapun to pogtakorog din to bubungan. Nig-ugpo si Mosis to ampow to bubungan to kohop-atan no allow woy kohop-atan no kaukiloman.

Mgo Igbogoy odyow to poghimu to Tukbung to Magboboot

25 ¹Nigkagi ka Magboboot ki Mosis to, ²“Nangoni nu ka mgo otow to Israil to pog-aap to igtubad kai’t koddi. Tinawaa nu ka igbogoy koddi ligkat to agad hontow no duon goinawa to pogbogoy. ³Soini ka mgo igbogoy no ogtinawoon nu ligkat kandan; bulawan, plata woy brunsi; ⁴mgo sinulid no moilom, moitom-itom woy ka malaab^g, mgo manggad no dorodyawi; mgo bulbul to kambing; ⁵Tinawaa nu pad ka mgo laplap to mgo lukosan no karniru no pig-ood to malaab, woy mgo laplap to mgo baka^hto dagat; mgo kadyu no akasya; ⁶mgo lana ligkat to olibu no igpaparokot to mgo ilaw; mgo aanag no ig-amut to lana no igtutuus woy no ig-amut to moomut no palina; ⁷mgo batu no oniks woy duma pad no mgo mahalon no mgo batu no igpo-ilin-ilin to ipodⁱwoy to manggad to sosoobon to taagpanubad.

⁸“Pohimua nu sikandan koddi to in-oog no tukbung, woy og-ugpo a duma kandan. ⁹Himua now ka tukbung woy ka tibon mgo kaaglagan to sikan no unawa ian to ipapitow ku koikow.

^g25:4 Moitom-itom; ka inpasabut kai ian ka unawa to ubi ka kolor. Ka malaab kai ian ka unawaro to langosa.

^h25:5 Baka to dagat: kono'n maugot no baka soini di pigsangod do no dakol no og-upo to dagat.

ⁱ25:7 Ipod; sagboka no kinabo no sau-ubon to taagpanubad nokani.

Ka Sooranan to Kasabutan

¹⁰“Ogpohimuon nu sikandan to sooranan to kadyu no akasya. Oghimuon now ka sooranan no lalima no dangow ka kaadyatan, tatou no dangow ka kau-agan woy tatou no dangow ka katikangan. ¹¹Pakopkopi now ka sooranan to bulawan, dio to sood woy dio to libuwasan, woy po-ilin-ilini now ka palibut din to bulawan. ¹²Himui nu to hop-at no sising to tinunow no bulawan no igsabuk now to hop-at no paa to sooranan; daruwa no sising to sagboka no kilid woy daruwa to limang. ¹³Songo himua nu ka daruwa no loungan to kadyu no akasya, woy pakopkopi nu to bulawan. ¹⁴Iluglug nu ka mgo loungan to mgo sising to mgo kilid to sooranan no igtiang now to sikan. ¹⁵Igaat now ka mgo loungan dio to mgo sising to soini no sooranan; kono now og-awoon ian. ¹⁶Isood now to sooranan ka Kasabutan no igbogoy ku koikow.

Ka Soob to Pogpokog-uli

¹⁷“Himua nu ka soob no bulawan no tuus to pogpokog-uli, no lalima no dangow ka kaadyatan woy tatou no dangow ka kau-agan to soob. ¹⁸Himua now ka daruwa no kirub to sinalsal no bulawan no og-untud to mgo koopusan to soob. ¹⁹Isabuk nu ka sagboka no kirub to sagboka no koopusan to soob, woy ka dangob no kirub dio to limang; woy isabuk now sikandan odyow no ogkasagboka to soob. ²⁰Ogpinogtangko no og-unduk ka mgo kirub woy ogkawoy ka mgo pakpak dan no oghoung to soob. ²¹Isabuk nu ka soob dio to ampow to sooranan, woy isood nu ka Kasabutan no igbogoy ku koikow. ²²Ogtangko a koikow dio to ampow to soob to sooranan to Kasabutan dio to taliwaro to daruwa no kirub woy ognanganon ku sikoikow to tibon mgo sugu ku to mgo otow to Israil.

Pigmaupot no mgo kinagian

To nigmoori no mgo kinagian to duma no mgo birsikulu to kapitulu 25 pohondio to kapitulu 30, nigparagas ka Magboboot to pognanganon ki Mosis ko nokoy ka mgo oghimuon din. Pigmaupot

^J25:18 Kirub; songo kalasi no diwata no duon pakpak ka kirub di waro ki lagboy mataga ko nokoy ka langlanguan din. Pitow kow pad to Ezekiel 10

noy soini to kuntoon odyow no magaan kow ogpakagon-gon to mgo maasi ogbasahon no mgo baad to libru to Exodu di uromo ogkohokad porom ka tibo to soini.

To Kapitulo 25 birsikulu 23 pohondio to 30 (Exodu 25:23-30), nignangon ka Magboboot moitongod to lamisa no ogsabukan to pan dio to tangkaan to Magboboot. To Exodu 25:31-40 nignangon sikandin moitongod to unturanan to ilawan no isabuk to sood to tukbung to Magboboot. - 30

26 To tibon kapitulo 26 to Exodu, niggagi ka Magboboot moitongod to tukbung no oghimuon dan no duon daruwa no sinabong. Ka sagboka no sinabong pighingaranan no In-oog no longod, woy ka mgo taagpanubad do ka ogpakasood to sikan. Ka dangob no sinabong pighingaranan no In-oog Lagboy no longod, woy ka igbudyag to mgo taagpanubad do ka ogpakasood dio, woy duon isabuk dan ka sooranan no sabukanan to Kasabutan.

To Exodu 27:1-8 nigparagas ka Magboboot to pognangon moitongod to tubaranan no oghimuon dan no ian ka tutunganan dan to mgo adyam no igpanubad dan duon to Magboboot. Takas to sikan, to Exodu 27:9-19 nignangon ka Magboboot tongod to aad no oghimuon dan no igpalibut to tukbung woy to tubaranan (no dio to libuwasan to tukbung). Woy to katapusan to kapitulo 27 nignangon ka Magboboot moitongod to lana no igparokot to mgo ilawan.

Takas to sikan no mgo oghimuon dan, to Exodu 28 nignangon ka Magboboot tongod to mgo taagpanubad woy ko nokoy ka ogsau-ubon dan. Duon ka pighingaranan no Ipod no ig-atang to sosoobon to taagpanubad, woy og-akoban sikan to dangob no manggad to longod to sosoobon no duon sampuu woy daruwa no loin-loin no mgo mahalon no batu no igpadoromdom to sampuu woy daruwa no lunggunan to mgo otow to Israil. Songo duon sabinit no moilom woy duon kuubow no igsau-ub ni Aaron woy to дума no mgo taagpanubad.

Dio to kapitulo 29 nignangon ka Magboboot ko monuon dan to pogpanubad odyow to pog-oog to mgo taagpanubad to tarabau ran duon to Magboboot. Ogbus-ugan dan to lana ka uu to taagpanubad. Duon baka no igtubad dan no ogsampoong ka mgo taagpanubad to mgo boad dan dio to uu to baka no ogpasabut no igbogoy ran ka sao dan duon to baka. No og-iawon dan ka baka, woy ka langosa rin igpoid dio to tubaranan. Ogtutungon dan ka atoy woy pamisliion dio to tubaranan, di ka lawa ogtutungon dio to libuwasan to pig-ugpaan

dan. Songo duon kambing no og-iawon dan no ogtutungon dio to tubaranan no moomut no tubad dio to Magboboot. Duon pad igkarangob no kambing no og-iawon dan no igpoid dan ka langosa duon to mgo lawa woy mgo kinabo to mgo taagpanubad.

Songo nigkagi ka Magboboot moitongod to allow-allow no pogtubad to koot-otawan to Israil. Kara allow ogtubad sikandan to sagboka no nati no karniru to masoom woy sagboka no nati no karniru to maapun duma to pan woy to inomon.

To Exodu 30:1-10 nignangon ka Magboboot tongod to tubaranan to palina. Kara masoom woy kara maapun ogtutung ka igbudyag to mgo taagpanubad to palina duon. Si Aaron ian ka an-anadyan no igbudyag to mgo taagpanubad.

To Exodu 30:11-16 nignangon no duon allow no ogsool sikandan to mgo otow, woy to sikan no allow, kara lukos no nakaligad on to 20 no tuid ka kabudyagi rin, ogbogoy sikandin to saapi no tubad odyow no kono oghimatadyan to Magboboot tongod to sao din.

To Exodu 30:17-21 nigkagi no songo oghimu sikandan to lipung no brunsi no luu-anan dan to mgo boad woy paa to mgo taagpanubad ko ogdani sikandan to Magboboot.

To Exodu 30:22-33 nignangon pad ka Magboboot ko nokoy ka iglamisok dan to lana no igbus-ug to pogpo-oog to mgo taagpanubad woy no igbus-ug dan to tibon mgo kaaglagan no i-oog to tarabau to Magboboot.

To katapusan, to Exodu 30:34-38 nignangon ka Magboboot ko nokoy ka iglamisok dan to poghimu to palina no igtutung dan to tangkaan to Magboboot.

Si Bisalil woy si Oholiab

31 ¹No nigkagi ka Magboboot ki Mosis to, ²“Pitow ka, pig-aam ku si Bisalil no anak ni Uri, no anak ni Hur no kapunganan ni Juda. ³Pighiponu ku sikandin to Gimukud to Magboboot woy to katagaan woy to katouan to loin-loin no mgo oghimuon ⁴odyow no ogkatou sikandin to pogpo-ilin-ilin to poghimu pinabadyo to bulawan, to plata woy to brunsi. ⁵Songo ogkatou sikandin to pogtarabau to mgo mahalon no batu, woy to poggamit to kadyu woy to tibo no mgo loinloin no tarabau to poghimu. ⁶Nokoy pad, no songo pig-aam ku si Oholiab no anak ni Ahisamak no kapunganan ni Dan odyow to pogbulig ki Bisalil. Songo pigbogadyan ku to katagaan ka mgo taaghimu odyow no ogpokohimu sikandan

to tibo no insugu ku koikow; ⁷ ian ka tukbung to pogtomu, ka sooranan no sabukanan to kasabutan duma to soob to sikan no tuus to pogpokog-uli, woy ka tibon duma no mgo kaaglagan to tukbung. ⁸ Ogpakahimu pad sikandan to lamisa woy mgo kaaglagan to sikan, to bulawan no unturanan to ilaw woy to mgo kaaglagan to sikan, woy to tutunganan to palina. ⁹ Ogkatou sikandan to poghimu to tubaranan to mgo ogtutungon no tubad duma to mgo kaaglagan to sikan, woy to lipung duma to unturanan to sikan ¹⁰ woy to mgo manggad no mgo sabinit, iglagkos ka mgo in-oog no mgo kinabo ni Aaron no taagpanubad, woy mgo kinabo to mgo anak din no ogsau-ubon dan to pogtarabau to pogtubad. ¹¹ Songo ogkatou sikandan to poghimu to lana no igbus-ug, woy palina no moomut no ogtutungon to In-oog no Longod. Oghimuon dan ka tibo sumao to innangan ku koikow.”

Ka Allow to Poghimooy

¹² No nigkagi pad ka Magboboot ki Mosis to, ¹³ “Nangoni nu ka mgo otow to Israil to, ‘Babalia now ka mgo Allow to Poghimooy. Ogkohimu sikan no tuus kaniu woy koddi taman to tipouri now, odyow no ogkataga kow no sikoddi ian ka Magboboot no nig-oog kaniu. ¹⁴ Babalia now ka allow to poghimooy su in-oog ku kaniu. Agad hontow no kono ogbabali to sikan, oghimatadyan now sikandin; ian ko hontow ka ogtarabau to sikan no allow, konad ogpaka-agpot to koot-otawan din. ¹⁵ Ogtarabau kow sood to hon-om no allow, di ka igkapitu no allow ian ka allow to poghimooy no in-oog to Magboboot. Agad hontow no ogtarabau to sikan no allow oghimatadyan ian. ¹⁶ Ogbabalion to mgo otow to Israil ka allow to poghimooy, unawa to kasabutan no ogtumanon to tibon mgo tipouri taman to katamanan. ¹⁷ Ogkohimu no tuus sikan taliwaro koddi woy to mgo otow to Israil taman to katamanan, su pighimu to Magboboot ka langit woy ka tano sood to hon-om no allow, woy to igkapitu no allow nighagtong sikandin to pogtarabau woy nighimooy sikandin.””

¹⁸ Takas to nigkagi ka Magboboot ki Mosis dio to bubungan to Sinai, inbogoy rin ki Mosis ka daruwa no batu to Kasabutan; mgo batu sikan no pigsulatan to tinuru to Magboboot.

Ka Bulawan no Nati no Baka

32 ¹ To pogpitow to mgo otow no maugoy lagboy si Mosis no waro mogtupang puun dio to bubungan, piglingutan dan si

Aaron woy nignangon sikandan to “No, himui koy to mgo tinuuhan no oghun-a kanta. Si Mosis ian ka nig-aap kanta ligkat to Ehiptu, di hondoid on buwa sikandin?”

²Nigtabak si Aaron kandan to “Panlokaa now ka mgo bulawan no mgo arikis no pigpang-arikis to mgo asawa now woy mgo anak now no mgo lukos woy boi, woy aapa now sikan kai to koddi.”

³No sikan ian pigloko to tibon mgo otow ka mgo arikis dan woy pig-aap dan ki Aaron. ⁴Pigpurut ni Aaron ka inbogoy ran kandin, woy pigtunow rin no nighimu sikandin to ogtuuhan dan no unawa to nati no baka, no indorodyow rin pad pinabadyo to tigib. No nigkagi sikandan to “Pitow kow no mgo otow to Israil, soini ka mgo tinuuhan now no nig-aap kaniu ligkat to Ehiptu.”

⁵To pogpitow ni Aaron to soini, nighimu sikandin to tubaranan dio to tangkaan to nati no baka woy nignangon sikandin to “Asoom no allow oghimu ki to pogkoonan duon to Magboboot.”

⁶No sikan ian to pogkapawo, nigsoom nig-onow ka mgo otow, no nigtubad pinabadyo to pogtutung to mgo adyam, woy nigbogoy to mgo igtubad to pogkasagboka. Takas to sikan nigpinnuu sikandan to pogkoon woy to pog-inom, woy nig-onow odyow to poghilhilabotoy.

⁷No nigkagi ka Magboboot ki Mosis to “Agpas ka oglogsad, su nigsuwoy on pohondio to karootan ka koot-otawan nu no pig-aap nu ligkat to Ehiptu. ⁸Magaan sikandan nigsuwoy to mgo sugu ku kandan, woy nighimu sikandan to ogtuuhan dan no unawa to nati no baka. Nig-unduk sikandan to tangkaan to sikan woy pigtubaran dan woy nignangon sikandan to ‘Pitow kow no mgo otow to Israil, soini ka mgo tinuuhan now no nig-aap kaniu ligkat to Ehiptu.’

⁹No nigkagi pad ka Magboboot to “Nakita ku ka soini no koot-otawan no makogal ka uu ran. ¹⁰Baagara a nu kuntoon su moinit ka goinawa ku kandan woy odyow no og-awoon ku sikandan, woy oghimuon ku sikoikow no sagboka no mabogbog no koot-otawan.”

¹¹Di nigpakoid-u si Mosis to Magboboot no Igbudyag din no nigkagi sikandin to “Magboboot, manio to ogmoinit ka goinawa nu to koot-otawan nu no pig-aap nu ligkat to Ehiptu pinabadyo to mabogbog no boad nu? ¹²Manio to ognangon ka mgo otow to Ehiptu to ‘Maroot naan ka goinawa rin kandan no pig-aap din sikandan to kabubunganan odyow to pog-awo kandan ligkat to ampow to tano.’ Iniugi nu ka kabou nu, woy dokag paragasa ka poglogpad to soini no koot-otawan nu. ¹³Doromdoma nu ka mgo suguanon

nu no si Abraham, si Isaak woy si Israil no pigpangulibotan nu pinabadyo to ngaran nu no nigkagi ka kandan to ‘Oghimuon ku ka mgo kapunganan nu no unawa to koon-ingan to mgo bituon to langit woy ogbogadyan ku sikandan to tano no inpangulibot ku kandan, woy sikandan ka ogtagtuun to sikan taman to katamanan.”

¹⁴No sikan ian waro nigparagas ka Magboboot to poglogpad to koot-otawan din iing to pigbabantaan din. ¹⁵Nigliku si Mosis woy nigtupang sikandin to bubungan no pigkomkom din ka daruwa no batu to Kasabutan. Pigsulatan ka sikan no mgo batu to tangkaan woy to koiniugan. ¹⁶Ka Magboboot ian ka nighimu to sikan no mgo batu, woy sikandin ka nigpatik dio to batu pinabadyo to pogpanlugit. ¹⁷To pogdinog ni Josue to daging to pogbabansagonoy to mgo otow, pigkagian din si Mosis to “Duon daging to inat nigmamang-mangadyawoy to pig-ugpaan to mgo otow.”

¹⁸Nigtabak si Mosis to “Konon daging to nakadoog sikan, woy konon daging to naroog; daging to nanotod-om sikan no ogkarinog ku.” ¹⁹To pogdani ni Mosis to pig-ugpaan to mgo otow, woy to pogkakita rin to nati no baka woy to pogsadyow to mgo otow, nabou lagboy sikandin, woy indogsang din ka daruwa no batu woy nagopang sikan dio to linogsaran to bubungan. ²⁰Pigpurut ni Mosis ka nati no baka no pighimu ran woy pigtutung din to hapuy; piggaling din ka bulawan woy insawod din dio to laplap to woig, woy pigpogos din ka mgo otow to Israil to pog-inom to woig. ²¹Nig-inso si Mosis ki Aaron to “Nokoy ka pighimu to soini no mgo otow koykow odyow no pigtuon nu sikandan to soini no dakol no sao?”

²²Nigtabak si Aaron to “Dokag kabou, igbudyag ku. Noko-ila ka to soini no koot-otawan woy ko monu kagaan sikandan ogdoog to karootan. ²³Nignangon sikandan koddi to ‘Himui koy nu to mgo tinuuhan no oghun-a kanta. Hoo su waro ki mataga ko nokoy ka nabadyaan ni Mosis no nig-aap kanta ligkat to Ehiptu.’ ²⁴No pignangonan ku sikandan to ‘Ko hontow kaniu ka duon alahas no bulawan, lokaa now.’ Inbogoy ran koddi ka bulawan dan, woy indogpak ku to hapuy, woy soini no nati no baka ian ka niglibuwas!”

²⁵Nakita ni Mosis no waro nakaponod si Aaron to mgo otow, woy no nigpa-angol-angol sikandan woy no ogbunsud ka mgo usig dan to pogngisi kandan. ²⁶No nigsasindog sikandin to daan no ogsood to pig-ugpaan dan woy nig-umow sikandin to “Dani kow koddi ko mgo otow kow to Magboboot.” No nigdani ka tibon mgo kapunganan

ni Livi kandin. ²⁷ No pigkagian din sikandan to “Soini ka kinagian to Magboboot no Igbudyag to Israil kagi ‘Kara otow ogsinikot to kampilan din. Oghip-hipanow kow to tibon pig-ugpaan to mgo otow ligkat to binunsuran pohondio to koopusan woy panghimatadyi now ka mgo suod now, mgo aukuy now woy mgo songobaoy now.’”

²⁸ Pighimu to mgo kapunganan ni Livi ka insugu ni Mosis, woy mgo tatou no libu no otow ka pigpanghimatadyan dan to sikan no allow. ²⁹ No nigkagi si Mosis to “Kuntoon pig-oog kow to tarabau to Magboboot, su nig-atu kow to mgo anak now woy mgo suod now, woy pigboligan kow to Magboboot kuntoon no allow.”

³⁰ To pogkapawo, nignangon si Mosis to koot-otawan, “Dakol ka sao no now. Di kuntoon ogtakorog a pohondio to Magboboot; naugpa ko ogkohimu ku no ogpokog-uli dod ka mgo sao now.”

³¹ No niglibong si Mosis duon to Magboboot woy kagi rin “Pagpagamadyan naan ka sao no pighimu to soini no mgo otow! Nighimu sikandan to mgo tinuuhan no bulawan. ³² Di kuntoon, ogpoigu-on nu poron ka sao dan, di ko kono ka, songo awaa nu ka ngaran ku ligkat to libru nu.”

³³ Nigtabak ka Magboboot ki Mosis to “Ka otow no nakasao do ian ka og-awoon ku to libru ku. ³⁴ No hondio ka, aapa nu ka koot-otawan pohondio to ugpaan no innangon ku woy oghun-a ka diwata ku kaniu. Di, ko oglopow ka litos no allow to poglogpad, oglogparan ku sikandan tongod to sao dan.”

³⁵ Woy pigpa-aapan to Magboboot ka koot-otawan to mokohinhinaat no dau tongod to pighimu ran tongod to nati no inhimu ni Aaron.

33 ¹ No nigkagi ka Magboboot ki Mosis to “Ongkori now ka soini no ugpaan, sikoikow duma to mgo otow no pig-aap nu ligkat to Ehiptu, woy oghondio kow to tano no inpangulibot ku ki Abraham, ki Isaak woy ki Jacob no nigkagi a to ‘Igbogoy ku sikan to mgo tipouri now.’ ² Ogpohuno-on ku ka diwata ku kaniu no og-awoon din ka mgo kapunganan ni Canaan, ni Amor, ni Hit, ni Piris, ni Hib woy ni Yibus. ³ Takorog kow to tano no pigpuunan to gatas woy tonob no dakol. Di kono a ogduma kaniu, su makogal ka uu now woy naugpa ko oghimatadyan ku sikaniu dio to daan.”

⁴ To pogkarinog to mgo otow to soini no mgo kinagian no masakit, nigbunsud sikandan to pogpandaawit, woy waro otow nigsau-ub

to mgo pohubung^k. ⁵ Hoo su niggagi on ka Magboboot ki Mosis to “Nangoni nu ka mgo otow to Israil to ‘Makogal ka mgo uu now. Ko ogduma a kaniu agad to sagboka ro no pogpoo-poo, naugpa ko ogpanghimatadyan ku sikaniu. No kuntoon awaa now ka mgo pohubung now woy ogdoromdomon ku ko nokoy ka oghimuon ku kaniu.”

⁶ No sikan ian pigpang-awo to mgo otow to Israil ka mgo pohubung dan dio to longod to bubungan to Horib^l.

Ka Tukbung to Pogtangko

⁷ No kuntoon ladyun ogpos-ok si Mosis to sagboka no tukbung dio to libuwasan to pig-ugpaan to mgo otow dio to madmariu woy pighingaranan din no “Tukbung to Pogtangko.” Ko duon otow no duon ig-inso din to Magboboot, oghondio ka otow to Tukbung to Pogtangko dio to libuwasan to pig-ugpaan to mgo otow. ⁸ To kara oghondio si Mosis to sikan no tukbung, ogmansasindog ka tibon mgo otow no nigpo-onong-onong to longod to gomawan to mgo tukbung dan no nigpitow ki Mosis taman to nigsood sikandin to tukbung.

⁹ To pogsood ni Mosis to tukbung, niglogsad ka suwoy no gapun woy nigpalingaat sikan dio to gomawan tagood to nig-a-aukuy ka Magboboot ki Mosis. ¹⁰ Ko ogkita ka mgo otow to suwoy no gapun no ogsasindog to gomawan to tukbung, nigsasindog sikandan to pogsadyo, kara otow duon to gomawan to kandin do no tukbung.

¹¹ Nig-a-aukuy ka Magboboot ki Mosis no nigtangko unawa to sagboka no otow no og-aukuy to duma rin. Takas to pogtangko ni Mosis to Magboboot nig-uli sikandin to pig-ugpaan to mgo otow, di nigpalingaat si Josue no anak ni Nun dio to tukbung. Si Josue ian ka baubato pad no taagbulig ni Mosis.

Si Mosis woy ka Kabantug to Magboboot

¹² Niggagi si Mosis to Magboboot to “Nignangon ka koddi to ‘Aapa nu soini no koot-otawan’, di waro ka mognangon ko hontow ka ogparumaon nu kanak. Nignangon ka to ‘Nokoila a to ngaran nu woy narago a koikow.’ ¹³ Ko narago ka koddi, tuona a nu to mgo udlin nu odyow no ogko-ilaan ku sikoikow woy no ogparagas no ogkarago ka koddi.

^k33:4 Pohubung; mgo alahas woy dayandayan.

^l33:6 Horib; dangob no ngaran to Sinai sikan.

Doromdoma nu no soini no mgo otow ian ka koot-otawan nu.”

¹⁴ Nigtabak ka Magboboot to “Koddi ka ogduma koikow, woy ogpohimoodyon ku sikoikow.”

¹⁵ No nigkagi si Mosis to Magboboot to “Ko kono ka ogduma kanami, kono koy nu ogpohipanawa. ¹⁶ Monuon pogkataga to mgo otow no narago ka koddi woy to koot-otawan nu ko kono ka ogduma kanami? Nokoy pad ka indanan no sikoddi woy ka koot-otawan nu waro nig-unawa to tibon duma no koot-otawan to ampow to tano?”

¹⁷ No nigtabak ka Magboboot ki Mosis to “Oghimuon ku ka inbudyu nu ian su narago a koikow woy noilaan ku ka ngaran nu.”

¹⁸ No nigkagi si Mosis to “Kuntoon papitowa a nu to kabantug nu.”

¹⁹ No nigkagi ka Magboboot to “Ipakita ku koikow ka tibon karodyowan ku no ogligad to tangkaan nu, woy ogkagion ku ka ngaran ku no Magboboot to tangkaan nu. Ogekoid-uan ku ko hontow ka ogkoid-uan ku, woy ogkohimonow a to ogkohimonowan ku no otow. ²⁰ Di, kono ka ogpakakita to langlanguan ku, su waro otow no ogpakakita to langlanguan ku no ogpalinggaat no manokal.”

²¹ No nigkagi pad ka Magboboot to “Duon longod to marani ku, woy ogpakasasindog ka to sagboka no batu dio. ²² Ko ogligad ka kabantug ku, igsabuk ku sikoikow to goat to batu, woy ogtol-oban ku sikoikow to boad ku taman to nakaligad ad on. ²³ No og-awoon ku ka boad ku no ogpakakita ka to poka ku; di kono ogkakitaan ian ka langlanguan ku.”

Iam no mgo Batu no Napatik

34 ¹ Nigkagi ka Magboboot ki Mosis to “Basbasi nu ka daruwa no batu unawa to an-anadyan, woy ogpatikan ku sikan to mgo kinagian no duon to nokohun-a no mgo batu no piggopang nu. ² Himpod ka odyow to pogtakorog to bubungan to Sinai asoom to masoom. Ogtangko ka koddi dio to igdus to bubungan. ³ Waro otow no ogduma koikow, woy waro otow no ogdiok to bubungan, agad ko mgo adyam no mgo karniru, kambing woy ko baka kono ogpasabsabon sikandan to linogsaran to bubungan.”

⁴ No nigbasbas si Mosis to daruwa no batu iing to nokohun-a no mgo batu, woy nigtakorog sikandin to bubungan to Sinai to masoom pad sumao to innangon to Magboboot kandin, woy pigkomkom din ka daruwa no batu. ⁵ No niglogsad ka Magboboot pinabadyo

to gapun woy nighasindog dio duma ki Mosis, woy pigkagi rin ka ngaran din no Magboboot. ⁶ Nigligad sikandin to tangkaan ni Mosis tagood to nigkagi sikandin “Ka Magboboot ian ka Magboboot, ka mohimonawon woy moid-uon no Igbudyag, mananoy ogkabou, dakol lagboy to goinawa woy to pogkamatarong, ⁷ ogdakolon din ka goinawa rin dio to linibu no mgo otow, mopo-iguon to mgo sao, mgo pog-atu woy karootan. Di kono din ogbaagaron ka mgo nakasao; oglogparan din taman to igkatou woy ko igkohop-at no kapunganan ka mgo anak to mgo amoy no nakasao.”

⁸ Nig-agpas nig-unduk si Mosis no niglangkob duon to tano to pogsadyo. ⁹ Nigkagi sikandin to “Magboboot, ko narago ka koddi, ogdumaan koy nu poron. Agad ko makogal ka uu to soini no koot-otawan, ogpamudyuon ku sikoikow to pogpo-igu to mgo sao noy woy karootan noy woy himua koy nu no indakoli nu.”

¹⁰ No nigkagi ka Magboboot to “Oghimuon ku kuntoon ka kasabutan ku kaniu. To tangkaan to tibon koot-otawan nu oghimu a to mgo ogko-in-inuan no waro pad himua to agad hondo no koot-otawan to kalibutan. Ogpakakita ka koot-otawan no niglingut koikow ko monu mokohinhinaat ka oghimuon ku to koikow.

¹¹ Babalia now ka igsugu ku koikow kuntoon. Ogdogilon ku to tangkaan now ka mgo koot-otawan no mgo kapunganan ni Amor, ni Canaan, ni Hit, ni Piris, ni Hib woy ni Yibus. ¹² Bantadyi now no kono kow oghimu to kasabutan to mgo otow no nig-ugpo to tano no oghondiaan now, su ogkohimu sikandan no lit-ag kaniu.

¹³ Gugusa now ka mgo tubaranan dan, woy gopanga now ka mgo tinuuhan dan no mgo batu, woy poora now ka mgo tinuuhan dan no pighingaranan no mgo suwoy ni Asira. ¹⁴ Dokow ogsadyo to loin no tinuuhan, su talikuron ian ka Magboboot su sikan ka ngaran din.

¹⁵ Bantadyi now no kono kow oghimu to kasabutan to mgo otow no nig-ugpo to tano no oghondiaan now; hoo su ko ogduaron dan ka kabantug dan pinabadyo to pogsadyo to mgo tinuuhan dan woy to pogtubad dan, oghingaton kow ran woy ogkoon kow to mgo pigpanubaran dan. ¹⁶ Woy ko og-aam kow to mgo anak dan no mgo boi no og-asawoon to mgo anak now, woy ko ogduaron to sikan no mgo boi ka kabantug dan pinabadyo to pogsadyo to mgo tinuuhan dan og-aapon dan ka mgo anak now no lukos to sikan no hinimuan.

¹⁷ “Dokow oghimu to mgo inotowotow no inpatunow.

¹⁸ “Himua now ka pogkoonan to Pan no Waro Igpatulín. Sood to papitu no allow ogkoon kow to pan no waro igpatulin unawa to

insugu ku kaniu. Himua now soini to litos no allow to buwan to Abib^m, su sikan ian ka buwan no nigligkat kow to Ehiptu.

¹⁹ “Koddi ka tagtuun to kara panganoy to kara aanakan, iglagkos ka mgo panganoy no adyam now ko baka woy ko karniru. ²⁰ Lokata now ka panganoy no asnu pinabadyo to karniru, di ko kono nud oglokaton, bunggu-a nu ka liog din. Lokata now ka tibon panganoy no mgo anak now no lukos. Waro otow ka ogtangko koddi no waro og-aapon din no igpanubad.

²¹ “Ogtarabau kow to hon-om no allow, di to igkapitu no allow oghimooy kow; agad to buwan to pog-oorok woy to buwan to pogga-ani now, oghimooy kow ian.

²² “Himua now ka Pogkoonan to mgo Simanaⁿpinabadyo to an-anadyan no ani to trigu, woy himua now ka Pogkoonan to Punpun to katapusan to tuid. ²³ Katatou ian to kara tuid, ogtangko ka tibon mgo lukos koddi no Mabogbog no Magboboot no Igbudyag to Israil.

²⁴ “Ogdogilon ku ka mgo koot-otawan hun-a kaniu woy ogmau-agon ku ka oatanan to tano now, woy waro og-agow to tano now tagood to poghipanow now to pogtangko koddi no Magboboot now to katatou kara tuid.

²⁵ “Dokow pogdongana to pogpanubad ka langosa to adyam woy ka agad nokoy no duon igpatulin, woy dokow hipawoi ka samo to tubad to Pogkoonan to Pogligad. ²⁶ Aapa now ka dorodyawi no an-anadyan no abut to mgo pinamua now to baoy to Magboboot no Igbudyag now.

“Dokow oghilutua ka nati no kambing duon to gatas no nigligkat to kandin no inoy.^o”

²⁷ No nigkagi ka Magboboot ki Mosis to “Isulat nu ka sikan no mgo kinagian su pinabadyo to sikan no kinagian pighimu ku ka kasabutan ku to koikow woy to Israil.”

²⁸ Duon si Mosis duma to Magboboot to kohop-atan no allow woy kohop-atan no kaukiloman to waro koon din woy waro inom din. Nigsusulat sikandin to mgo batu ka mgo kinagian to kasabutan no ian ka sampuu no sugu.

^m34:18 Abib; loin ka mgo ngaran to mgo otow dongan to mgo buwan. Ka Abib duon to Marso pohondio to Abril kuntoon.

ⁿ34:22 Pogkoonan to mgo Simana, songo pighingaranan soini no Pogkoonan to Ani.

^o34:26 Doromotan soini to mgo otow no waro mogtuu to Magboboot odyow no dakol ka abut to tano dan iing to babagkos woy to tagonlomu.

Ka Maadyag no Langlanguan ni Mosis

²⁹To pogtupang ni Mosis to bubungan to Sinai no nigkomkom to daruwa no batu to Kasabutan, waro sikandin nataga no nigmaadyag naan ka langlanguan din tongod su nigtangko sikandin to Magboboot to pog-a-aukoy.

³⁰To pogkakita ni Aaron woy to tibon mgo otow to Israil no nigmaadyag ka langlanguan ni Mosis, nahallok sikandan to pogdani kandin. ³¹Di nig-umow si Mosis kandan; no niglibong si Aaron woy ka tibon mgo igbudyag to koot-otawan to kandin woy pigkagian din sikandan. ³²Takas to sikan nigmandani ka tibon koot-otawan to Israil ki Mosis woy pigpangnganonan din sikandan to tibon mgo sugu no innangon to Magboboot kandin duon to bubungan to Sinai. ³³To pogkaponga ni Mosis to pogkagi kandan, pigtol-oban din ka langlanguan din. ³⁴Di to kara nigdani si Mosis to Magboboot odyow to pogkagi kandin, pig-awo din ka tol-ob taman to poglibuwas din. To poglibuwas din, pignangonan din ka mgo otow to Israil ko nokoy ka insugu to Magboboot, ³⁵woy nakakita sikandan no nigmaadyag ka langlanguan din. No pigtol-oban man do ni Mosis ka langlanguan din taman to poglibong din dio to Magboboot odyow to pog-a-aukudyoy.

Mgo Udlin to Allow to Poghimooy

35 ¹Piglimud ni Mosis ka tibon koot-otawan to Israil woy pignangonan din sikandan to “Soini ka mgo insugu to Magboboot no oghimuon now:

²Sood to hon-om no allow ogtarabau kow, di ka igkapitu no allow ian ka in-oog no allow now no allow to poghimooy duon to Magboboot. Agad hontow no ogtarabau to sikan no allow ogkohimatadyan. ³Dokow ogtotomog to hapuy to agad hondoi no baoy now to allow to poghimooy.”

Mgo Igtaruwoy odyow to Poghimu to Tukbung

⁴Nigkagi si Mosis dio to tibon koot-otawan to Israil to “Soini ka insugu to Magboboot:

⁵Ogpurut kow ligkat to duon to kaniu ko nokoy ka igtaruwoy now to Magboboot. Agad hontow no ogkoiniat, og-aap sikandin dio to Magboboot to igtaruwoy no bulawan ko plata woy ko brunsi; ⁶to mgo sinulid no moilom, moitom-itom woy malaab woy marodyow

no manggad no linu; woy ko bulbul to kambing; ⁷og-aap kow to mgo laplap to kambing no pig-ood to malaab, woy mgo laplap to mgo baka^pto dagat; aap kow pad to kadyu no akasya; ⁸aapa now ka lana no olibu no igparokot to ilawan; mgo aanag no iglamisok to lana no ig-oog woy to palina; ⁹aap kow pad to mgo mahalon no mgo batu no igpo-ilin-ilin to mgo kinabo to taagpanubad no hingaranan no ipod woy ka atang to sosoobon.

¹⁰“Agad hontow kaniu no duon katagaan to poghimu, dani kow odyow to poghimu to tibo no insugu to Magboboot: ¹¹iglagkos ka tukbung woy ka tol-ob din, mgo ligpit, mgo tukias, mgo suwoy woy sabukanan to suwoy; ¹²ka sooranan to kasabutan woy mgo loungan no kadyu rin woy ka soob din woy ka manggad no ig-oot to sikan; ¹³oghimuon pad ka lamisa woy ka mgo kadyu no loungan to sikan woy mgo kaaglagan din odyow no ogsabukan to pan to Tangkaan to Magboboot; ¹⁴ka sabukanan to ilawan woy mgo ilawan woy lana no igparokot woy mgo kaaglagan to ilawan; ¹⁵iglagkos pad ka tubaranan to palina duma to mgo loungan din woy lana no ig-oog woy moomut no palina; ka manggad no ig-oot to gomawan to tukbung; ¹⁶ka tubaranan to mgo tutungon no igta-taruwoy duma to brunsi no sig-ang din, mgo loungan woy mgo kaaglagan; ka lipung no brunsi duma to sabukanan to sikan; ¹⁷iglagkos pad ka mgo manggad no ig-aad to lama to tukbung duma to mgo suwoy to sikan woy mgo sabukanan to mgo suwoy, duma to manggad no ig-atang to gomawan to lama; ¹⁸iglagkos ka mgo hikotanan to tukbung woy to aad to lama no igpamal-pal to tano duma to mgo lubid no ighikot; ¹⁹taman to oghimuon now pad ka mgo kinabo no igsau-ub to mgo ogtarabau to in-oog no tukbung; iglagkos ka mgo kinabo ni Aaron no taagpanubad woy mgo kinabo to mgo anak din no igsau-ub dan to pogtarabau ran to pogpanubad.”

²⁰No, nigman-uli ka tibon koot-otawan to Israil ligkat to pogtangko dan ki Mosis, ²¹woy nig-aap ka tibo no na-antog ka goinawa ran to mgo igtaruwoy to Magboboot odyow no ogkagamit to tarabau to tukbung to pogtangko, woy to mgo tarabau dio woy mgo in-oog no mgo kinabo. ²²Nig-aap ka tibo no nigkoiniat, iglagkos mgo lukos woy mgo boi to mgo bulawan no mgo kimpit, mgo arikis, mgo sising woy duma pad. Pigpanubad dan ka bulawan dan duon to Magboboot pinabadyo to pogkawoy to tangkaan din. ²³Agad hontow no duon

P35:7,23 Baka to dagat: kono'n maugot no baka soini di pigsangod do no dakol no og-upo to dagat.

mgo sinulid no moilom, moitom-itom woy malaab woy marodyow no manggad no linu woy ko bulbul to kambing woy ko mgo laplap to kambing no pig-ood on to malaab, woy mgo laplap to mgo baka to dagat nig-aap to sikan. ²⁴ Ko hontow ka nigbogoy to plata woy ko brunsi nig-aap to sikan no intaruwoy ran duon to Magboboot, woy ko hontow ka duon kadyu no akasya nig-aap to sikan odyow no ogkagamit to loinloin no mgo baad to tarabau. ²⁵ Niglulubid ka kara boi no duon katagaanan dan to sikan, woy pig-aap dan ka pighimu ran no mgo sinulid no moilom, moitom-itom woy malaab woy ko marodyow no manggad no linu. ²⁶ Woy songo niglulubid to bulbul to kambing ka mgo boi no nigkoiniat woy no duon katagaanan to sikan. ²⁷ Nig-aap ka mgo igbudyag to mgo mahalon no mgo batu no isabuk to ipod woy atang to sosoobon to taagpanubad. ²⁸ Songo pig-aap dan ka mgo aanag woy lana to olibu no igparokot to ilawan woy iglamisok to ig-oog no lana woy to moomut no palina.

²⁹ Agad hontow to tibon mgo otow to Israil no nigkoiniat to pog-aap to igbogoy duon to Magboboot nig-aap to sikan no konon pinogos odyow no oggamiton to mgo tarabau no insugu to Magboboot kandan pinabadyo ki Mosis.

Si Bisalil woy Si Oholiab

³⁰ No nignangon si Mosis to koot-otawan to Israil to “Pitow kow, pig-aam to Magboboot si Bisalil no anak ni Uri no anak ni Hur no kapunganan ni Juda, ³¹ woy pighiponu din sikandin to Gimukud to Magboboot no nigbogoy to katagaanan woy katouanan to tibon kalkalasi no himuonon; ³² odyow no ogpokohimu sikandin to mgo po-ilin-ilin to bulawan, to plata woy to brunsi, ³³ to pogbas-bas woy pogpakopkop to mgo batu woy to pogtarabau to kadyu woy to duma pad no mgo maddodyow no mgo tarabau to poghimu. ³⁴ Woy pigbogadyan to Magboboot si Bisalil woy si Oholiab no anak ni Ahisamak no kapunganan ni Dan to katagaanan to pogtuon to duma. ³⁵ Pighiponu sikandan to Magboboot to katagaanan odyow to poghimu to loinloin no mgo maddodyow no mgo tarabau, mgo pogbabantaan, mgo pogtoi to pogpo-ilin-ilin pinabadyo to mgo sinulid no moilom, moitom-itom woy malaab woy marodyow no manggad no linu woy duma pad no manggad. Ogkataga sikandan to tibo no dorodyawi no tarabau.

Ka Tukbung to Magboboot

36 ¹No sikan ian no ogtarabau si Bisalil woy si Oholiab woy ka tibon mgo otow no pigbogadyan to Magboboot to katagaanan odyow to poghimu to tibo no mgo tarabau to pogpos-ok to tukbung sumao to sugu to Magboboot.”

²No pigpo-umow ni Mosis si Bisalil woy si Oholiab woy ka tibon mgo otow no pigbogadyan to Magboboot to katagaanan woy no nigkoiniat to poghimu to tarabau. ³Pigtinawo dan ligkat ki Mosis ka tibon mgo intaruwoy to mgo otow to Israil no inbogoy odyow to poghimu to tukbung. Nigparagas nig-aap ka mgo otow to mgo igtaruwoy ran kara masoom. ⁴No nighagtong nigtarabau ka tibon mgo otow no duon katagaanan no nigtatarabau to tukbung ⁵no nigkagi sikandan ki Mosis to “Litos on ka inbogoy to mgo otow odyow to poghiponga to tibon mgo tarabau no insugu to Magboboot, di nigparagas sikandan to pog-aap to mgo igtaruwoy.”

⁶No nigsugu si Mosis no nigpa-tugun to tibon koot-otawan to kagi “Warad on otow no lukos woy ko boi no oghimu pad to igtaruwoy rin odyow to poghimu to tukbung.” No sikan ian no naponoran ka mgo otow to pog-aap, ⁷su duon dod ogkasamo to pig-aap dan odyow to poghiponga to tibon mgo tarabau.

⁸Nigtarabau ka tibon mgo lukos no duon katagaanan dio to sampuu no mgo manggad no oghimuon no tukbung. Piggamit dan ka dorodyawi no linu woy mgo sinulid no moilom, moitom-itom woy malaab no nighimu to manggad no duon mgo langlanguan to mgo diwata to Magboboot. ⁹Un-unawa ka karakoan to mgo manggad no pighimu ran no papitu no dopa ka kaadyatan woy songo dopa ka kau-agan. ¹⁰Pinogtombil dan ka lalima no mgo manggad, woy songo pinogtombil dan ka dangob no lalima. ¹¹Nighimu sikandan to mgo tal-talinga dio to ilis to sagboka no manggad woy dio to dangob no manggad no niggamit to moilom no manggad. ¹²Kalimmaan ian ka mgo tal-talinga no pighimu ran to sagboka no manggad, woy songo kalimmaan ka mgo tal-talinga no pighimu ran to dangob no manggad no pinogtangko ka mgo tal-talinga. ¹³Nighimu sikandan to kalimmaan no mgo ligpit no bulawan odyow to pogsagboka to daruwa no manggad odyow no ogkasagboka ka tukbung. ¹⁴Nighimu ka mgo otow to sampuu woy sagboka no mgo manggad no niggamit to bulbul to kambing odyow to pogtol-ob to tukbung. ¹⁵Un-unawa ka karakoan to sikan no mgo manggad no papitu woy tonga no dopa

ka kaadyatan, woy songo dopa ka kau-agan. ¹⁶Nigtotohi sikandan no pinogtombil dan ka lalima no manggad to sagboka no oad, woy pinogtombil dan ka dangob no hon-om no manggad to sagboka pad no oad. ¹⁷Nighimu sikandan to kalimmaan no tal-talinga to ilis to sagboka no oad, woy songo pighimu ran ka kalimmaan no tal-talinga to ilis to koopusan to dangob no oad. ¹⁸Nighimu sikandan to kalimmaan no ligpit no brunsi odyow to pogsagboka to tukbung. ¹⁹Woy pighimu ran pad ka sagboka no igtol-ob to tukbung no mgo laplap to karniru no pig-ood to malaab, woy sagboka pad no igtol-ob no niggamit to mgo laplap to mgo baka⁹to dagat.

Pigmaupot no mgo kinagian

Pigmaupot noy ka duma no mgo birsikulu to kapitulu 36 pohondio to kapitulu 39 kuntoon odyow no magaan kow ogpakagon-gon to mgo maasi ogbasahon no mgo baad to libru to Exodu di uromo ogkohokad porom ka tibo to soini.

To duma no mgo birsikulu to kapitulu 36 nigparagas si Mosis to pognangon ko nokoy ka pighimu to mgo otow. Nighimu sikandan to mgo suwoy woy mgo tukias no ogsabukan to mgo manggad to tukbung. Pighimu soini to akasya no kadyu woy pigpakopkohan pad to bulawan. Nighimu sikandan to mgo pos-okanan no mgo mabogat odyow no igkapos-ok ka tukbung agad hondo sikandan nigdoog. Nighimu sikandan to mgo manggad no ig-atang to in-oog lagboy no sinabong to tukbung, woy songo nighimu sikandan to manggad no ig-atang to gomawan to tukbung. - 39

37 To kapitulu 37:1-9 nignangon si Mosis no pighimu ni Bisalil ka sooranan to kasabutan sumao to insugu to Magboboot ki Mosis. Pigdorodyow lagboy ka tibo no pighimu rin, woy pigpakopkohan din to bulawan. Nighimu sikandin to soob to sooranan no duon daruwa no diwata to Magboboot no pighimu no bulawan. Woy songo pighimu rin ka mgo kadyu no igloungan to sooranan no pigpakopkohan pad to bulawan.

To 37:10-16 nighimu ka mgo duma ni Bisalil to lamisa no sabukanan to pan woy to tibon mgo kaaglagan to sikan no mgo platu woy boung woy mgo kadyu no igloungan to sikan. Pigdorodyowan lagboy ka tibo woy pigpakopkohan to bulawan.

⁹36:19 Baka to dagat: kono'n maugot no baka soini di pigsangod do no dakol no og-upo to dagat.

To 37:17-24 nighimu sikandan to bulawan no sabukanan to ilawan no papitu ka ilawan no ogpaka-untud to sikan. Dorodyawi lagboy ka poghimu to sikan no sabukanan woy mgo 34 no kilu no bulawan ka piggamit dan to sikan.

To 37:25-29 nighimu pad sikandan to tubaranan no tutunganan to palina iglagkos to igloungan to sikan. Pighimu to kadyu no akasya woy piggapakopkohan pad to bulawan. Songo nighimu sikandan to moutmut no palina woy lana no igpanubad dio.

To kapitulu 38: 1-8, nighimu sikandan to tubaranan no tutunganan to mgo igta-taruwoy ran to Magboboot, woy songo pighimu ran ka tibon mgo kaaglagan to sikan. Songo pighimu ran ka brunsi no lipung no luu-anan to mgo boad to mgo taagpanubad.

Takas to sikan to 38:9-20 nighimu sikandan to aad to lama to tukbung no 25 no dopa ka kaadyatan woy 12 no dopa ka kau-agan. Manggad ka inka-aad dan woy duon mgo suwoy no kadyu woy mgo pos-okanan no brunsi. Ka gomawan to lama woy ka gomawan to tukbung nigtangko to ogsilaan to allow.

Nignangon-nangon ka 38:21-31 no to tibon mgo tarabau to poghimu to tukbung, nigsusulat sikandan to kabogatan to mgo piggamit dan. Niggamit sikandan to mgo songo libu no kilu no bulawan, mgo tatou no libu no kilu no plata woy daruwa no libu no kilu no brunsi.

To kapitulu 39:1-31 nignangon si Mosis no songo pighimu ran ka mgo kinabo no ogsau-ubon to mgo taagpanubad no si Aaron woy ka mgo anak din. Nighimu sikandan to sikan no pighingaranan no Ipod no ig-atang to sosoobon to taagpanubad, woy to ig-akob to sikan no dangob no manggad to longod to sosoobon no duon sampuu woy daruwa no loin-loin no mgo mahalon no batu no igpadoromdom to sampuu woy daruwa no lunggunan to mgo otow to Israil. Songo duon sabinit no moilom woy duon kuubow no igsau-ub ni Aaron woy to дума no mgo taagpanubad.

No sikan ian no to 39:32-43 nignangon si Mosis no naponga ka tibon tarabau to Tukbung to Pogtangko to Magboboot. Nighimu ka mgo otow to Israil to tibo sumao to insugu to Magboboot ki Mosis. Pig-aap dan ka tibo dio ki Mosis woy piggipitow rin. Nigkita sikandin no pighiponga ran ka tibo sumao to sugu to Magboboot kandin, woy sikan ian no pigboligan sikandan ni Mosis.

Pogpos-ok to Tukbung

40¹No nigkagi ka Magboboot ki Mosis to ²“Ipos-ok nu ka Tukbung to Pogtangko to an-anadyan no allow to an-anadyan no buwan to tuid. ³Itagu nu ka sooranan to Kasabutan dio woy ooti nu to manggad. ⁴Isood nu ka lamisa woy ipang-untud nu ka mgo kaaglagan din. Aapa nu pad ka sabukanan to ilawan dio to sood, woy ipansabuk nu ka mgo ilawan din. ⁵Isabuk nu ka bulawan no tubaranan to palina dio to tangkaan to sabukanan to Kasabutan woy isampoy nu ka manggad dio to gomawan to tukbung. ⁶Isabuk nu ka tubaranan no tutunganan to mgo igta-taruwoy dio to tangkaan to gomawan to Tukbung to Pogtangko; ⁷woy isabuk nu pad ka luu-anan no lipung taliwaro to Tukbung to Pogtangko woy to tubaranan woy bus-ugi nu to woig. ⁸Ipos-ok nu ka aad no oglibut to lama woy isampoy nu ka manggad no ig-oot to gomawan to lama. ⁹Purut ka to lana no ig-oog woy bus-ugi nu ka tukbung woy ka tibo to sood to sikan; ian no i-oog nu sikan woy ka mgo kaaglagan din, woy ogkohimu no in-oog lagboy sikan. ¹⁰Songo bus-ugi nu to lana ka tubaranan to tutungon no igta-taruwoy woy ka tibon mgo kaaglagan din; ian no i-oog nu ka tubaranan woy ogkohimu no in-oog lagboy sikan. ¹¹Bus-ugi nu ka luu-anan woy ka sabukanan to sikan no ig-oog nu.

¹²Aapa nu si Aaron woy ka mgo anak din no lukos dio to gomawan to Tukbung to Pogtangko woy luu-i nu to woig. ¹³Sau-ubi nu si Aaron to mgo in-oog no mgo kinabo, woy bus-ugi nu sikandin to lana no i-oog nu sikandin odyow no ogkohimu sikandin no taagpanubad ku. ¹⁴Aapa nu ka mgo anak din no lukos woy pakinaboi nu sikandan to mgo dorodyawi no kinabo. ¹⁵Songo bus-ugi nu sikandan to lana unawa to pogbus-ug nu to amoy ran odyow no ogkohimu sikandan no mgo taagpanubad ku. Ko ogkabus-ugan sikandan to lana ogbunsud ka pogkataagpanubad dan no ogparagas taman to mgo tipouri ran.”

¹⁶Pighimu ni Mosis ka tibo unawa to insugu to Magboboot kandin. ¹⁷No sikan ian no inpos-ok on ka tukbung to an-anadyan no allow to an-anadyan no buwan to igkarangob no tuid takas to poglibuwas dan to Ehiptu. ¹⁸To pogpos-ok ni Mosis to tukbung, pig-ay-adyaran din ka mgo pos-okanan to mgo suwoy woy intagu din ka mgo suwoy dio to mgo lungag to sikan woy insabuk din ka mgo tukias duon. ¹⁹Insampoy rin ka manggad to tukbung ampow to mgo tukias woy

pigtol-oban din pad to tol-ob unawa to innangon to Magboboot. ²⁰ Pignipurut ni Mosis ka Kasabutan woy intagu din to sooranan, nigluglug sikandin to mgo kadyu no igloungan to sooranan woy pigsooban din to igsoob to pogpokog-uli. ²¹ Insood din to tukbung ka sooranan woy insanggat din ka ig-oot no manggad no in-oot din ka sooranan to Kasabutan sumao to innangon to Magboboot. ²² Insabuk ni Mosis ka lamisa dio to sood to Tukbung to Pogtangko to kawanan ko ogpitow ki ligkat to gomawan dio to libuwasan to in-oot no longod ²³ woy pignsabukan din sikan to pan to tangkaan to Magboboot sumao to innangon to Magboboot kandin. ²⁴ Insabuk din ka sabukanan to ilawan to sood to Tukbung to Pogtangko to tangkaan to lamisa dio to gibang to tukbung ²⁵ woy insabuk din ka mgo ilawan to tangkaan to Magboboot sumao to innangon to Magboboot kandin. ²⁶ Insabuk ni Mosis ka bulawan no tubaranan dio to sood to Tukbung to Pogtangko to tangkaan to manggad no ig-oot ²⁷ woy niglututug sikandin to moomut no palina dio sumao to innangon to Magboboot kandin. ²⁸ No insanggat din ka manggad no ig-oot dio to gomawan to tukbung. ²⁹ Insabuk din ka tubaranan no tutunganan to mgo igta-taruwoy marani to gomawan to Tukbung to Pogtangko, woy intaruwoy rin to Magboboot ka mgo adyam woy mgo bogas no ogtutugon dio sumao to insugu to Magboboot. ³⁰ Insabuk din ka lipung to taliwaro to Tukbung to Pogtangko woy to tubaranan woy pigbus-ugan din to woig no igluu, ³¹ woy piggamit sikan ni Mosis woy ni Aaron woy mgo anak din no lukos no igluu to boad woy mgo paa ran. ³² Nigluu sikandan kara ogsood sikandan to Tukbung to Pogtangko woy ko ogdani sikandan to tubaranan, sumao to insugu to Magboboot ki Mosis. ³³ Nigpos-ok si Mosis to aad no niglibut to tukbung woy to tubaranan, woy insanggat din ka manggad to gomawan to lama. No sikan ian no naponga ni Mosis ka tarabau.

Ka Kabantug to Magboboot

³⁴ No niglogsad ka suwoy no gapun dio to Tukbung to Pogtangko, woy naponu ka tukbung to kabogbogan to Magboboot. ³⁵ Waro nakasood si Mosis to Tukbung to Pogtangko to sikan su nakalogsad ka gapun woy naponu ka tukbung to kabogbogan to Magboboot.

³⁶ To tibon mgo poghip-hipanow to mgo otow to Israil, nighipanow sikandan ko nigkawoy ka gapun ligkat to ampow to tukbung; ³⁷ di ko waro mogkawoy ka gapun, waro sikandan moghipanow taman

to allow no nigkawoy ka gapun. ³⁸No sikan ian no duon gapun to Magboboot ampow to tukbung ko allow, woy duon hapuy to gapun to maukilom no ogkakitaan to tibon koot-otawan to Israil to tibon poghi-hipanow ran.